

आत्मा शरीर तरि आहे । परि शरीरिचा तो नोहे ।  
 ऐसें बोलवरि होये । करुं काये ॥ २ ॥  
 क्षणौनि असो तें विशेषें । अथवा आपणपेया सारिखें ।  
 चराचर जो देखे । अखंडित ॥ ३ ॥  
 सुखदुःखादि वमें । कां शुभाशुभें कमें ।  
 दोनि ऐसीं मनोधमें । नेणे चि जो ॥ ४ ॥  
 हे समविषम भाव । अनिक ही वैचित्र्य जें सर्व ।  
 तें मानी जैसे अवेव । आपुले होथि ॥ ५ ॥  
 हैं एकैक काडू सांघावें । जेआ त्रैलोक्य चि आघवें ।  
 मीं ऐसें सभावे । बोधा आलें ॥ ६ ॥  
 तेआ ही देह एक किर आथि । अणिकै लौकिकु ही तेहातें क्षणथि ।  
 परि आत्मा ऐसी चि प्रतिति । जें परब्रह्म हा ॥ ७ ॥  
 क्षणौनि आपण पां विश्व देखिजे । आणि विश्वां आपण होइजे ।  
 ऐसें साम्य चि एक उपासिजे । पांडवा गा ॥ ८ ॥  
 हें तुहते बहुतीं प्रसंगीं । आहिं क्षणों तें येया चि लागीं ।  
 जे साम्या परोति जगीं । प्राप्ति नाही ॥ ९ ॥

अर्जुन उवाच ॥

योगं योगस्त्वया प्रोक्तः साम्येन मधुसूदन ।

एतस्याहं न पश्यामि चंचलत्वात्स्थितिं स्थिरां ॥ ३३ ॥

तवं अर्जुनु क्षणे देवा । तुझीं सांघा किर आमचिआ कणवा ।

परि न पुरीं जी स्वभावा । मनाचेआ ॥ ४१० ॥

हें मन कैसें केवडें । ऐसें क्षणो पाउं तरि न संपडे ।

यन्हविं राहाटावया तौकडें । त्रैलोक्य येया ॥ ११ ॥

चंचलं हि मनः कृष्ण प्रमाथि बलवद्वटं ।

तस्याहं निग्रहं मन्ये वायोरिव सुदुष्करं ॥ ३४ ॥

ह्यणौनि ऐसें कैं घडैल । जें मर्कटा समाधि एईल ।  
 कां राहे ह्यणितला राहिल । महावातु ॥ १२ ॥  
 जी बुद्धितें सली । निश्चयातें ढाली ।  
 स्थैर्येंसी हाता फली । मेलौनि जाये ॥ १३ ॥  
 जें विवकातें भूलवी । संतोषासि चाड लावी ।  
 बैसिजे तन्हीं हीडवी । चहूं दिशीं ॥ १४ ॥  
 जें निरुंधिलें घे वाऊ । जेआ संयमू चि होये सावाओ ।  
 तें मन आपुला स्वभाऊ । सांडील काइ ॥ १५ ॥  
 ह्यणौनि मन येक निश्चल राहील । मग आह्वासि साम्य येईल ।  
 हें विस ही विश्वे न घडेल । तें एआ लागि ॥ १६ ॥

### श्रीभगवानुवाच ॥

असंशयं महाबाहो मनो दुर्निग्रहं चलं ।  
 अभ्यासेन तु कौंतेय वैराग्येण च गृह्यते ॥ ३५ ॥  
 तवं कृष्ण ह्यणथि साच चि । बोलतु आहासि तें तैसें चि ।  
 एआ मना किर चपल चि । स्वभाओ गा ॥ १७ ॥  
 परि वैराग्याचेनि आधारें । लाविलें अभ्यासाचिए मोहरे ।  
 तरि केतुलेनि एकें अवसरें । थिरावेल ॥ १८ ॥  
 कां यया मनाचें एक नीकें । जें हें देखिलेंआ ठाया सोंके ।  
 ह्यणौनि स्वानुभवसुखा चि कवतिकें । दाखवितां जाइजे ॥ १९ ॥

असंयतात्मना योगो दुष्प्राप इति मे मतिः ॥  
 वक्ष्यात्मना तु यतता शक्योऽवाप्तुमुपायतः ॥ ३६ ॥  
 यन्हवि विरक्ति जंयां नाहिं । जे अभ्यासिं निरिगती चि कहीं ।  
 तेयां नाकले हें आह्मी हीं । न मनूं काइ ॥ ४२० ॥  
 परि यमनियमाचिया वाटा न वचिजे ।  
 साविंया वैराग्याची से न करिजे ।

केवल विषयजलीं ठाकिजे ।

बुडी देउनि ॥ २१ ॥

एआ जालेआ मानसा कहीं । युगुतिची कांवि लागली नाहिं ।

तारि निश्चल होईल काई । कैसेन सांविं ॥ २२ ॥

ह्मणौनि मनाचा निग्रहो होए । ऐसा उपाओ जो आहे ।

तो आरंभीं मग नोहे । कैसा पाउं ॥ २३ ॥

तारि योगसाधन जेतुकें । तें आघवें चि काइ लटिकें ।

परि आपणपेयां अभ्यासु न टके । हें चि ह्मणें ॥ २४ ॥

आजि योगाचें होये बल । तारि मन केतुलें चपल ।

काइ महदादि हें सकल । आपुलें नो होए ॥ २५ ॥

अर्जुन उवाच ॥

अयतिः श्रद्धयोपेतो योगाच्चलितमानसः ।

अप्राप्य योगसंसिद्धिं कां गतिं कृष्ण गच्छति ॥ ३७ ॥

तेथ अर्जुनु ह्मणे नीकें । देओ बोलताति तें न चुके ।

साच योगबलेंसीं न तुके । मनोबल ॥ २६ ॥

परि तो चि योगु कैसा केवि जाणों ।

आह्मीं येतुले दीइया मातु ही नेणों ।

ह्मणौनि मनातें जी ह्मणों ।

अनावर हें ॥ २७ ॥

हा आतां आघवेंआ जन्मां । तूझेनि प्रसादें पुरुषोत्तमा ।

योगपरिचयो आत्मां । जाला आजि ॥ २८ ॥

परि आणिक येकु गोसाविआं । मज संशयो आहे साविआं ।

तो तुज वांचूनि फेडावया । समर्थु नाहीं ॥ २९ ॥

ह्मणौनि सांचें गोविंदा । कव्हणी येकु मोक्षपदा ।

शौबतु होता श्रद्धा । उपायें विण ॥ ३० ॥

इंद्रियग्रामौनि निगाला । आस्थेचिये वाटे लागला ।  
आत्मसिद्धिचेआ पुढेला । नगरा एखावेआ ॥ ३१ ॥

कच्चिन्नोभयविघ्नष्टद्विज्ज्ञानमिव नश्यति ।

अप्रतिष्ठो महाबाहो विमूढो ब्रह्मणः पथि ॥ ३२ ॥

तव आत्मसिद्धि न टके चि । आणि माघैतेआं हीं भैयवे चि ।

एसां अस्तु गेला माझारि चि । आयुष्यमानु ॥ ३२ ॥

जैसें अवकालीं आभाल । अलुमालु सपतल ।

विपायें आलें केवल । वसे ना वरिषे ॥ ३३ ॥

तैसीं दोन्हीं इयें दुरावलीं । जे प्राप्ति तव अलग ठेली ।

आणि अप्राप्ति ही सांडविली । श्रद्धा तिआ ॥ ३४ ॥

पतन्मे संशयं कृष्ण छेत्तुमर्हस्यशेषतः ।

त्वदन्यः संशयस्यास्य छेत्ता न ह्युपपद्यते ॥ ३५ ॥

ऐसा ओलांतरला कार्जी । जो श्रद्धेचां चि समार्जी ।

बुडाला तेआ हो जी । कवण गति ॥ ३५ ॥

श्रीभगवानुवाच ॥

पार्थ नैवेह नामुत्र विनाशस्तस्य विद्यते ॥

नहि कल्याणकृत्कश्चिद्गुर्गतिं तात गच्छति ॥ ४० ॥

तव कृष्ण ह्मणथि पार्था । जेया नैष्कर्म्यसुखीं आस्था ।

तेया मोक्ष वांचूनि अन्यथा । गति आहे गा ॥ ३६ ॥

परि येतुलें चि येक घडे । जें माझारि विसावें पडे ।

ते हीं ऐसेनि सुरवाडें । जो देवां नाहीं ॥ ३७ ॥

यन्हविं अभ्यासाचां उचलतां । पाई जरि चालती ।

तरि दिवसा आधि टाकिता । सोहंसिद्धितें ॥ ३८ ॥

परि तेतुला वेगु तो नोहे चि । ह्मणौनि विसावां तन्हे नशिका चि ।

पाहिं मोक्षु तव तमा चि । ठेवला आहे ॥ ३९ ॥



अथ पुण्यकृतौ लोकावस्थित्वा शाश्वतीः समाः ।

युचीनां श्रीमतां गेहे योगभ्रष्टोऽभिजायते ॥ ४१ ॥

आइकें कवतिक होये कैसें । जें शतमखां लोक सायासें ।

तें तो पावे अनायासें । कैवल्यकामु ॥ ४४० ॥

मग तेथिचे जे अमोघ । अलौकिक भोग ।

ते भोगी जवं चांग । कवतिक पुरे ॥ ४१ ॥

पाठिं जन्मे संसारीं । परि सकळ धर्माचां माहेरीं ।

ळांवा उगवे आगरीं । विभवश्रियेचां ॥ ४२ ॥

जेहातें नीतिग्रंथें चालिजे । सत्यसंधूतें बोलिजे ।

देखावें तें देखिजे । शास्त्रदीठी ॥ ४३ ॥

बेदु तो जागेश्वरु । जेआ वेवसाओ निजु आचारु ।

सारासारविचारु । मंत्रु जेहातें ॥ ४४ ॥

जेहाचा कुलीं चिंता । जाली ईश्वराची कांता ।

जेहातें गृहदेवता । आदिरिद्धि ॥ ४५ ॥

ऐसी निजपुण्याचिया जोडी । वाढिनली सर्व सुखांची कुलवाडी ।

तिण जन्मे तो मुरवाडी । योगच्युतु ॥ ४६ ॥

अथवा योगिनामेव कुले भवति धीमताम् ।

एतद्धि दुर्लभतरं लोके जन्म यदीदृशम् ॥ ४२ ॥

अथवा ज्ञानाग्निहोत्री । जे परब्रह्मण्य श्रोत्री ।

माहासुखक्षेत्री । आदिवंत ॥ ४७ ॥

जे सिद्धांचां सिंहासनीं । राज्य करिताति त्रिभुवनीं ।

जे कूजते कोकिल वनीं । संतोषाचां ॥ ४८ ॥

जे विवेकप्रामिचे मुली । जे बैठले आहाति फलीं ।

तेष्वां योगियांचां चि कुलीं । जन्म पावे ॥ ४९ ॥

तत्र तं बुद्धिसंयोगं लभते पौर्वदेहिकम् ।

वस्तुन च ततो भूयः संसिद्धौ कुरुनन्दन ॥ ५३ ॥

मोटकी देहाकृति उमटे । आणि उन्मेखा पाहाट कूटे ।  
 सूर्या पुढां प्रकटे । प्रकाशु जैसा ॥ ४५० ॥  
 तैसी दशेची वाट न पांतां । वयसेचिया गावां नैयतां ।  
 बालपणीं चि सर्वज्ञता । वरी तेयातें ॥ ५१ ॥  
 तिण सिद्धप्रज्ञेचेनि लाभें । मन चि सारस्वतें दुभे ।  
 मग सकळ शास्त्रें स्वयंभें । निगति वाचें ॥ ५२ ॥  
 ऐसें जें जन्म । जेयाळागि देव सकाम ।  
 स्वर्गीं ठेळे जाहोम । करियि सदा ॥ ५३ ॥  
 अमरीं भाटां होइजे । मग मृत्युशेकातें वानिजे ।  
 ऐसें जन्म गा पार्था जें । तें तो पावे ॥ ५४ ॥

पूर्वाभ्यासेन तेनैव सिद्ध्यते ह्यवशोऽपि सः ।

जिज्ञासुरपि योगस्य शब्दब्रह्मातिवर्तते ॥ ४४ ॥

आदिं मागील जे सद्बुद्धि । जेथ जीविता नेली होती अवधी ।  
 मग ते चि पुढुतीं निरवधी । नवीं लाडे ॥ ५५ ॥  
 तेथ सदैवां आणि पायला । वरि दिव्यांजन हीं होये डोलां ।  
 मग देखे जैसीं अवलीला । पाताळधनें ॥ ५६ ॥  
 तैसे दुर्भेद्य जे जे अभिप्राये । कां गुरुगम्य हान ठाये ।  
 तेथ सौरसें विण जाये । बुद्धि तेहाची ॥ ५७ ॥  
 बलियें इंद्रियें एंथि मना । मन एकवटे पवनां ।  
 पवनु साहाजें गगना । मीलों चि लागे ॥ ५८ ॥  
 ऐसें नेणें चि काइ आपसें । तेहातें चि कीजे अभ्यासें ।  
 समाधि घर पूसे । मानसाचें ॥ ५९ ॥  
 जाणिजे योगप्रापिका भैरवु । काइ हा आरंभरंभेचा गौरवु ।  
 कीं वैराग्यसिद्धिचा अनुभवु । रुपा आला ॥ ४६० ॥  
 हा संसार उमाणतें माप । किं अष्टांगसांग्रियेचें दीप ।  
 जैसें परमलें चि धारेलें रूप । चदनाचें ॥ ६१ ॥

तैसा संतोषाचा काड घडिला । कां सिद्धभांडारौनि हान काढिला ।  
 दीसे तेणें मानें रूढला । साधकदशे ॥ ६२ ॥  
 जे वरिखशताचां कोडीं । जन्मसहस्रांचिआ आडी ।  
 लंघितां पातला थडी । आत्मसिद्धिची ॥ ६३ ॥  
 ह्मणौनि साधनजात आघवें । अनुसरे तेआ स्वभावें ।  
 मग आइतिये बसे राणिवे । विवेकाचिये ॥ ६४ ॥  
 प्राठिं विचारितेया वेगा । तो विवेकु ही ठाके मागां ।  
 मग अविचार ये आंगा । घडौनि जाए ॥ ६५ ॥  
 तेथ मनाचें मेवौडें विरे । पवनाचें पवनपण सरे ।  
 आपणपां आपण मुरे । आकाश ही ॥ ६६ ॥  
 प्रणवाचा माथा बुडे । एतुलेंनि अनिर्वाच्य सुख जोडे ।  
 ह्मणौनि आदिंचि बोलु बाहुडे । तो येया चि लागि ॥ ६७ ॥  
 पेसी परब्रह्मिची स्थिती । जे सकलां गतींसि गति ।  
 तेया अमूर्ताची मूर्ति । होउनि ठाके ॥ ६८ ॥

प्रयत्नाद्यतमानस्तु योगी संशुद्धकिल्बिषः ॥

अनेकजन्मसंसिद्धस्ततो याति परां गतिम् ॥ ४५ ॥

तेणें बहुतीं जन्मीं मागिलीं । विक्षेपाचीं पाणिवलें झाडिलीं ।  
 ह्मणौनि उपजतखेवो बुडाली । लगिनवटिका ॥ ६९ ॥  
 आणि तद्रूपतासीं चि लग्न । लागौनि ठेलें अभिन्न ।  
 जैसें लोपलें अभ्र गगन । होउनि ठाके ॥ ४७० ॥  
 तैसें विश्व जेथें होये । माघौतें लया जाये ।  
 तें विद्यमानें चि देहें । जाला तो गा ॥ ७१ ॥  
 जेया लाभाचिआ आशा । करूनि धैर्यबाहूंचा भरवसा ।  
 घालित षट्कर्माचां धारसां । कर्मनिष्ठ ॥ ७२ ॥  
 कां जिये येकी वस्तूलागि । बाणूनि ज्ञानाची वज्रांगी ।  
 जूझत प्रपंचेसीं समरंगीं । ज्ञानिये गा ॥ ७३ ॥



### भाषार्थदीपिका.

अथवा निर्लागे निसरडां । तपोदुर्गाचां आडकडां ।  
 झोंबति तपिये चाडा । जेयाचिया ॥ ७४ ॥  
 जें भजतेयांसि भज्य । याज्ञिकांचें याज्य ।  
 येवं जें पूज्य । सकलां सदा ॥ ७५ ॥  
 तें चि तो आपण । स्वयं जाला निर्वाण ।  
 जें साधकांचें कारण । सिद्ध तत्व गा ॥ ७६ ॥

तपस्विभ्योऽधिको योगी ज्ञानिभ्योऽपि मतोऽधिकः ।

कर्मिभ्यश्चाधिको योगी तस्माद्योगी भवार्जुन ॥ ४६ ॥

ह्मणौनि कर्मनिष्ठां वंदु । तो ज्ञानियांसि वेदु ।  
 तापसांचा आद्यु । तपोनाथु ॥ ७७ ॥  
 पै जीवपरमात्मसंगमां । जेयाचेया एणें जाणें मनोधर्मा ।  
 तो शरीरिं चि परि महिमा । ऐसी पावे ॥ ७८ ॥  
 ह्मणौनि एआ कारणें । तूतें मीं सदा ह्मणे ।  
 योगी होये अंतष्करणें । पांडुकुमरा ॥ ७९ ॥

योगिनामपि सर्वेषां मद्भूतेनांतरात्मना ।

श्रद्धावान्भजते यो मां स मे युक्ततमो मतः ॥ ४७ ॥

आगा योगी जो ह्मणिजे । तो देवांचा देओ जाणिजे ।  
 आणि सुखसर्वस्व माझें । चैतन्य तो ॥ ४८० ॥  
 जेया भजता भजन भजावें । हें भगतिसाधन जें आधवें ।  
 तें मी चि जालों अनुभवें । अखंडीत ॥ ८१ ॥  
 तेया एकवटलेया प्रेमा । जरि पाडें पाइजे उपमा ।  
 तरि मी देह तो आत्मा । हें चि होये ॥ ८२ ॥  
 ऐसें भक्तचकोरचंद्रें । जेथ त्रिभुवनैकनरेंद्रें ।  
 बोलिल्लें गुणसमुद्रें । संजयो ह्मणे ॥ ८३ ॥  
 तेथ आदिलापासौनि पार्था । आइकिजे ऐसी चि आस्था ।  
 दुणावली हे यदुनाथा । पावों सरलें ॥ ८४ ॥

किं सावियां चि मनीं तोषला । जें बोलां आरिसा जोडला ।  
 तेणें हरिषें आतां उपलवला । निरूपील ॥ ८५ ॥  
 जो प्रसंगु असे पुढां । जेथ शांतु दीसैल उघडा ।  
 तो पाल्लविला मुडा । प्रमेयबीजाचा ॥ ८६ ॥  
 जें सात्विकाचेनि वडपें । गेलें अध्यात्मिक खरपें ।  
 साहाजें निरोलले वापे । चतुर चित्ताचे ॥ ८७ ॥  
 वारि अवधानाचा वापसा । लाधला सोनेआं ऐसा ।  
 ह्यगौनि पेटावेआ धिवंसा । निवृत्तिसी ॥ ८८ ॥  
 ज्ञानदेओ ह्यणे मी चाडें । सद्गुरु केलां कोडें ।  
 माथां हातु ठेविला तें फुडें । बिं चि वाइलें ॥ ८९ ॥  
 ह्यगौनि येणें मुखें जें निगे । तें संतांचां हृदई लागे ।  
 हें असो सांघें श्रीरंगें । बोलिलें जें ॥ ९० ॥  
 परि तें मनाचां कार्नी आइकावें । बोलु बुद्धिचां डोलां देखावें ।  
 हें साटोवाटीं घेआवें । चित्ताचिआ ॥ ९१ ॥  
 अवधानाचेनि हातें । नेया पां हृदया आंतौतें ।  
 हें रिझवितील आणितें । जाणांचिए ॥ ९२ ॥  
 हे हितातें निवविती । परिणामातें जिवविति ।  
 सुखाची लाविती । लाखौली जीवा ॥ ९३ ॥  
 जें अर्जुनेसीं मुकुंदें । नागर बोलिलें विनोदें ।  
 तें बोविथेचेनि बंधें । सांघैन मीं ॥ ९४ ॥

ॐ तत्सदिति श्रीमद्भगवद्गीतासूपनिषत्सु ब्रह्मविद्यायां

योगशास्त्रे श्रीकृष्णार्जुनसंवादे अभ्यासयोगो नाम

षष्ठमोऽध्यायः ॥

॥ श्रीकृष्णार्पणमस्तु ॥

# ज्ञानेश्वरी

## अध्याय सातवा

भोक्त्रुणाय नमः ॥

तरि आइकां मग तो अनंतु । पार्थीतें असे ह्मणतु ।  
पैं गा तूं योगयुक्तु । जाला सांता ॥ १ ॥  
मज समप्रातें जाणसी ऐसैं । आपुलिये तलहातिचें रत्न जैसैं ।  
तुज ज्ञान सांघेन तैसैं । विज्ञानेंसीं ॥ २ ॥

श्रीभगवानुवाच ॥

मय्यासकमनाः पार्थ योगं युंजन्मदाश्रयः ।  
असंशयं समग्रं मां यथा ज्ञास्यसि तच्छृणु ॥ १ ॥  
ज्ञानं तेऽहं सविज्ञानमिदं वक्ष्याम्यशेषतः ।  
यज्ज्ञात्वा नेह भूयोऽन्यज्ज्ञातव्यमवशिष्यते ॥ २ ॥

येथ विज्ञानें काइ करावें । ऐसैं घेंसि जरि मनोभावे ।  
तरि पैं आदिं जाणावें । तें चि लागे ॥ ३ ॥  
मग ज्ञानाचिये वेले । ज्ञांकति जाणिवेचे डोले ।  
जैसी तीरीःनाव न ढले । टेंकली सांती ॥ ४ ॥  
तैसी जाणीव जेथ न रिगे । विचारु माघौता वाउलीं निगे ।  
तर्कु आणि ने घे । आंगीं जेयाचों ॥ ५ ॥

अर्जुना तेया नावं ज्ञान । येरु प्रपंचु हें विज्ञान ।  
 येथ सत्वबुद्धि तें अज्ञान । तीन्ही जाण ॥ ६ ॥  
 आतां अज्ञान आघवें हारपे । विज्ञान निःशेष करपे ।  
 आणि ज्ञान तें स्वरूपें । होउनि जाइजे ॥ ७ ॥  
 ऐसें बर्म जें गूढ । तें कीजेल वाक्यारूढ ।  
 जेणें थोडेनि पुरे कोड । बहुत मनिचें ॥ ८ ॥  
 जेणें सांगतेया बोलवें कुंठे । आइकतेयाचें वेसन तूटे ।  
 हें जाणणें सानें मोठें । नव्हे आइकें ॥ ९ ॥

मनुष्याणां सहस्रेषु कश्चिद्यतति सिद्ध्ये ।

यततामपि सिद्धानां कश्चिन्मां वेत्ति तत्त्वतः ॥ ३ ॥

पैं गा मनुष्यांचेया सहस्रां । माझि त्रिपाइलेयां चि एथ विबंता ।  
 तैसेयां धिक्सेकरां बहुवसां । माझि विरला जाणें ॥ १० ॥  
 जैसें भरलेया त्रिभुवना । आंतु येकु येकु चांगु अर्जुना ।  
 निवडूनि कीजे सेना । लक्षवरि ॥ ११ ॥  
 किं तेयां ही माझि सेवटीं । जेव्हळि लोहमासातें घाटी ।  
 तेव्हळि विजेश्रियेचां पाटीं । एकु चि वैसे ॥ १२ ॥  
 तैसे आस्थेचां महापुरीं । रिगताति कोडिवेन्हीं ।  
 परि प्राप्तिचां पैली तीरीं । विरला निगे ॥ १३ ॥  
 हणौनि सामान्य गा नेहे । हे सांगतां वडिलि गोठि आहे ।  
 परि ते बोलों येईल पाहें । आतां प्रस्तुत आइक ॥ १४ ॥  
 तरि अवधारि धनंजया । हे महदादिक माझी माया ।  
 जैसी प्रतिबिंबे छाया । निजांगाची ॥ १५ ॥

भूमिरापोऽनलो वायुः खं मनो बुद्धिरेव च ।

अहंकार इतीयं मे भिन्ना प्रकृतिरष्टधा ॥ ४ ॥

आणि इयेतें प्रकृति हणिजे । हे अष्टधा भिन्न जाणिजे ।  
 लोकत्रय निफजे । इयेतव ॥ १६ ॥

हे अष्टधा भिन्न कैसी । ऐसा ध्वनि धरिसी जरि मानसी ।  
तरि ते चि आतां परिसैं । विवंचना ॥ १७ ॥

अपरेयमितस्त्रय्यां प्रकृतिं विद्धि मे परां ।  
जीवभूतां मह्यबाहो ययेदं धार्यते जगत् ॥ ५ ॥

आप तेज गगन । मही मारुतु मन ।  
बुद्धि अहंकारु हे भिन्न । अठै भाग ॥ १८ ॥  
आणि एयां आठांची जे साम्यावस्था । ते माझी परम प्रकृति पार्था ।  
तिथे नावं व्यवस्था । जीउ ऐसी ॥ १९ ॥  
जे जडातें जीववी । चेत्नेतें चेववी ।  
मनातें मानवी । शोक मोह ॥ २० ॥  
पै बुद्धिचा आंगीं जाणगें । तें जियेचिये जवलिकेचें करणें ।  
जिया अहंकाराचेनि विंदाणें । जग चि धरिजे ॥ २१ ॥

एतद्योनीनि भूतानि सर्वाणीत्युपधारय ।  
अहं कृत्स्नस्य जगतः प्रभवः प्रलयस्तथा ॥ ६ ॥

ते सूक्ष्म प्रकृति कोडें । जें स्थूलेचेया आंगा घडे ।  
तें भूतसृष्टिची पडे । टांकसाल ॥ २२ ॥  
चतुर्विधु ठसा । उमटों लागे आपैसा ।  
मोला तरि सरिसा । परि थर चि आनान ॥ २३ ॥  
होंति चौरासी लक्ष थरा । एरा मीति नेणिजे भांडारा  
भरे आदिशून्याचा गाभारा । नाणयांसि ॥ २४ ॥  
ऐसे एकतूकें पंचभौतिक । पडति बौहस टांक ।  
मग तिथे समृद्धिचें लेख । प्रकृती चि धरी ॥ २५ ॥  
जे आंकूनि नाणें विस्तारी । पाठिं तेयाचो चि आंठणी करी ।  
माझि कर्माकर्माचा व्यवहारी । प्रवर्तु दावी ॥ २६ ॥  
हें रूपक परि असो । सांघां उघड जेसें परियसों ।  
तरि गा नामरूपाचा अतिसो । हा प्रकृती चि कीजे ॥ २७ ॥



आणि प्रकृति तवं माझां ठाई । बिंबे एथ आन नाही ।  
हणौनि आदिनिधन पाई । जगासि मी ॥ २८ ॥

मत्तः परतरं नान्यत्किंचिदस्ति धनंजय ।

मयि सर्वमिदं प्रोक्तं सूत्रे मणिगणा इव ॥ ७ ॥

हैं रोहिणीचें जल । तेयाचें पांतां जैं मूल ।  
तैं रश्मि हीं नव्हति केवल । होये तैं भानु ॥ २९ ॥  
तिया चि परीं किरीटी । इये प्रकृती जालिये सृष्टी ।  
जैं उपसंहारौनि कीजैल गोठि । तैं मी चि आहें ॥ ३० ॥

रसोऽहमप्सु कौंतेय प्रभास्मि शशिसूर्ययोः ।

प्रणवः सर्ववेदेषु शब्दः खे पौरुषं नृषु ॥ ८ ॥

ऐसैं होये दीसे न दिसे । हें मज चि माझिवडें असे ।  
मियां चि विश्व धरिजे । जैसैं सूत्रें मणि ॥ ३१ ॥  
हणौनि उदकीं हान रसु । कां पवनीं जो स्पर्शु ।  
शशिसूर्यी जो प्रकाशु । तो मी चि जाण ॥ ३२ ॥  
तैसा चि नैसर्गिकु शुद्धु । पृथ्वीचां ठाई गंधु ।  
गगनीं मीं शब्दु । वेदीं प्रणवु ॥ ३३ ॥  
नराचां ठाई नरत्व । जें अहंभावियें सत्व ।  
तैं पौरुष मी हें तत्व । बोलिजत असे ॥ ३४ ॥

पुण्यो गंधः पृथिव्यां च तेजश्चास्मि विभावसौ ।

जीवनं सर्वभूतेषु तपश्चास्मि तपस्विषु ॥ ९ ॥

अग्नी ऐसैं आहाच । तेजीं नावांचें आहे कवच ।  
तैं परतें केलेयां साच । तेज तैं मीं ॥ ३५ ॥  
आणि नानाविधि योनि । जन्मौनि भूतें त्रिभुवनीं ।  
वर्ततें आहाति जीवनीं । आपुललां ॥ ३६ ॥  
पै एकें पवनू चि पांथि । एकें तृणेंतव जींथि ।  
एकें अन्नाभरें आहाति । जलें एकें ॥ ३७ ॥

ऐसैं भूतप्रति आनन । जें प्रकृतिवशें दीसे जीवन ।  
तें आघवां ठाई अभिन । मी चि एक ॥ ३८ ॥

बीजं मां सर्वभूतानां विद्धि पार्थ सनातनम् ।

बुद्धिर्बुद्धिमतामस्मि तेजस्तेजस्विनामहम् ॥ १० ॥

पैं आदिचेनि अवसरें । विरुढे गगनाचेनि अंकुरें ।  
जें अंतीं गीली आखरें । प्रणवा पटिचीं ॥ ३९ ॥  
जवं हा विश्वाकारु असे । तवं जें विश्वा चि सारिखें दीसे ।  
मग महाप्रलयदशे । कैसैं हीं नव्हे ॥ ४० ॥  
ऐसैं अनादि जें सहज । तें गा मीं विश्वबीज ।  
हैं हाता तळीं तुज । देइजतसे ॥ ४१ ॥  
मग उघड करूनि पांडवा । जैं हैं आणिसी सांख्याचेया गावां ।  
तें येयाचा उपेगु बरवा । देखसील ॥ ४२ ॥  
परि हैं अप्रसंगाळाप । आतां असतु न बोलों साक्षेप ।  
जाणें तपियांचां ठाई तप । तें रूप माझें ॥ ४३ ॥  
बलियां माझि बल । तें मीं जाण अढल ।  
बुद्धिमतीं केवल । बुद्धि ते मीं ॥ ४४ ॥

बलं बलवतां चाहं कामरागद्विर्जितम् ।

धर्माविरुद्धो भूतेषु कामोऽस्मि भरतर्षभ ॥ ११ ॥

भूतांचां ठाई कामु । तो मीं ह्मणे रामु ।  
जेंगें अर्थातव धर्मु । थोरु दीसे ॥ ४५ ॥  
एन्हाविं विकाराचेनि पैसैं । करी किर इंद्रियांचेया चि ऐसैं ।  
परि धर्मासि वेखासैं । जाओं नेंदी ॥ ४६ ॥  
जे अप्रवृत्तिचा अव्हांटा । सांडूनि विधिचिया चि नीगे वाटा ।  
तेवीं चि नियमाचा दीवटा । सर्वें चाले ॥ ४७ ॥  
कामु ऐसिया ओजा प्रवर्त्ते । ह्मणौनि धर्मासि होये पुरतें ।  
मग माक्षतीर्थीचें मुगुतें । संसार भोगीं ॥ ४८ ॥

जो श्रुतिगौरवाचा मांडवी । कामुसृष्टिचा वेलु वाढवी ।  
जवं कर्मफलेंसीं पालवी । अपवर्गीं टेके ॥ ४९ ॥  
ऐसां नियतु कां कंदर्पु । जो भूतां एयां बीजरूपु ।  
तो मी ह्मणे बापु । योगियांचा ॥ ५० ॥  
हैं येकेक केती सांघावें । आतां वस्तुजात चि आघवें ।  
मज पासौनि जाणावें । विकरलें असे ॥ ५१ ॥

ये चैव सात्विका भावा राजसास्तामसाश्च ये ॥

मत्त एवेति तान्बिद्धि न त्वहं तेषु ते मयि ॥ १२ ॥

जे सात्विक हान भाव । कां रजतमादि सर्व ।  
ते ममरूपसंभव । ओलख तूं ॥ ५२ ॥  
हे जाले तरि माझां ठांड । परि येया माझि मी नाहीं ।  
जैसी स्वप्निचां डोहीं । जाग्रति न बुडे ॥ ५३ ॥  
ना तरि रसाची चि सुवट । जैसी बीजकणिका तरि घनवट ।  
परि तियेतव होये जें काष्ट । अंकुरद्वारे ॥ ५४ ॥  
मग तेया काष्टाचां ठांड । सांघ पां बीजपण आहे काहीं ।  
ह्मणौनि विज्ञानीं मीं नाहीं । जन्हीं हें माझे ॥ ५५ ॥  
पै गा गगनीं उपजे आभाल । परि तेथ गगन नाहिं केवल ।  
अथवा अभालीं होये सलील । तेथ अभ्र नाहिं ॥ ५६ ॥  
मग तेया उदकाचेनिचि आवेसें । जालें तेज जें लखलखीत दीसे ।  
तेयां विजू माझि काइ असे । सलील तें ॥ ५७ ॥  
सांघें अग्नीतव धूमु होये । तिण धूमीं काये अग्नि आहे ।  
तैसा विकार हा मी नोहें । जन्हीं विकरलां असें ॥ ५८ ॥

त्रिभिर्गुणमयैर्भावैरेभिः सर्वमिदं जगत् ।

मोहितं नाभिजानाति मामेभ्यः परमव्ययम् ॥ १३ ॥

परि उदकीं जाली बाबुली । उदकातें चि जैसी झांकोली ।  
कां वायांचिया आभालीं । आकाश लोपे ॥ ५९ ॥

हो गा स्वप्न हें लटकें नोहे । परि निद्रावशें जें बाणलें होये ।  
 तैं आठउ काइ देंत आहे । आपणपें ॥ ६० ॥  
 हें असो नेणों कैचें । जें डोलां चि पटल रचे ।  
 तेणें देखणेपण डोलेयांचें । न गीलजे काइ ॥ ६१ ॥  
 तैसी माझी चि हे बिंबली । गुणात्मक साउली ।  
 किं मज चि आड ठेली । जवनीक जैसी ॥ ६२ ॥  
 ह्मणौनि भूतें मातें नेणती । माझीं चि परि मीं नव्हति ।  
 जैसीं जला जलें न विरति । मुक्ताफलें ॥ ६३ ॥  
 पै पृथ्वीचा घट्टु कीजे । सर्वे चि पृथ्वीसि मिले जर मेलविजे ।  
 तो चि अग्निसंगें सिंविजे । तारि मांगल होये ॥ ६४ ॥  
 तैसें भूतजात सर्व । हे माझे चि कीर अवयव ।  
 परि मायायोगें जीव— । दशे आले ॥ ६५ ॥

दैवी ह्येषा गुणमयी मम माया दुरत्यया ॥

मामेव ये प्रपद्यन्ते मायामेतां तरन्ति ते ॥ १४ ॥

आतां महानदी हे माया । उतरौनियां धनंजया ।  
 मी होइजे हें आया । कैसेनि ये ॥ ६६ ॥  
 जिये ब्रह्माचलाचां आधाडां । पहिलेया संकल्पजलाचेया उभडा ।  
 सर्वे चि महाभूतांचा बुडडा । साना आला ॥ ६७ ॥  
 जे शृष्टिसंचाराचेनि ओघें । चढतकालकलांचेनि वेघें ।  
 प्रवृत्तिनिवृत्तिचीं तुंगें । तटें सांडी ॥ ६८ ॥  
 जे गुणघनाचेनि वृष्टिभरे । भरली मोहाचेनि महापूरें ।  
 घेउनि जांत नगरें । यमनियमांचीं ॥ ६९ ॥  
 जे द्वेषाचां आवर्त्ती दाटत । तेथ मत्सराचे हकरे पडत ।  
 माझि प्रमादादि तलपु अंत । माहामीन ॥ ७० ॥  
 जेथ प्रपंचाचीं वलणें । कर्मा अकर्माचीं ओभाणें ।  
 वरि तराति ओसाणें । सुखदुःखांचीं ॥ ७१ ॥

रतिचेया बेटा । आदलति कामाचिया लाटा ।  
 तेथ जीवफेन संघाटां । सीघ दीसे ॥ ७२ ॥  
 अहंकाराचिया चलियां । वरि मदत्रयाचिया उकलिया ।  
 जेथ विषयोर्मीचे कलिया । उल्लालु घेंति ॥ ७३ ॥  
 उदोअस्तूचे लोंढे । पाडित जन्ममृत्युचे चोंढे ।  
 जेथ पांचभौतिक बुडडे । होंत जांत ॥ ७४ ॥  
 संमोह—भ्रम—नासे । गीलित धैर्याचीं आविसें ।  
 जेथ देवढे भवंत वलसे । अज्ञानाचे ॥ ७५ ॥  
 भ्रांतिचेनि खडुलें । रेवले आस्थेचे अवगाले ।  
 रजोगुणाचेनि खलालें । स्वर्गु गाजे ॥ ७६ ॥  
 तमाचे धारसे काढ । सत्वाचें थीरपणें जाड ।  
 किंबहुना हे दुवाड । मायानदी ॥ ७७ ॥  
 पै पुनरावृत्तिचेनि उभडें । झलंबताति सत्यलोकिचे हुडे ।  
 घायें गडवडीत ढोंढे । ब्रह्मगोलकांचे ॥ ७८ ॥  
 ते पाण्यांचेन वहिलेपणें । आझू न धरिती चि ओभाणें ।  
 ऐसा मायापुरु हा कवणें । तारिजैल गा ॥ ७९ ॥  
 एक स्वयंबुद्धिचां बाहीं । रिगाले तेयांची शुद्धि नाही ।  
 एक जाणिवेचां डोहीं । गर्वें गीलिले ॥ ८० ॥  
 एकिं विद्येचिया सांगडी । घेतलिया अहंभावाचिया डौंडी ।  
 ते मदमीनाचां तोंडीं । सगले चि गेले ॥ ८१ ॥  
 एकिं वयसेचें जाड बांधलें । मग मन्मथाचिये कासे लागले ।  
 ते विषयमगरीं सांडिले । चघळनियां ॥ ८२ ॥  
 आतां वृद्धाप्याचेया तरंगा । माझि मतिभ्रमाचा जरंगा ।  
 तेणें कवलजताति पै गा । चहूंकडे ॥ ८३ ॥  
 आणि शोकाचां कडां उपटत । रोगाचां आवर्ती दाटत ।  
 आपदागिर्धि चुंबिजत । उधवलां ठाई ॥ ८४ ॥

मग दुःखाचेनि बरटेनि बोंबले । पाठिं मरणाचिया रेवा रेवले ।  
 ऐसे कामाचिये कासे लागले । गेले वायां ॥ ८५ ॥  
 एकें यजनक्रियेचीं पेटिं । घातलीं बांधौनि पोटीं ।  
 ते स्वर्गमुखाचां कपाटीं । भरौनि ठेले ॥ ८६ ॥  
 एकें मोक्षि लागावेयाचिया आशा । केला कर्मबाह्याचा भर्वसा ।  
 परि ते पडिले गां करूनि वळसां । विधिबोधाचा ॥ ८७ ॥  
 जेथ वैराग्याची नाव न रिगे । विवेकाचा तागा न लगे ।  
 वरि काहिं काहिं तरो ये योगें । परि विपायें तो ॥ ८८ ॥  
 ऐसें जीवाचिये आंगवणे । इये मायानदीचें उतरणें ।  
 हें काइसेयासारखें बोलणें । ह्मणावें पां ॥ ८९ ॥  
 जरि अपध्याशीला व्याधी । कले साधूं दुर्जनाची बुद्धि ।  
 कां रागी सांडी रिद्धि । आली सांती ॥ ९० ॥  
 जरि चोरा सभा दाटे । अथवा मीना गळु घोंटे ।  
 ना तरि भेडा उल्लाटे । विंसी जारि ॥ ९१ ॥  
 पाडसा वागूर करांडी । जरि मुंगी मेरु उळांडी ।  
 तरि मोहाचि पैली थडी । देखति जीव ॥ ९२ ॥  
 ह्मणौनि गा पांडुमुखा । जैसी सकामा न जिणवे चि वनिता ।  
 तैसी मायामय हे सरिता । न टके जीवां ॥ ९३ ॥  
 एथ एक चि लीला तरले । जिहिं भजौनि मातें वरिलें ।  
 तेया ऐली चि थडिये सरलें । मायाजळ ॥ ९४ ॥  
 जे अहंभावाचें ओझें सांडुनि । विकरांचिया झुलुआ चूकौनि ।  
 अनुरागाचा नीरुताउनि । पाणिढालु ॥ ९५ ॥  
 जेया ऐक्याचिये उतारां । बोधाचा जोडला तारा ।  
 मग निवृत्तिचेया पैलातीरा । झेंपावले जे ॥ ९६ ॥  
 जेयां सद्गुरू तारू पुढें । जे अनुभवाचिये कासे गाढे ।  
 जेयां आत्मनिवेदन तराडें । आकलले ॥ ९७ ॥

ते उपरतिचां वाविं सेळत । सोहंभावाचेनि धावें पेलत ।  
मग निगाले अनकलित । निवृत्तितटीं ॥ ९८ ॥  
एणें उपायें मज भजले । ते हे माझी माया तरले ।  
परि ऐसे भक्त विपाडले । बहुवस नाहिं ॥ ९९ ॥

न मां दुष्कृतिनो मूढाः प्रपद्यन्ते नराधमाः ॥

माययापहतज्ञाना आसुरं भावमाश्रिताः ॥ १५ ॥

जें बहुतां एकां आवांतरु । अहंकाराचा भूतसंचारु ।  
जाळा ह्मणौनि विसरु । आपणपां तेयां ॥ १०० ॥  
तेव्हां नियमाचें वस्त्र नाठवे । पुढेली अधोगतिची लाज नेणवे ।  
आणि करिताति जें न करावें । वेदु ह्मणे ॥ १ ॥  
पाहे पां शरीराचेया गावां । जेयालागि आले पांडवा ।  
तो कार्यार्थु आधवा । सांडूनियां ॥ २ ॥  
इंद्रियांचां राजवीदीं । अहंमतिचां जल्पवादिं ।  
विकारांतराची मांदी । मेलविताति ॥ ३ ॥  
आणि दुःखशोकाचां घांड । मारिलेयाची सें चि नाहिं ।  
हें सांघावेया कारण काड । प्रसिले माया ॥ ४ ॥

चतुर्विधा भजन्ते मां जनाः सुकृतिनोऽर्जुन ।

आर्तो जिज्ञासुरर्थार्थी ज्ञानी च भरतर्षभ ॥ १६ ॥

ह्मणौनि मातें चूकले । ऐसां चतुर्विध मज भजले ।  
जिहिं आत्महिता केलें । वाढतें गा ॥ ५ ॥  
तो पहिला आर्तु ह्मणजे । दुसरा जिज्ञासु बोलिजे ।  
तीजा अर्थार्थी जाणजे । ज्ञानियां चौथा ॥ ६ ॥  
तेथ आर्तु तो आर्तिचेन व्याजें ।  
जिज्ञासु तो जाणावेया चि लागि भजे ।  
तीजेनि तेणें अर्थिजे ।  
अर्थसिद्धी ॥ ७ ॥

तेषां ज्ञानी नित्ययुक्त एकभक्तिर्विशिष्यते ।

प्रियो हि ज्ञानिनोऽत्यर्थमहं स च मम प्रियः ॥ १७ ॥

मग चौथेयाचां ठाई । काहिं चि करणें नाहीं ।

झणौनि भक्तु येकु पाई । ज्ञानियां जो ॥ ८ ॥

जे तेया ज्ञानाचेनि प्रकाशें । फीटलें भेदांचें कडवसें ।

मग मी चि जाळा समरसें । आणि भक्तु तेविं चि ॥ ९ ॥

परि आणिकाचिये दीठी नावेक । जैसा फटिकु चि आवडे उदक ।

तैसा ज्ञानी नव्हे कवतीक । सांगतां तें ॥ ११० ॥

जैसा वारा कां गगनीं वीरे । मग वारेपण वेगलें नुरे ।

तेवि भक्तु हे पैज न सरे । जरि ऐक्या आला ॥ ११ ॥

परि पवनु हालौनि पाहिजे । तारि गगना हिं वेगला देखिजे ।

एन्हविं गगन तो हें साहाजें । असे जैसें ॥ १२ ॥

तैसैं शरीरें हान कमें । तो भजतसे ऐसा गमे ।

परि आंतरें प्रतीतिवमें । मी चि जाळां ॥ १३ ॥

आणि ज्ञानाचेनि उजियडलेपणें । मी आत्मा ऐसैं तो जाणे ।

झणौनि मी हीं तैसैं चि झणें । उचंबळला सांता ॥ १४ ॥

हां गा जीवापलीकडिली भूगे । जां पावौनि वावरों हीं जाणे ।

तो देहाचेनि वेगलेपणें । काड वेगला होये ॥ १५ ॥

उदाराः सर्व एवैते ज्ञानीत्वात्मैव मे मतम् ।

आस्थितः स हि युक्तात्मा मामेवानुत्तमां गतिम् ॥ १८ ॥

झणौनि आपुललेया हिताचेनि लोभें ।

मज आवडे तो ही भगतु झोंबे ।

परि मीं चि करीं बालभें ।

ऐसा ज्ञानियां येकु ॥ १६ ॥

पाहे पां दुभतेयाचिया आशा । जग चि धेनू करित आहे फांसा ।

परि दोरेंविण कैसा । बत्साचा बली ॥ १७ ॥



कां जें तनुमनुप्राणें । तें आणिक कांहीं चि नेणे ।  
 देखे तेयातें ह्मणे । हे माये चि कीं ॥ १८ ॥  
 तें एणें मानें अनन्यगति । ह्मणौनि धेनू हीं तैसी चि प्रीति ।  
 एयालागि लक्ष्मीपति । बोलिले साच ॥ १९ ॥  
 हें असो मग ह्मणितलें । जे कां गा तुज सांधितले ।  
 तेही भक्त भले । पढियंति आह्वां ॥ १२० ॥  
 परि जाणौनियां मातें । जो पाहों विसरला माघौतें ।  
 जैसैं सागरा एउनि सरिते । मुरुडावें ठेलें ॥ २१ ॥  
 तैसी अंतःकरणकुहरीं उपनली । जेयाची प्रतीतिगंगा मज मीनली ।  
 तो मीं हे काइ बोली । फार करूं ॥ २२ ॥  
 तारि ज्ञानियां जो ह्मणिजे । तो चैतन्य नि केवल माझें ।  
 हें न ह्मणावें परि काइ कीजे । न बोलों नैये ॥ २३ ॥  
 जें तो विषयांचिये मांड झाडी । माझि कामक्रोधाची पाझडी ।  
 चूकौनि आला पाडी । सद्वासनेचिये ॥ २४ ॥  
 मग साधुसंगें सूभटा । उजू सत्क्रियेचिया वाटा ।  
 अप्रवृत्तिचा अब्हांटा । डावा केलो ॥ २५ ॥

बहूनां जन्मनामन्ते ज्ञानवान्मां प्रपद्यते ॥

वासुदेवः सर्वमिति स महात्मा सुदुर्लभः ॥ १९ ॥

आणि जन्मशताचां वाहातवणां ।  
 तेविं चि आशेचिया न लें चि वाहाणां ।  
 तेथ फलहेतुचा उगाणां ।  
 कवण चाली ॥ २६ ॥  
 ऐसा शरीरसंयोगाचिये राती । माझि धावंत सडिया आडती ।  
 तक् कर्मक्षयाची पाहांती । सोये जाली ॥ २७ ॥  
 तैसी चि गुरुह्मण उखा उजळली । मग ज्ञानाची ओतपली पडिली  
 तेथ साम्याची रिद्धि उपनली । तेयाचिये दृष्टी ॥ २८ ॥

तेव्हलि जियाकडे वांस पाहे । तेउता मीं चि येकु तेया आहे ।  
 अथवा निवांतु जन्हीं राहे । तन्हीं मीं चि आधि ॥ २९ ॥  
 हें असो आणिक काहीं । तेया सर्वत्र मीवांचूनि नाहीं ।  
 जैसें सबाह्य जल डोहीं । बुडालेया घटा ॥ १३० ॥  
 तैसा तो मज भीतरि । मी तेया आंतु बाहिरि ।  
 हें सांधिजे बोलवारि । तैसें नोहे ॥ ३१ ॥  
 ह्मणौनि असो हें इयापरीं । तो देखे ज्ञानाची वाखारी ।  
 तेणें सवतारेनि करी । आपु विश्व ॥ ३२ ॥  
 हें समस्त ही श्रीवामुदेउ ॥ ऐसेया प्रतीतिरसाचा उते भाउ ॥  
 ह्मणौनि भक्तांमाझि राओ । ज्ञानियां तो ॥ ३३ ॥  
 जेयाचिये प्रतीतीचां वाखोरां । पवाडु होये चराचरां ।  
 तो महात्मा धनुर्धरा । दुर्लभु अति ॥ ३४ ॥

कामैस्तैस्तैर्हृतज्ञानाः प्रपद्यंतेऽन्यदेवताः ।

तं तं नियममास्थाय प्रकृत्या नियता स्वया ॥ २० ॥

येर बहू जोडति किरीटी । जेयांचीं भजनें भोगासाठीं ।  
 जे आशातिमिरें दीठी । मंद झाले ॥ ३५ ॥  
 आणि फलाचिया हांवां । हृदयीं कामा जाला रिगावां ।  
 कीं तेयाचिया घसणी दीवा । ज्ञानाचा गेला ॥ ३६ ॥  
 ऐसें उभयथा आंधारें पडिलें । ह्मणौनि पार्सि चि मातें चूकले ।  
 मग सर्वभावे अनुसरले । देवतांतरां ॥ ३७ ॥  
 आदिंचे प्रकृतिचे पाइक । वारि भोगालागौनि त्रुवं रंक ।  
 मग तेणें लैल्यें कवतीक । कैसें भजतें ॥ ३८ ॥  
 कवणी तिया नियमबुद्धी । कैसिया हान उपचारसमृद्धी ।  
 कां अर्पण यथाविधी । विहित करणें ॥ ३९ ॥

यो यो यां यां तनुं भक्तः श्रद्धयाञ्जितुमिच्छति ।

तस्य तस्याचलां श्रद्धां तामेव विदधाम्यहम् ॥ २१ ॥

पैं जो जो जिये जिये देवतांतरीं । भजवेया चाड धरी ।  
तेयाते ते चाड पूरी । पुरविता मीं ॥ १४० ॥  
मग तिया श्रद्धायुक्त । तेथिचें आराधन जें उचित ।  
तें सिद्धिवेर्ही समस्त । वत्तों लागे ॥ ४१ ॥

स तथा श्रद्धया युक्तस्तस्याराधनमीहते ॥

लभते च ततः कामान्मयैव विहितान्हितान् ॥ २२ ॥

ऐसें जेणें जें भाविजे । तें फल तेणें पाविजे ।  
परि तें हीं सकल निफजे । मज चि तव ॥ ४२ ॥  
परि ते भक्त मातें नेणति । जे कल्पने बाहिरे न निगति ।  
म्हणौनि कल्पित फल पावति । अंतवंत ॥ ४३ ॥

अंतवत्तु फलं तेषां तद्भवत्यल्पमेधसाम् ।

देवान्देवयजो यांति मद्भक्ता यांति मामपि ॥ २३ ॥

किंवहुना ऐसें भजन । तें संसाराचें चि साधन ।  
येरु फलभोगु तें स्वप्न । नांवभरि दीसे ॥ ४४ ॥  
हें असो पन्हौतें । पाठिं हो कां आवडतें ।  
परि यजी जो देवतांतें । तो देवत्वासि ये ॥ ४५ ॥  
येर तनुमनुप्राणीं । जे निरंतर माक्षिया चि बाहाणी ।  
ते देहाचां निर्वाणीं । मीं चि होंति ॥ ४६ ॥  
परि तैसें न करीति प्राणिये । वायां आपुलां चि सुखिं वाणिये ।  
पन्हंताति पाणियें । तल्हातिचेनि ॥ ४७ ॥  
नाना अमृताचां सागरीं बुडिजे । मग तांडाभि काइ वज्र पाडिजे ।  
आणि मनीं तरि आठविजे । थीलरातें ॥ ४८ ॥  
हें ऐसें काइसेया करावें । जें अमृति हिं रिगौनि मरावें ।  
सुखें अमृत होउनि कां नसावें । अमृतामाक्षि ॥ ४९ ॥  
तैसा फडहेनुचा पांजरा । सांडूनियां धनुर्दरा ।  
कां प्रतीतिपाखिं अंबरा । गोसाविंयां नोहावें ॥ १५० ॥

अव्यक्तं व्यक्तिमापन्न मन्यन्ते मामबुद्धयः ।

परं भावमजानन्तो ममाव्ययमनुत्तमम् ॥ २४ ॥

जेथ उंचावते न पवाडें । मुखाचा पैसारु जोडे ।

आपुलेनि मुरवाडें । उडों ये ऐसा ॥ ५१ ॥

तेया उमपा माप कां सुआवें । मज अव्यक्तातें व्यक्ता कां मानावें ।

सिद्ध असतां कां निमावें । साधनवरि ॥ ५२ ॥

नाहं प्रकाशः सर्वस्य योगमायासमावृतः ।

मूढोऽयं नाभिजानाति लोको मामजमव्ययम् ॥ २५ ॥

परि हा बोलु आघवा । जरि विचारिजत असे पांडवा ।

तरि विशेष एयां जीवां । नलगे किर ॥ ५३ ॥

कां जें योगमायापटलें । हे जाले आधि आंधले ।

क्षणौनि प्रकाशाचेन हीं दिहबलें । न देखती चि मातें ॥ ५४ ॥

यन्हविं मीं नव्हे ऐसें । कांहीं वस्तुजात असे ।

पाहे पां कवण जल रसें । रहित आहे ॥ ५५ ॥

पवनु कवणातें न सिवै चि । आकाश कें न समाये चि ।

हें असो येकु मीं चि । विश्वि असें ॥ ५६ ॥

वेदाहं समतीतानि वर्तमानानि चार्जुन ।

भविष्याणि च भूतानि मां तु वेद न कश्चन ॥ २६ ॥

एथ भूतें जियें अत्यंतलिं । तियें मीं चि होउनि ठेलीं ।

आणि वर्ततें आधि जालीं । तें हीं मीं चि ॥ ५७ ॥

कां भविष्यमाणें ज्ये हीं । तें हिं मज वेगलीं नाहीं ।

हा बोलु चि यन्हविं कांहीं । होये ना जाए ॥ ५८ ॥

ऐसा मीं पांडुमुता । अनस्यूतु सदा असता ।

एयां संसारु जो भूतां । तो आनें बोलों ॥ ५९ ॥

इच्छाद्वेषसमुत्थेन द्वंद्वमेहेन भारत ।

सर्वभूतानि संमोहं सर्गे यांति परंतप ॥ २७ ॥

तरि तेही आतां थोडी ऐसी । गोठि सांघिजैल परियसैं ।  
 जैं अहंकारा तनूसीं । बालभ पडिलें ॥ १६० ॥  
 तैं इछा हे कुमारी जाली । मग ते कामाचेया तारुण्या आली ।  
 तेथ द्वेषेसीं मांडिली । कुलवाडि तिये ॥ ६१ ॥  
 तेयां दोघां तव जन्मला । ऐसा द्वंदमोहो पडिला ।  
 मग तो आजेंन वाढविला । अहंकारें ॥ ६२ ॥  
 तो धृतिसीं सदा प्रतिकूल । नियमा हीं ना गवे मूल ।  
 आशारसैं दोंदिल । जाला सांता ॥ ६३ ॥  
 असंतुष्टिचिया मदिरा । मत्तु होउनि धनुर्दरा ।  
 विषयाचां वोवरा । विकृतिसिं असे ॥ ६४ ॥  
 तेणें भावशुद्धिचिये वाटे । विखुरिले विकल्पाचे कांटे ।  
 मग चीरिले अव्हांटे । अप्रवृत्तिचे ॥ ६५ ॥  
 तिहिं भूतें भांभावलिं । क्षणौनि संसाराचेया अडवींमाझि पडिलीं ।  
 मग जेथ महादुःखाचे घेतलीं । दांडेवरि ॥ ६६ ॥

येषां त्वंतर्गतं पापं जनानां पुण्यकर्मणाम् ।

ते ब्रह्ममोहविनिर्मुक्ता भजंते मां दृढव्रताः ॥ २८ ॥

ऐसां विकल्पांचें वायाणें । कांटे देखौनि ससाणे ।  
 जे मतिभ्रमाचे पासवणे । घेंति चि ना ॥ ६७ ॥  
 उजू एकनिष्ठतेचां पाडलीं । रगडूनि विकल्पाचिया भाली ।  
 पातकांची सांडिली । अटवी जीही ॥ ६८ ॥  
 मग पुण्यचें धांव घेतलें । आणि माझी जवलीक पातले ।  
 किंबहुना ते चूकले । वाटवधेया ॥ ६९ ॥

जरामरणमोक्षाय मामाश्रित्य यतन्ति ये ।

ते ब्रह्म तद्विदुः कृत्स्नमध्यात्मं कर्म चाखिलम् ॥ २९ ॥

यन्हविं तन्हि पार्था । जरामरणाची नीमे कथा ।  
 ऐसेया प्रयत्नातें आस्था । विये जेयांची ॥ २७० ॥  
 तेयां तो प्रयत्नू चि येकें वेळें । मग समग्रें परब्रह्म फळें ।  
 जेया पीकलेया रसु गले । पूर्णतेचा ॥ ७१ ॥  
 तेव्हलि कृतकृत्यें जग भरे । तेथ अध्यात्माचें नवलपण पूरे ।  
 कर्माचें काम सरे । वीरे मन ॥ ७२ ॥  
 ऐसा आत्मलाभु तेयां । होये गा घनंजया ।  
 भांडवल जेया । उद्यमीं मी ॥ ७३ ॥  
 तेयांतें साम्याचिया वाढी । मग ऐक्याची चि सांधे कुलवाडि ।  
 तेथ भेदाचीं सांकडीं । नेणिजति ॥ ७४ ॥

साधिभूताधिदैवं मां साधियन्नं च ये विदुः ॥  
 प्रयाणकालेऽपि च मां ते विदुर्भुक्तचेतसः ॥ ३० ॥

जिहिं साधिभूतां मातें । प्रतीतीचेनि हातें ।  
 धरुनि अविदैवतें । सीतळे गा ॥ ७५ ॥  
 जेयां जाणिवेचिये उभें । मीं अधिपन्न रिगें ।  
 ते तनुचेनि हिं वियोगें । विरहिणे नव्हति ॥ ७६ ॥  
 एन्हविं आयुष्याचें सूत्र विप्रडतां । भूतांचीं उमेठें षडाडितां ।  
 काइ न मरतेया ही चिता । युगांत नोहे ॥ ७७ ॥  
 परि नेगें कैसें पै गा । जे दडउनि गेळे माझेया आंगा ।  
 ते प्रयाणिचिया ही लगवगा । न संडीति मातें ॥ ७८ ॥  
 यन्हविं तन्हीं जाण । ऐसे जे निषण्ण ।  
 ते चि अंतःकरण— । युक्त योगी ॥ ७९ ॥  
 तव इये शब्दकूपिकेतलि । नोडये चि अवधानांची आजुली ।  
 जें अर्जुनु नावेक तेव्हली । मागां चि आहे ॥ १८० ॥

जेथ तद्गुहादिवाक्यफलें । जियें नानार्थसरसालें ।  
 बाहाकातें आहाति परिमलें । भावांचेनि ॥ ८१ ॥  
 सहजकृपामंदानीलें । कृष्णद्रुमु डोलति तिये वेलें ।  
 अर्जुनु श्रवणाचिये खोले । अवसात पडिलीं ॥ ८२ ॥  
 तिये प्रमेयाचीं चि हों काज वलिलीं ।  
 किं रसाचां सागरीं चुबुकुलिलीं ।  
 मग तैसां चि कां घोलिलीं ।  
 परमानंदें ॥ ८३ ॥  
 तेणें वरवेपणें निर्मलें । अर्जुनोन्मेषाचे डोले ।  
 घेंताति गलाले । विस्मयामृताचे ॥ ८४ ॥  
 तिया सुखसंपत्ती जोडलिया । मन स्वर्गा वांत वाकुलिया ।  
 हृदयाचां जीवीं गुतकुलिया । होंती आथि ॥ ८५ ॥  
 ऐसें वरचिलि चि बरवा । मुख जावों लागे फावा ।  
 तवें रसास्वादाचिया हावा । लाहा केला ॥ ८६ ॥  
 झाकारि अनुमानाचेनि करतलें । घेउनि तियें वाक्यफलें ।  
 प्रतीतिमुखि एके वेलें । घाळूं पाहिलीं ॥ ८७ ॥  
 तवें विचाराचिया रसना न दटति ।  
 परि हेतुचां दशनी ही न फुटति ।  
 ऐसें जाणौनि सुभद्रापति ।  
 चुंबी चि ना ॥ ८८ ॥  
 मग चमत्करला ह्मणे । इयें जलित्ति मा तारागणें ।  
 कैसा झांषकळें आसलगणें । अक्षरांचेनि ॥ ८९ ॥  
 इयें पदें नव्हति फुडिया । गगनाचिया चि मां घडिया ।  
 एथ आमचिये मती बुडिया । थाउं न निगे ॥ ९० ॥

बांचूनि जाणावेयाचियाकें गोठी । ऐसैं जीवीं चि कळूनि किरीटी  
 तियें पुनरपि केळीं दीठी । यादवेंद्रा ॥ ९१ ॥  
 मग विनविलें सूमटें । हां हो जी इयें एकावटें ।  
 साज ही पदें अगुसुटे । नवलें असति ॥ ९२ ॥  
 एन्हविं अवधानाचेनि वहिलेपणें । नाना प्रमेयांचे उगाणे ।  
 काइ श्रवणाचेनि आंगणें । बोलों लाहांति ॥ ९३ ॥  
 पारि तैसैं नव्हे हें देवा । देखिळा अखरांचा चि मेलवा ।  
 आणि विस्मयाचेया ही जीवा । विस्मयो जाला ॥ ९४ ॥  
 कानाचेनि गवाक्षद्वारें । बोळाचें रसिमा आधनरें ।  
 पडेना तवें चमत्कारें । अवधान ठकलें ॥ ९५ ॥  
 तेविं चि मज आर्त्ता अर्थाची चाड आहे । तेया सांगतां हीं वेलु न साहे ।  
 ह्मणौनि निरूपण लवलाहें । कीजो देवा ॥ ९६ ॥  
 ऐसा मागीलु पडिताला घेउनि । पुढां अभिप्राया दीठि सूनि ।  
 तेविं चि माझी सूनि । आर्त्ति आपुली ॥ ९७ ॥  
 कैसी पूसती पांहे जाणिव । भीडेची तरि लंघो नेंदी सीव ।  
 एन्हविं कृष्णहृदयासि खेव । देऊं सरलें ॥ ९८ ॥  
 आगा गुरुतें जें पूसावें । तें एगें मानें सावधान होआवें ।  
 हें एकु जाणें आघवें । सव्यसार्ची ॥ ९९ ॥  
 आतां तेराचें तें प्रभु करणें । वरि सर्वज्ञा श्रीहरिचें बोलणें ।  
 हें संजयो आवडलेपणें । सांगेल कैसें ॥ २०० ॥  
 तिये गा अवधान देयां गोठां । बोलिजेल नीट मन्हाटी ।  
 जैसी काना आदिं दोठि । उगेगा जाये ॥ १ ॥  
 बुद्धिचिया जांभा । बोलाचा न चखतां गाभा ।  
 आखरांचिया चि भांभा । इंद्रियें जीति ॥ २ ॥  
 पाहा पां मालतींचे कले । प्राणासि वांटले कीर परिमलें ।  
 पारि वरिचिली बरवा काइ डोले । श्रावली नोहोंति ॥ ३ ॥



तैसैं देशिचिया हवावा । इंद्रियें करिति राणिवा ।  
मग प्रमेयांचिया गावां । लेसां जाइजो ॥ ४ ॥  
ऐसेनि नागरपणें । बोलु निभे तें बोलणें ।  
आइका ज्ञानदेओ हणें । निवृत्तिचा ॥ ५ ॥

अंतत्सदिति श्रीमद्भगवद्गीतासूपनिषत्सु ब्रह्मविद्यायां  
योगशास्त्रे श्रीकृष्णार्जुनसंवादे परमहंसयोगो नाम  
सप्तमोऽध्यायः ॥

॥ श्रीकृष्णार्पणमस्तु ॥



# ज्ञानेश्वरी

## अध्याय आठवा

श्रीकृष्णाय नमः ॥

अर्जुन उवाच ।

किं तद्ब्रह्म किमध्यात्मं किं कर्म पुरुषोत्तम ।

अधिभूतं च किं प्रोक्तमधिदैवं किमुच्यते ॥ १ ॥

मग अर्जुने ह्यणितलें । अहो जी अवधारिलें ।

जें मियां पूसिलें । तें निरोपिजो ॥ १ ॥

सांघां कवण तें ब्रह्म । काइसेया नावं कर्म ।

अथवा अध्यात्म । काइ ह्यणिपे ॥ २ ॥

अधिभूत तें कैसें । एथ अधिदैव कवण असे ।

हें उघड मीं परियसें । तैसें बोलां ॥ ३ ॥

आधियज्ञः कथं कोऽत्र देहेऽस्मिन्मधुसूदन ।

प्रयाणकाले च कथं ज्ञेयोऽसि नियतात्मभिः ॥ ४ ॥

देवा अधियज्ञ तो काइ । कवणु पां इये देहीं ।

हें अनुमानासि काहीं । दीठि न भरे ॥ ४ ॥

आणि जी नियता अंतष्करणीं । तू जाणिजसि प्रबाणीं ।

तें कैसें शार्ङ्गपाणी । परिसवां मातें ॥ ५ ॥

देखां धवलारीं चिंतामणिचां । जरि पवडला होये दैवांचा ।  
 ओसणतां हीं बीळु तेयाचा । परि सोपु न वचे ॥ ६ ॥  
 तैसें अर्जुनाचेया शब्दा चि सवें । आलें तें चि ह्यणितलें देवें ।  
 पार्था परियसैं गा बरवें । पूसिलें तुवां ॥ ७ ॥  
 किरीटीकामधेनूचा पाडा । वारि कल्पतरूचा आहे आंदोडा ।  
 ह्यणौनि मनोसिद्धिचेया षडा । तो नवलु नोहे ॥ ८ ॥  
 जें कृष्णाचेयां होयजे आपण । कृष्णु होये आपुलें अंतष्करण ।  
 तें संकल्पाचें आंगण । उल्लासति सिद्धी ॥ ९ ॥  
 तरि ऐसें जें प्रेम । तें अर्जुनीं चि आधि निःसीम ।  
 ह्यणौनि तेयाचें काम । सदाफल ॥ १० ॥  
 एया कारणें अनंतें । मनोगत तेयाचें पूसतें ।  
 होईल जाणौनि आइतें । ओगळुनि ठेविलें ॥ ११ ॥  
 जें अपत्य धानौनि निगे । तेयाची भूक ते मायेसी चि लागे ।  
 वांचूनि शब्दे काइ सांघे । मग स्तन्य दे एरि ॥ १२ ॥  
 ह्यणौनि कृपालुवा गुरुचां ठाई । हें नवलु नोहे काहीं ।  
 परि तें असो आइकां काई । बोलता जाला ॥ १३ ॥

श्रीभगवानुवाच ॥

अक्षरं ब्रह्म परमं स्वभावोऽध्यात्ममुच्यते ।

भूतभावोद्भवकरो विसर्गः कर्मसंश्रितः ॥ ३ ॥

मग ह्यणितलें सर्वेश्वरें । जें आकारिं इये खोंकरे ।  
 कोंदलें असति न सिरे । कव्हणी कालीं ॥ १४ ॥  
 एन्हविं सपूरपण तेयाचें पावें । तरि शून्य चि नव्हे तें स्वभावें ।  
 वारि गगनाचेनि फ़ालवें । गालुनि घेतलें ॥ १५ ॥  
 जें ऐसें हीं परि विरुलें । इये विज्ञानाचिये खोले ।  
 हालवले हीं न गळें । तें परब्रह्म ॥ १६ ॥

आणि आकाराचेनि जालेपणें । जन्मकर्मते नेणें ।  
 आकारलोपीं नीमणें । नाहीं काहीं ॥ १७ ॥  
 ऐसी आपुलियाचि सहजस्थिती । जेतया ब्रह्माची नित्यता असती ।  
 तेया नावं सुभद्रापती । अध्यात्म गा ॥ १८ ॥  
 मग गगनीं जेवि निर्मले । नेणों कैचीं येकें वेळें ।  
 उठीति घनपटले । नानावर्णें ॥ १९ ॥  
 तौसैं अमूर्ती तियें विशुद्धें । महदादिभूतभेदें ।  
 ब्रह्माडाचे बांधे । हों चि लागति ॥ २० ॥  
 पै निर्विकल्पाचिये बरडी । किं फूट आदिसंकल्पाची विरुढि ।  
 आणि ते सर्वे चि मोडौनि ये ढोंढी । ब्रह्मगोलकांचां ॥ २१ ॥  
 तेयां एकेकाचा भीतर पाहिजे । तव बीजां चि भरला देखिजे ।  
 माझि होंतेयांजातेयां नेणिजे । लेख जीवां ॥ २२ ॥  
 मग तेयां गोलकांचे अंशांश । प्रसवति आदिसंकल्प असम साहास ।  
 हें असो ऐसी बहुवस । श्रुष्टि वाढे ॥ २३ ॥  
 परि दूजेन विण एकलां । परब्रह्मीं चि सांचलां ।  
 अनेकत्वाचा आला । पूरु जैसा ॥ २४ ॥  
 तैसें समविषमत्वे नेणों कैचें । वायां चि चराचरपण एक रचे ।  
 पातां प्रसवतियां योनीचे । लक्ष ही दीसति ॥ २५ ॥  
 एरी जीवभावांचिये पालविये । काहिं मर्यादा चि करुं नैये ।  
 पाहिजे कवण हें आघवें चि विये । तरि मूळ तें शून्य ॥ २६ ॥  
 क्षणौनि करिता मुदलु न दिसे । आणि शेयीं कारण हीं काहीं नसे ।  
 माझि कार्य चि आपैसैं । वाढों लागे ॥ २७ ॥  
 ऐसा करितेन विण अगोचरु । अव्यक्तीं हा आकार ।  
 निफजवी जो व्यापारु । तेया नावं कर्म ॥ २८ ॥

अधिभूतं क्षरो भावः पुरुषश्चाधिदैवतम् ।

अधियक्षोऽहमेवात्र देहे देहभूतां वर ॥ ४ ॥

आतां अधिभूत जें ह्मणिये । तें हीं सांघों संक्षेपें ।  
 तरि होय आणि हारये । अभ्र जैसें ॥ २९ ॥  
 तैसें असतेपण आहाच । जेया नाहिं होइजे हें साच ।  
 जेयातें रूपा आणीति पांच पांच । मिलौनियां ॥ ३० ॥  
 भूतांतें अधिकरूनि असें । आणि भूतसंयोगें तरि दीसे ।  
 जें वियोगावेगलें भ्रंशे । नामरूपादिक ॥ ३१ ॥  
 तेयातें अधिभूत ह्मणजे । मग अधिदैव पुरुष जाणजे ।  
 जेणें प्रकृतिचें भोगिजे । उपार्जलें ॥ ३२ ॥  
 जो चेतनाचा चक्षु । इंद्रियदेशिचा अध्यक्षु ।  
 जो देहास्तैमानी वृक्षु । संकल्पविहंगा ॥ ३३ ॥  
 जो परमात्मा चि परि दूसरा । जो अहंकारनिद्रा निदसुरा ।  
 ह्मणौनि स्वप्निचिया अखरा । संतोषें सीणे ॥ ३४ ॥  
 जीउ येणें नावें । जेयातें आलविजे स्वभावें ।  
 तें अधिदैव जाणावें । पंचायतनिचें ॥ ३५ ॥  
 आतां इये शरीरग्रामी । जो शरीरभावांतें उपशमी ।  
 तो अधियज्ञु गा मी । पांडुकुमरा ॥ ३६ ॥  
 एर अधिदैवाधिभूत । तें हीं मीं चि कीर समस्त ।  
 परि पन्हें कीडासि मिलत । काइ सकें नव्हे ॥ ३७ ॥  
 तन्हीं तें पन्हरेपण न मैले । आणि कीडाचिया अंशा ही मिळे ।  
 परि असे जव तें याचेनि मेलें । तव सकें चि ह्मणजे ॥ ३८ ॥  
 तैसें अधिभूतादि आघवें । हें अविद्येचेनि पालवें ।  
 झांकलें तव मानवें । वेगलें ऐसें ॥ ३९ ॥  
 ते चि अविद्येची जवनीक फीटे ।  
 आणि भेदभावाची अवधि तूटे ।  
 मग ह्मणों जारि येक होउनि आटे ।  
 तरि दोनि काय होति ॥ ४० ॥

पै केशाचां गुंडालां । वरि ठेविली स्फटिकाची शीला ।  
 ते वरि पाहिली डोलां । तवं भेदली गमेली ॥ ४१ ॥  
 पाठि केश परीते नेले । आणि भेदलेपण काय नेणों जालें ।  
 तारि डांक देउनि सांधिलें । शिलेतें कांइ ॥ ४२ ॥  
 ना ते एकखंड चि आइती । परि संगें भिन्न गमली होती ।  
 तो चि नेलेया माघौती । जैसी का तैसी ॥ ४३ ॥  
 तेविं चि अहंभाओ हा जाये । तारि ऐक्य तें आदिं चि आहे ।  
 हें चि सार्चें जेथ होये । तें अधियज्ञु मीं ॥ ४४ ॥  
 पै गा आह्मी तुज । सकल यज्ञ कर्मज ।  
 सांगितलें कां जें काज । मनीं धरुनि ॥ ४५ ॥  
 तो हा क्रियाजाताचा विसांवां । नैष्कर्म्यमुखाचा ठेवा ।  
 परि उघड करुनि पांडवा । दाविजतसे ॥ ४६ ॥  
 पहिलें वैराग्यइंधनपरिपूर्ती । इंद्रियानलीं प्रदीप्ती ।  
 विषयद्रव्याचिया आहुती । देउनियां ॥ ४७ ॥  
 मग वज्रासन ते उर्वी । शोधूनि आधारीं मुद्रा बरवी ।  
 वेदी रचे मांडवीं । शरीराचां ॥ ४८ ॥  
 तेथ संयमाग्नीचीं कुंडें । इंद्रियद्रव्याचेनि पवाडें ।  
 पूजिजति उड्डें । युक्तिवोपें ॥ ४९ ॥  
 मग मनप्राण आणि संयमु । हा चि हवनसंपदेचा संभ्रमु ।  
 तेणें तोषविजे निर्द्धूमू । ज्ञानानद्ध ॥ ५० ॥  
 ऐसेनि सकल हें ज्ञानिं अर्पें । मग ज्ञान तें ज्ञेयीं हारपें ।  
 पाठि ज्ञेयाचीं स्वरूपें । निखल उरें ॥ ५१ ॥  
 तिया नावं गा अधियज्ञु । ऐसें बोलिला जवं सर्वज्ञु ।  
 तवं अर्जुनु अतिप्राज्ञु । तेया पातलें तें ॥ ५२ ॥  
 हें जाणौनि ह्मणितलें देवें । परिहसतु आहासि बरवें ।  
 एया कृष्णाचेया संतोषासर्वें । परु मुखाचा जाला ॥ ५३ ॥

देखा बोलाचिया धणी धाडजे । कां शिष्याचेनि जालेपणें होइजे ।  
 हे सद्गुरू चि एकलेनि जाणिजे । कां प्रसवतिया ॥ ५४ ॥  
 ह्मणौनि सात्विकां भावांची मांदी । कृष्णा आंगिचीं अर्जुना आदि ।  
 न समातसे परि बुद्धी । संवरुनि देवें ॥ ५५ ॥  
 मग पीकलेया मुखाचा परिमल । कां निवालेया अमृताचा कळोल ।  
 तैसा कोवला आणि रसाल । बोलु बोलिला ॥ ५६ ॥

अंतकाले च मामेव स्मरन्मुक्त्वा कलेधरम् ।

यः प्रयाति स मद्भावं याति नारत्यत्र संशयः ॥ ५ ॥

ह्मणितलें परिसणेयांचेया राया । आइकें वा घनंजयां ।  
 ऐसी जलों सरलेयां माया । जालितें हीं जलें ॥ ५७ ॥  
 जें आतां चि सांघिलें होतें । अगा अधियज्ञ ह्मणितलें जयातें ।  
 जे आदि चि तया मातें । जाणौनि अंती ॥ ५८ ॥  
 तें देह झोलु ऐसें मानूनि । ठेलें आपणें होउनि ।  
 जैसा मटु गगना भरौनि । गगनीं चि आथि ॥ ५९ ॥  
 इये प्रतीतीचां माझि घरीं । तेयां निश्चयाची ओहिरी ।  
 आली ह्मणौनि बाहिरी । नव्है चि से ॥ ६० ॥  
 ऐसें सबाह्य ऐक्यें सांचले । मीं चि होउनि असतां रचले ।  
 बाहिर भूतांचीं पांचें ही खवले । नेणति चि पडिलीं ॥ ६१ ॥  
 उभेयां उभेपण नाहि जेयाचें । पडिलेयां गहन कवण तेयाचें ।  
 ह्मणौनि प्रतीतिचिये पोटिचें । पाणी ना हाले ॥ ६२ ॥  
 ते ऐक्याची आहे उतली । कां नित्यतेचां हृदयीं घातली ।  
 जैसी समरससमुद्रीं धूतली । तैसी रूलै चि ना ॥ ६३ ॥  
 पै अथर्वि घडा बुडाला । तो आंतु बाहिर उदका भरला ।  
 पाठिं दैवंगत्या जरि फूटला । तरि उदक काय फूटे ॥ ६४ ॥  
 नां तरि सपें कवच सांडिलें । कां उबातेनि वस्त्र फेडिलें ।  
 तरि सांघ पां काय मोडलें । अवयवां माझि ॥ ६५ ॥

तैसा आकार हा आहातु भंशे । वांचूनु वस्तु ते सांचली चि असे ।  
 ते चि बुद्धि जालेयां विसकुसे । कैसेनि आतां ॥ ६६ ॥  
 ह्मणौनि इया परीं मातें । अंतकालीं जाणत सांते ।  
 जे मेकलीति देहातें । ते मी चि होंति ॥ ६७ ॥

यं यं वापि स्मरन्भावं त्यजत्यंते कलेवरम् ।  
 तं तमेवैति कौंतेय सदा तद्भावभावितः ॥ ६ ॥

यन्हविं तन्ही साधारण । ऊरीं आदललेयां मरण ।  
 जो आठउ धरी अंतष्करण । तें चि होइजे ॥ ६८ ॥  
 जैसैं कन्हणं येका काकुलती । पलतां पवनगती ।  
 दुपाउली अवचिती । कुहां पडिली ॥ ६९ ॥  
 आतां तेया पडणेयां अरौतें । पडण चूकवावेया पुरतें ।  
 नाहिं ह्मणौनि तेथें । पडावें चि पडे ॥ ७० ॥  
 तेविं मृत्युचेनि अवसरें येकें । जें एउनि जीवा सामोर ठाके ।  
 तें होणें मग न चुके । भलेतिया परीं ॥ ७१ ॥  
 आणि जागतां जवं असिजे । तवं जेणें ध्यानें भावना भीजे ।  
 डोला लागत खेओ देखिजे । तें चि जेविं ॥ ७२ ॥  
 तरि जीवेन अवसरें । जें आवडौनि जीविं उरे ।  
 तें चि मरणाचिये मेरे । फार हों लागे ॥ ७३ ॥

तस्मात्सर्वेषु कालेषु मामनुस्मर युध्य च ।  
 मय्यर्पितमनोबुद्धिर्मा मेवैष्यस्य संशयम् ॥ ७ ॥

आणि मरणीं जेया जें आठवे । तो तिये चि गतितें तवं पावे ।  
 ह्मणौनि सदा स्मरावें । मातें तुवां ॥ ७४ ॥  
 डोलां जें पाहावें । कानीं हान आइकावें ।  
 मनीं जें भावावें । बोलावें जें ॥ ७५ ॥  
 तें आंतु बाहिरि आव्रवें । मी चि करुनि घालावें ।  
 मग सर्वीं कालीं स्वभावे । मी चि आहें ॥ ७६ ॥



आगा ऐसियां जरि जालेयां । तरि न मरिजे देह मेलेयां ।  
 ह्यणौनि उठिं बरौता आलेया । संग्रामु करीं ॥ ७७ ॥  
 तूं मन बुद्धि साचेंसीं । जरि माझां स्वरूपीं अर्पिंसी ।  
 तरि मातें चि गा पावसी । हे भाख माझी ॥ ७८ ॥

अभ्यासयोगयुक्तेन चेतसा नान्यगामिना ।

परमं पुरुषं दिव्यं याति पार्थानुचितयन् ॥ ८ ॥

हें चि काइसें वारि होये । ऐसा संदेहो जरि वर्ततु आहे ।  
 तरि अभ्यासूनि आदीं पाहे । मग नव्हे तरि कोप ॥ ७९ ॥  
 येणें चि अभ्यासेंसिं योगु । चित्तासि करि पां चांगु ।  
 आगा उपायबलें पांगु । पाडि टाकी ॥ ८० ॥  
 तेविं साभ्यास निरंतर । चित्तासि परमपुरुषाची मोहोर ।  
 लावि मग शरीर । असो आंडें जाऊ ॥ ८१ ॥  
 जें नाना गती पावतें । तें चित्त वरील आत्म्यातें ।  
 मग कवण आठवी देहातें । तें गेलें किं आहे ॥ ८२ ॥  
 पै सरिताचेनि बोधे । सिंधु जलाचे मीनले बोधे ।  
 ते काइ वर्तत आहे मार्गे । ह्यणौनि पाहों पंथि ॥ ८३ ॥  
 ना ते समुद्रू चि होउनि ठेले । तेवि चित्ताचें चैतन्य जालें ।  
 जेथ यातायात निमाले । घनानंद जे ॥ ८४ ॥

कविं पुराणमनुशासितारमणोरणीयांसमनुस्मरेद्यः ।

सर्वस्य धातारमर्चित्यरूपमादित्यवर्णं तमसः परस्तात् ॥ ५ ॥

जें गगनाहूनि जूनें । जें परमाणूहूनि सानें ।  
 जेयाचेनि सन्निधानें । विश्व चले ॥ ८५ ॥  
 जेयाचें आकारेंविण असणें । जेथ जन्म ना नीमणें ।  
 जें अश्वे चि आधवेपणें । देखत असे ॥ ८६ ॥  
 जें सर्वातें येया विये । सर्व जेणें जिये ।  
 हेतु जेयासि भिये । अचित्य जें ॥ ८७ ॥

देखैं बोलिबा इंगल न चरे । तेजिं तिमिर जेविं न सिरे ।  
 जें दिहा चि आंधारें । चर्मचक्षूसी ॥ ८८ ॥  
 सुसडा सूर्यकणाचा राशि । जो नित्योदयो ज्ञानियांसि ।  
 अस्तमानाचें जेयासि । अडिनावं हीं नाहीं ॥ ८९ ॥  
 तेया आवेंगवाणेया ब्रह्मातें । प्रयाणकालें प्राप्तें ।  
 जो धिरावलेनि चित्तें । जाणौनि स्मरे ॥ ९० ॥

**प्रयाणकाले मनसाचलेन भक्त्या युक्तो योगबलेन चैव ।  
 भ्रुवोर्मध्ये प्राणमावेश्य सम्यक्स तं परं पुरुषमुपैति दिव्यम् ॥१०॥**

बाहिरि पद्मासन रचूनि । उत्तराभिमुख बैसौनि ।  
 जीवीं सुख सूनि । कर्मयोगाचां ॥ ९१ ॥  
 आंतु मीनलेनि मनोधर्मे । सूर्यप्रातिचेनि प्रेमें ।  
 आपीं आपु संभ्रमे । मिलवेया ॥ ९२ ॥  
 आकललेनि योगें । मध्यमा मध्यमार्गे ।  
 अग्निस्थानौनि निगे । ब्रह्मरंध्रा ॥ ९३ ॥  
 तेथ अचेतन चित्ताचा सांघातु । आहाचवाणा दीसे मांडतु ।  
 जेथ प्राणु गगना आंतु । सज्जु होउनि ॥ ९४ ॥  
 तो जडाजडातें विरिचितु । भूलतां माक्षि संचरतु ।  
 जैसा घंटानादु लयस्थु । घंटे चि होये ॥ ९५ ॥  
 झांकलिये घटिचा दीवा । नेणिजे काइ जाला केव्हां ।  
 यया रीती पांडवा । । जो देह ठेवी ॥ ९६ ॥  
 तो केवल परब्रह्म । जेया परमपुरुषु ऐसें नाम ।  
 तें माझे निजधाम । होउनि ठाके ॥ ९७ ॥

**यदक्षरं वेदविदो वदन्ति विशन्ति यद्यतयो वीतरागाः ।  
 यदिच्छन्तो ब्रह्मचर्यं चरन्ति तत्ते पदं संग्रहेण प्रवक्ष्ये ॥११॥**

सकला जाणणेयांसि लाणि । तिये जाणिवेची जे खाणि ।  
 तेयां ज्ञानियांची आणि । जेयातें अक्षर ह्याणिपे ॥ ९८ ॥

चंडवातें हों न मोडे । तें गगन ।चि किं फुडें ।  
 वांचूनि होईल जारि मेहुडें । तरि उरैल कैचें ॥ ९९ ॥  
 तेवि जाणणेयां जें आकललें । तें जाणवलेपण चि उमाणलें ।  
 मग नेणवे चि तेयातें ह्मणितलें । अक्षर सहाजें ॥ १०० ॥  
 ह्मणौनि वेदविद नर । जेयातें ह्मणति अक्षर ।  
 जें प्रकृतीसि पर । परमात्मस्वरूप ॥ १ ॥  
 आणि विषयांचें विष उलंडुनि । जे सर्वेद्रियां प्रायश्चित्त देउनि ।  
 आहाति देहाचेया बैसौनि । झाडातलीं ॥ २ ॥  
 ते इया परीं विरक्त । जेयाची निरंतर वाट पाहांत ।  
 निष्कामासि अभिप्रेत । सर्वदा जें ॥ ३ ॥  
 जेयाचिया आवडी । नगणित ब्रह्मचर्याची सांकडीं ।  
 निष्ठुर होउनि बापुडीं । इंद्रियें करिति ॥ ४ ॥  
 ऐसें जें पद । दुर्लभ आणि अगाध ।  
 जेयाचिये थडिये चि वेद । बुचुकलले ॥ ५ ॥  
 तें ते पुरुष होंति । जे इया परीं लया जांति ।  
 तारि पार्था हे ।चि स्थिति । येकोल सांघों ॥ ६ ॥  
 तेथ अर्जुनें ह्मणितलें स्वामीं । हें ।चि ह्मणावेया होंतां पां मी ।  
 तव साहाजें कृपा केली तुह्मीं । तरि बोलिजो कां जी ॥ ७ ॥  
 पारि बोलावें तें अति सोहपें । येथ ह्मणितलें त्रिभुवनदीपें ।  
 तुज काइ तेणें संक्षेपें । सांघौनि आइक ॥ ८ ॥

सर्वद्वाराणि संयम्य मनो हृदि निरुध्य च ।

मूर्ध्याध्यात्मनः प्राणमास्थितो योगधारणाम् ॥ १२ ॥

तरि मना येया बाहिरिली कडे ।  
 येयावेयाचि सवे चि सावियां मोडे ।  
 हें हृदयाचां डोही बुडे ।  
 तैसें कीजे ॥ ९ ॥

पारि हें तराँ चि घडें । जरि संयमांचीं अखंडें ।  
 सर्व द्वारीं कवाडें । कलासति ॥ ११० ॥  
 तारि साहाजें मन कोंडलें । हृदयीं चि असैल उगुलें ।  
 जैसैं करचरण मोडलें । परिवरु न संडी ॥ ११ ॥  
 तैसैं चित्त राहलेयां पांडवा । प्राणाचा प्रणवु चि करावा ।  
 मग तो अनुवृत्तिपथें आणावा । मूर्ध्निवेन्हीं ॥ १२ ॥  
 तेथ आकाशीं मीले न मीले । तैसा धरावा साधनबलें ।  
 जवं मैत्रियाचें मावले । अर्धबिंब ॥ १३ ॥

ओमित्येकाक्षरं ब्रह्म व्याहरन्मामनुस्मरन् ।

यः प्रयाति त्यजन्देहं स याति परमां गतिम् ॥ १३ ॥

तव वेरि तो समिरु । निरालीं कीजे स्थिरु ।  
 मग लग्नीं जेवि ओंकारु । बिंबि विलसे ॥ १४ ॥  
 तैसैं ओं हें स्मरों सरे । आणि तेथ चि प्राणु पूरे ।  
 मग प्रणवातीत उरे । पूर्ण घन जें ॥ १५ ॥  
 क्षणौनि प्रणवैकनाम । हें एकाक्षर ब्रह्म ।  
 जो माझें स्वरूप परम । स्मरतु सांता ॥ १६ ॥  
 इया परीं त्यजी देहातें । तो त्रिशुद्धी पावे मातें ।  
 जेया पावणेयां परौतें । आणिक नाही ॥ १७ ॥

अनन्यचेताः सततं यो मां स्मरति नित्यशः ।

तस्याहं सुलभः पार्थ नित्ययुक्तस्य योगिनः ॥ १४ ॥

येथ अर्जुना जरि विपायें । तूझां जीवीं ऐसैं हान जाये ।  
 ना हें स्मरण मग होये । काइमेया वरि अंती ॥ १८ ॥  
 इंद्रियां अनुधाडु पडिलेयां । जीविताचें सुख बुडालेयां ।  
 आंतु बाहिरि उघडलेयां । मृत्युचिन्हें ॥ १९ ॥  
 तेव्हाळि वैसावें चि कवणें । मग कवण निरंधी करणें ।  
 तेथ काहाचेनि अंतःकरणें । प्रणवु स्मरावा ॥ १२० ॥

तरि आगा येया ध्वनी । ज्ञने थारा देसि होयनी ।  
 पै सेबिला मीं चि निदानीं । सेवकु होयें ॥ २१ ॥  
 जे विषयांसि तिलांजुली देउनि । प्रवृत्ति वरि निगडु बाउनि ।  
 मातें हृदयीं सूनि । भोगिताति ॥ २२ ॥  
 पारि भोगितिया नाराणुका । भेटणें नाही क्षुधादिकां ।  
 तेथ चक्षुरादि रांकां— । चा कवणु पाडु ॥ २३ ॥  
 ऐसे निरंतर येकावटले । अंतष्करणें मज लिगटले ।  
 मी चि होउनि आटले । उपासिति ॥ २४ ॥  
 तेया देहावसान जें पावे । तें तिहिं मातें स्मरावें ।  
 मग भियां जरि पावावें । तरि उपास्ति ते काइसी ॥ २५ ॥  
 पै रंक येक अडलेपणें । काकुलती धावां गा धावां हणें ।  
 तरि तेयाचि ग्लानीं धावणें । न घडे काइ ॥ २६ ॥  
 आणि भक्तां ही तैसी चि दशा । तरि भक्तिचा ही सोसु काइसा ।  
 हणौनि हा ध्वनि ऐसा । वाखाणावा ॥ २७ ॥  
 तिहिं जेव्हलिं मीं स्मरावा । तेव्हलिं स्मरला किं गा पाडवा ।  
 तो आभार जीवा । साहावे ना ॥ २८ ॥  
 तें रिणियेपण देखौनि आंगीं । मी आपुलेया उत्तीर्णत्वा लागि ।  
 भक्तांची तनुत्यागीं । परिचर्या करीं ॥ २९ ॥  
 येया देहवैकल्याचा वारा । झणें लागैल येया सकुमारां ।  
 हणौनि आत्मभावांचां पांजरां । सुयें तेयातें ॥ १३० ॥  
 वरि आपुलेया स्मरणाची उपाइली । हीं वं ऐसी करीं साउली ।  
 ऐसेन नित्य बुद्धि सांचली । मि त्यासि आणी ॥ ३१ ॥  
 हणौनि देहांतिचें जें सांकडें । तें माझेयां एक ही न पडे ।  
 मीं आपुलेयातें आपुलिये कडे । सुखें चि आणीं ॥ ३२ ॥

वरिचील देहाची गवसणी फेडूनि ।  
 आहाच अहंकाराचें रज झाडूनि ।  
 शुद्ध वासना चि निवडूनि ।  
 आपणपां मेळवीं ॥ ३३ ॥  
 आणि तेयांतें तन्हें देहीं । विशेष येकवंकैयेचा ठाओ नाही ।  
 ह्मणौनु अण्हेरुनु करितां काहीं । वियोगु ऐसें नावडे ॥ ३४ ॥  
 ना तरि देहांतीं चि मियां यावें । मग आपणपें तेयां नेयावें ।  
 हें इ नाही जे स्वभावे । ते आदीं चि मीनले ॥ ३५ ॥  
 येरि शरीराचां सलीलीं । असतेपण ते साउली ।  
 वांचूनि चंद्रिका ते ठेली । चंद्रां चि आहे ॥ ३६ ॥  
 ऐसेनि जे नित्ययुक्त । तेयांसि सूलभू मी सतंत ।  
 ह्मणौनि विदेह निश्चित । मी चि होंति ॥ ३७ ॥

मामुपेत्य पुनर्जन्म दुःखालयमशाश्वतं ॥

नान्पुवंति महात्मानः संसिद्धिं परमां गताः ॥ १५ ॥

मग क्लेशतरुची वाडी । तापत्रयाग्नि चि सेगडी ।  
 जें हें मृत्युकागासि कुरौडी । सांडिली आहे ॥ ३८ ॥  
 जें दैन्याचें दूभतें । जें महाभयाचें वाढतें ।  
 जें सकल दुःखाचें पुरतें । भांडवल गा ॥ ३९ ॥  
 जें दुर्मतिचें मूल । जें कुकर्माचें फल ।  
 जें व्यामोहाचें केवल । स्वरूप चि ॥ ४० ॥  
 जें संसाराचें बैसणें । जें विकाराचें उदाणें ।  
 जें सकल रोगांसि भाणें । वाढलें आहे ॥ ४१ ॥  
 जें कालाचें खीचु उसिटा । जें आसेचा आंगवटा ।  
 जन्ममरणाचा उल्लिखटा । स्वभावे जें ॥ ४२ ॥  
 जें भूलिचें भरिवं । जें विकल्पाचें अतिव ।  
 किंबहुना जें पेवं । विंचुवांचें ॥ ४३ ॥

जें व्याघ्राचें छत्र । जें पण्यांगनेचें मैत्र ।  
जें विषयविज्ञानयंत्र । संपूजित ॥ ४४ ॥  
जें लावेचा कलवला । निवालेया विषोदकाचा गलाला ।  
जे विश्वासु आंगवला । सवंचेराचा ॥ ४५ ॥  
जें कोढियाचें खेवं । जें कालसर्पाचें मार्दवं ।  
गोरिचें स्वभाव । गायन जें ॥ ४६ ॥  
जें वैरियांचा पाहुणरु । जें दुर्जनाचा आदरु ।  
हें असौ जें सागरु । अनर्थाचा ॥ ४७ ॥  
जें स्वप्नें देखिलें स्वप्न । जें मृगजळें सांसिनलें वन ।  
जें धूम्ररजाचें गगन । ओललें आहे ॥ ४८ ॥  
ऐसें जें हें शरीर । तें ते पुढुतीं न पवती चि नर ।  
जे होउनि ठेले अपार । स्वरूप माझें ॥ ४९ ॥

आब्रह्मभुवनाल्लोकाः पुनरावर्त्तिनोऽर्जुन ।

मामुपेत्य तु कौन्तेय पुनर्जन्म न विद्यते ॥ १६ ॥

यन्हर्वि ब्रह्मपणाचिये ही भडसे । न चुकती चि पुनरावर्त्तिचे वलसे ।  
परि निवटिलेयाचें जैसें । पोट न दूखे ॥ ५० ॥  
ना सारि चेडलेया नंतरें । न बुडिजे स्वप्निचेनि मग पुरें ।  
तेवि मातें पातले संसारें । सिंपती चि ना ॥ ५१ ॥

सहस्रयुगपर्यंतमहर्ष्यब्रह्मणोविदुः ।

रात्रिं युगसहस्रांतां तेऽहोरात्रविदो जनाः १७ ॥

यन्हर्वि जगदक्षराचें सिरें । जें चिरस्थाइयांचिये धूरें ।  
ब्रह्मभुवन गा चवरे । लोकाचलाचें ॥ ५२ ॥  
जिये गाविंचा पाहारु दियां वेन्हीं ।  
येका अमरेंद्राचें आयुष्य न धरी ।  
विलौनि पांति उठी येकसरी ।  
चौदा जणाची ॥ ५३ ॥

जें चौकडिया सहस्रु जाये । ते ठाये ठाऊ वीळु होये ।  
 आणि तैसेनि सहस्रें भरियें पाहे । राति जेथ ॥ ५४ ॥  
 येवढें अहोरात्र जेथिचें । ते न लोटती चि जे भाग्याचे ।  
 देखति ते स्वर्गिचे । चिरंजीवी ॥ ५५ ॥  
 येरां सुरगणांची नवाई । विशेष सांघावी एथ काई ।  
 मुदलां इंद्राची चि दशा पाई । जें देहाचे चौदा ॥ ५६ ॥

अव्यक्ताद्व्यक्तयः सर्वाः प्रभवन्त्यहरागमे ।

राज्यागमे प्रलीयन्ते तत्रैवाव्यक्तसंज्ञके ॥ १८ ॥

परि ब्रह्मेष्टान्विया ही पाहारातें । आपुलां डोला देखते ।  
 आहाति गा तेयांतें । अहोरात्रविद ह्याणिपे ॥ ५७ ॥  
 तिये ब्रह्मभवनीं जेव्हलें पाहे । तेव्हलें गणना केंहि न माये ।  
 ऐसें अव्यक्ताचें होये । व्यक्त विश्व ॥ ५८ ॥  
 पुढुतीं देहाची चौपाहारी फोटे । आणि हा आकारसमुद्रु आटे ।  
 पाठिं तैसा चि मग पाहाटे । भरों लागे ॥ ५९ ॥

भूतग्रामः स एवायं भूत्वा भूत्वा प्रलीयते ।

राज्यागमेऽवशः पार्थ प्रभवत्यहरागमे ॥ १९ ॥

शास्रुदियेचां प्रवेशीं । अभ्रें जिरति आकाशीं ।  
 मग ग्रीष्मांतीं जैसीं । निगति पुढुतीं ॥ १६० ॥  
 तैसी ब्रह्मदिनांचिये आदिं । इये भूतसृष्टिची मांदी ।  
 मिळे जवं सहस्रावधी । निमति युगें ॥ ६१ ॥  
 पाठिं रात्रिचा अवसर होये । आणि विश्व हें अव्यक्तीं लया जाये ।  
 तो ही युगसहस्रु मोटका पाहे । आणि तैसें चि रचे ॥ ६२ ॥

परस्तस्मात्तु भावोऽन्योऽव्यक्तो व्यक्तात्सन्नतम् ।

यः स सर्वेषु भूतेषु नश्यत्सु न विनश्यति ॥ २० ॥

हें सांघावेया काये उपपत्ती । जें जगाचा प्रलयो संभूति ।  
 इवें ब्रह्मभुवनिचिया होति । अहोरात्रां माझि ॥ ६३ ॥



कैसें थोरिवेचें मान पाहे पां । तें सृष्टिवीजांचा होये किं सांठपा ।  
 परि पुनरावृत्तिचेया मापा । सीग जाले ॥ ६४ ॥  
 येन्हवि त्रैलोक्य हें धनुर्दरा । तिये गाविंचा गा पसारा ।  
 नव्हे दीनोदयीं एकसरा । मांडतसे ॥ ६५ ॥  
 पाठिं सत्रिचा समो पावे । आणि आपैसेया चि सांठवे ।  
 ह्यणिपे जेथिचें तेथ स्वभावे । साम्यासि ये ॥ ६६ ॥  
 जैसें वृक्षपण बीजासि आलें । कां मेघ हे गगनीं जाले ।  
 तैसें अनेकत्व जेथ सामावलें । तें साम्य ह्यणिपे ॥ ६७ ॥  
 तेथें समविषम न दिसे काहीं । ह्यणुनि भूतें हे भाष नाहिं ।  
 जेवि दूध चि जालेयां दहीं । नामरूप जाये ॥ ६८ ॥  
 तेवि आकारलोपा सरिसें । जगाचें जगपण भ्रंशे ।  
 परि जेथ जालें तें जैसें । तैसें चि उरे ॥ ६९ ॥  
 तें तेय नावें सहजें अव्यक्त । आणि आकारवेळे तें चि होये व्यक्त ।  
 हें येकातव एक सूचत । येन्हवि तारि नाही ॥ ७० ॥  
 जैसीं आटलेयां स्वरूपें । आटलेपणातें खोटी ह्यणिपे ।  
 पुढुत्तीं तो घनाकार हारपे । जेव्हाळिं अलंकार होति ॥ ७१ ॥  
 इयें दोन्हीं जैसीं होणीं । एकी साक्षिभूतें सुवर्णी ।  
 तैसी व्यक्ताव्यक्ताची कडसणी । वस्तु चि ठाई ॥ ७२ ॥  
 तें तारि व्यक्त ना अव्यक्त । नित्य ना नाशवंत ।  
 येयां दोहीं भावां अतीत । अनादिसिद्ध ॥ ७३ ॥  
 जें हें विश्व चि होउनि असे । परि विश्वपणें नाशलेनि नसे ।  
 आखरें प्रसिळेयां न पूसे । अर्थु जैसा ॥ ७४ ॥  
 पाहे पां तरंग तारि होत जांते । परि तेथें उदक तें अखंड असतें ।  
 तेवि भूतभाषीं नाशवंत । अविनाश जें ॥ ७५ ॥  
 ना तारि आटतिथे अलंकारीं । नाटतें कनक आहे जिंयां परीं ।  
 तेवि मस्तिके जीवाकारीं । अमर जें आहे ॥ ७६ ॥

अव्यक्तोऽक्षर इत्युक्तस्तमाहुः परमां गतिम् ।

यं प्राप्य न निवर्तते तद्धाम परमं मम ॥ २१ ॥

जेयातें अव्यक्त हणों ये कोडें । हणतां स्तुति हें ऐसे नावडे ।

जे मना बुद्धी न संपडे । हणौनियां ॥ ७७ ॥

आणि आकारा आलेयां जेयाचें । निराकारपण न वचे ।

आकारलोपीं न विसंचे । नित्यता गा ॥ ७८ ॥

हणौनि अक्षर जें हणिजे । तेविं चि हणतां बोधु ही उपजे ।

तेया परौता पैसु न देखिजे । येया लागि परमगति जें ॥ ७९ ॥

पुरुषः स परः पार्थ भक्त्या लभ्यस्त्वनन्यया ।

यस्यांतःस्थानि भूतानि येन सर्वमिदं ततम् ॥ २२ ॥

पैं आघवां इहीं देहपूरीं । आहे निदैलेयाचिया परीं ।

जे व्यापार करवी ना करी । हणौनियां ॥ ८० ॥

यन्हविं शरीरीं चेष्टां । माझि येकि ही न ठके गा सूभटा ।

दाहीं इंद्रियांचिया वाटा । वाहाति चि आथि ॥ ८१ ॥

उकळु विषयांचिया पेंठा । होंत मनाचां चौहटां ।

तो सुखदुःखाचा राजवंटा । भितरा ही पावे ॥ ८२ ॥

परि तें राउ पौढलेयां सुखें । जैसा देशिचा व्यापार न ठके ।

प्रजा आपुलेनि अभिलाखें । करित चि असे ॥ ८३ ॥

तैसें बुद्धिचें हान जाणणें । कां मनाचें घेणें देणें ।

इंद्रियांचें करणें । स्फुरण वायुचें ॥ ८४ ॥

हे देहक्रिया आघवी । न करवितां होये बरवी ।

जैसा नचलतेनि रवी । लोळु चळे ॥ ८५ ॥

अर्जुना तया परीं । सूतला आहे शरीरीं ।

हणौनि पुरुषु गा अवधारीं । हणिपे जेयातें ॥ ८६ ॥

आणि प्रकृती पतिव्रते । पडिला येकपत्निव्रतें ।

येणें हीं कारणें जेयातें । पुरुषु हणों ये ॥ ८७ ॥

पै येया वेदांचे बौहसपण । देखे चि ना जेयाचें आंगण ।  
 हें गगनाचें पांगुरण । होये देखों ॥ ८८ ॥  
 ऐसें जाणौनि योगीश्वर । जयातें ह्मणति परात्पर ।  
 जें अनन्य गतिचें घर । गिवसित ये ॥ ८९ ॥  
 जें तनुवाचाचितें । नाइकति दूजेयाचिये गोठितें ।  
 तेयां येकनिष्ठांचें पीक तें । सुक्षेत्र जें ॥ ९० ॥  
 हें त्रैलोक्य चि पुरुषोत्तमु । ऐसा साचु जेयांचा मनोधर्मु ।  
 तेयां आस्तिकां जें आश्रमु । पांडवा गा ॥ ९१ ॥  
 जें निगर्वाचें गोरव । निर्गुणाची जाणिव ।  
 सुखाची राणिव । निराशांसि ॥ ९२ ॥  
 जें संतोषियां वाढलें ताट । जें अचितें अनाथांचें पोटा ।  
 भक्ति उजू वाट । जेया गावां ॥ ९३ ॥  
 हें येकैक सांघौनि वायां । काइ फार करु धनंजया ।  
 पै गेलेयां जेया ठाया । ठाउ चि होइजे ॥ ९४ ॥  
 हिंवांचिया झुलुका । जैसें हिंव चि पडे उष्णोदका ।  
 कां समोर जालेयां अर्का । तम प्रकाशु होये ॥ ९५ ॥  
 तैसा संसारु जेया गावां । गेला सांता पांडवा ।  
 होउनि ठाके आघवा । मोक्षाचा चि ॥ ९६ ॥  
 मँग अग्नी माझि आलें । जैसें इंधन चि अग्नि जालें ।  
 पाठि न निवडे चि काहीं केलें काष्टापण ॥ ९७ ॥  
 ना तरि साखरेचा माघौता । बुद्धिमंतपणें हीं करितां ।  
 परि ऊंसु नव्हे चि पांडुसुता । जिया परीं ॥ ९८ ॥  
 लोहाचें कनक जालें । हें येकें चि परिसें केलें ।  
 आतां आणिकु कैचा जो गेलें । लोहत्व आणी ॥ ९९ ॥  
 ह्मणौनि तूप होउनि माघौतें । जेवि दूधपणां नैये चि निरुतें ।  
 तेवि पावौनियां जेयातें । पुनरावृत्ति नाही ॥ १०० ॥

### भावार्थदीपिका.

तैं वा माझें परम । साचोकारें निजधाम ।

हें आंतुवट तुज वर्म । दाविजत असे ॥ १ ॥

वत्र काले त्वनावृत्तिमावृत्ति चैव योगिनः ।

प्रयाता यांति तं कालं वक्ष्यामि भरतर्षभ ॥ २३ ॥

तेविं चि आणिकें प्रकारें । हें जाणतां आहे सोपारें ।

तारि देह सांडितेनि अवसरें । जेथ मिलति योगी ॥ २ ॥

अथवा अवचटें ऐसें ही घडे । अनवसरें देह सांडे ।

तैं माघौतें येणें पडे । देहासि चि ॥ ३ ॥

ह्मणौनि कालशुद्धी जरि ठेविति । तरि ठेवित खे३० ब्रह्म चि होंति ।

यन्हविं अकालें तरि येंति । संसारा पुढुतीं ॥ ४ ॥

ऐसें सायुज्य आणि पुनरावृत्ति । इयें दोन्हीं अवसरा अधीन आहाति ।

तो चि अवसरु तुज प्रति । प्रसंगें सांघों ॥ ५ ॥

अग्निर्ज्योतिरहः शुक्लः षण्मासा उत्तरायणम् ।

तत्र प्रयाता गच्छन्ति ब्रह्म ब्रह्मविदो जनाः ॥ २४ ॥

तारि आइकें गा सुभटा । पातलेंयां मरणाचा माजिबटा ॥

झांच ही आपुलालिया वाटा । निगति आंतीं ॥ ६ ॥

ऐसां वरिपडिलां प्रयाणकालीं । बुद्धितें कां भ्रमुनि गीली ।

स्मृति नोहे आंधली । न मरे मन ॥ ७ ॥

हा चेतनावर्गू चि आघवा । मरणीं असे टक्कटा ।

पारि अनुभवलेया ब्रह्मभावा । गवसणी होउनि ॥ ८ ॥

ऐसा सावधु हा समवा३० । आगि निर्वाणवेन्हीं निर्वाही ।

हें तरी चि घडे जरि सावा३० । अग्निचा आधि ॥ ९ ॥

पाहे पां वारेनि कां उदकें । जें दीवेयाचें दीवेपण झाकें ।

तैं असती चि काइ देखे । दीठि आपुली ॥ २१ ॥

तैंसें देहांतिचेनि विषमवातें । देह आंतुबाहिरि स्लेष्म आते

तेणें विज्ञौनि जाये उदितें । अग्निचें जेन्हां ॥ ११ ॥

तेहलि प्राणासि प्राणु नाही । तेथ बुद्धि असौनि करील काइ ।  
 ह्मणौनि अग्नि विण देहीं । चेतना न थरे ॥ १२ ॥  
 आगा देहिचा अग्नि जारि गेला । तरि तें देह नोहे तो चि खलु बोला ।  
 बाया आयुष्य वेळु आपुला । आंधारां गिवसी ॥ १३ ॥  
 आणि मागील स्मरण आघवें ।  
 तें तेणें अवसरें सरिसें सांभालवें ।  
 मग देह तेजूनि मिलावें ।  
 स्वरूपीं किं ॥ १४ ॥  
 तबं तेया श्लेष्माचां चिखलीं । चेतना चि बुडौनि गेली ।  
 येथ मागिल पुढेलि ठेली । आठवण सहाजें ॥ १५ ॥  
 ह्मणौनि आदिं चि जो अभ्यासु केला ।  
 तो मरण नैयंतां निमौनि गेला ।  
 जैसें ठेवणें नेदखतां माल्हवला ।  
 दीपु हातिचां ॥ १६ ॥  
 आतां असो हें सकल । जाण पां ज्ञानासि अग्नि मूल ।  
 तेया अग्निचें प्रयाणीं बल । संपूर्ण आधि ॥ १७ ॥  
 आंतु अग्निर्ज्यातिचा प्रकाशु । बाहिरि शुक्लपशु परि दिवसु ।  
 आणि सां मासां माक्षि मासु । उत्तरायणां ॥ १८ ॥  
 ऐसेया समा योगाची निरुती । लाहुनि जे देह ठेविति ।  
 ते ब्रह्मविद होति । परब्रह्म ॥ १९ ॥  
 अवधारिं गा धनुर्द्धरा । येथ थोर सामर्थ्य येया अवसरा ।  
 तेबिं चि हा उजू मार्गु स्वपुरा । येयावेया ॥ २० ॥  
 येथ अग्नि हें पहिलें पैयारें । ज्योतिर्मय हें दुसरें ।  
 दिवसा जाणें तिसरें । चौथा शुक्लपशु ॥ २१ ॥  
 आणि सामास उत्तरायण । तें वरिचिल गा सोपान ।  
 येणें सायुज्यासिदिसदन । पावति योगी ॥ २२ ॥

ह्य उत्तमु कालु जाणिजे । येयातें चि अर्चिरमार्गु ह्यणिजे ।  
आतां अकालु तो ही साहाजें । सांघौनि आइकें ॥ २३ ॥

धूमो रात्रिस्तथा कृष्णः षण्मासा दक्षिणायनम् ।

तत्र चांद्रमसं ज्योतिर्योगी प्राप्य निवर्तते ॥ २५ ॥

तरि प्रयाणाचेनि अवसरें । वात श्लेष्मु सुभरें ।

तेणें अंतष्करणें आंधरें । कोंदौनि ठाके ॥ २४ ॥

सर्वेंद्रियां लांकुड पडे । स्मृति भ्रमा माझि बुडे ।

मन होये वेडें । कोंडें प्राणु ॥ २५ ॥

अग्निचें अग्निपण जाये । मग तो धूमिचा आघवा होये ।

तेणें चेतना गवली ठाये । शरीरिची ॥ २६ ॥

जैसें चंद्रा आड आभाल । सदट दाटे सजल ।

मग गडद नां उजल । ऐसें झावळें होये ॥ २७ ॥

कां मरे ना सावध । ऐसें जीविता पडे स्तब्ध ।

आयुष्यमरणाची मर्याद— । मेलें टाकी ॥ २८ ॥

ऐसीं मनीं बुद्धि करणीं । सुभति धूमाकुलाचीं कोंडणीं ।

जेथ जन्में जेडिलिये वाहाणीं । युग चि बुडे ॥ २९ ॥

हां गा हातिचें जेव्हालें जाये ।

तेव्हालि आणिका लाभाची गोठि कें आहे ।

ह्यणौनि प्रयाणीं तवें होये ।

येतुली दशा ॥ २३० ॥

आणि देहांतु ऐसी स्थिति । बाहिरि कृष्णपक्षु वरि राति ।

आणि सा म्मस ते ही वोडवति । दक्षिणायन ॥ ३१ ॥

इयें पुनरावृत्तिचीं घराणीं । आघवीं येकावटति जेयाची प्रयाणीं ।

तो स्वरूपसिद्धिचीं काहाणीं । कैसेनि आइके ॥ ३२ ॥

ऐसां जेयाचें देह पडे । योगी ह्यणौनि चंद्रु वेन्हां जणें वडे ।

मग तेथौतु माघौता वडुडे । संसारा ये ॥ ३३ ॥

आसि अकालु जो पांडवा । हणितला तो हा जणिकी ।  
आणि हा चि धूम्रमार्गु गावां । पुनरावृत्तिचेया ॥ ३४ ॥  
बैद अचिरामार्गु । तो बसता आणि आसलुगु ।  
सावितां स्वस्थु चांगु । निवृत्ति वेन्ही ॥ ३५ ॥

शुक्लकृष्णे गती ह्येते जगतः शाश्वते मते ।

एकया यात्यनावृत्तिमन्यथावर्तते पुनः ॥ २६ ॥

ऐसिया अनादि इया दोन्ही वाटा । येकि उजू येकि अन्हांटा ।  
हणौनि बुद्धिपूर्वक सूभटा । दाविलिया तुज ॥ ३६ ॥  
कां जे मार्ग अमार्ग देखावे । साच लटकें ओलखावें ।  
हिताहित जाणावें । हिता चि लागि ॥ ३७ ॥  
पाहे पां नाव देखतां बरवी । कोण्हे आड घाली काइ अथावीं ।  
कां सुपंधु जाणौनि अडविं । रिगत असे ॥ ३८ ॥  
जो विष अमृतें ओलखे । तो अमृत काइ सांडूं शके ।  
तेवि उजू वाट देखे । तो अन्हाटेनि न वचे ॥ ३९ ॥  
हणौनि गा फुडे । पारिखावें खरें कुडें ।  
पारिखिलें तरि न पडे । अखरें कहीं ॥ २४० ॥  
येन्हविं देहांतीं थोर विषम । येयां मार्गांचें आहे संभ्रम ।  
जन्में अभ्यसिलेयाचें हें काम । जाईल वायां ॥ ४१ ॥  
जरि अचिरामार्गु चूकलेयां । अवचटें धूम्रपथि च पडिलेयां ।  
तरि संसारपांती जूतलेयां । भवंतां चि असावें ॥ ४२ ॥  
हे सायास देखां मोटे । आतां कैसेनि पां येकोल फीटे ।  
हणौनि योगीं मार्ग गोमटे । शोधिले दोन्ही ॥ ४३ ॥  
तब एके ब्रह्मत्वा जाइजे । आणि एके पुनरावृत्ती येइजे ।  
परि दैवगत्या जो लाहिजे । देहांतीं जेणें ॥ ४४ ॥

नैते सृती पार्थ जानन्योगी मुह्यति कश्चन ।

तस्मात्सर्वेषु कालेषु योगयुक्तो भवार्जुन ॥ २७ ॥

तेन्हालिं सणितलें हें नव्हे । वायां अवचटें काइ पावें ।  
 देह जाउनु वस्तु होआवें । मार्गे किं ॥ ४५ ॥  
 तारि आतां देह असो अथवा जाओ । आर्ह्यां तंव वस्तूचि केवल आहों ।  
 कां दोरी सर्पत्व वाओ । दोराचिया कडौनि ॥ ४६ ॥  
 मज तरंगपण असे कां नसे । ऐसें उदकासि काहीं प्रतिभासे ।  
 तें भले तेन्हां जैसें तैसें । उदक चि किं ॥ ४७ ॥  
 तरंगाकारें न जन्मे चि । ना तरंगलोपे नाशे चि ।  
 तेवि विदेह जे देहें चि । वस्तु जाले ॥ ४८ ॥  
 आतां शरीराचें जेयाचां ठाई । अडिनावं हीं उरलें नाहीं ।  
 तारि कोणें कालें काइ । निमे तें पाहे पां ॥ ४९ ॥  
 मग मार्ग ते काइसेया शोधावे । कवणें कोठूनि कें जावें ।  
 जरि देशकालादि आघवें । आपणपां चि असिजे ॥ ५० ॥  
 आणिक हां गा घट्टु जेन्हालिं फूटे ।  
 तेन्हां तेथिचें आकाश लागे काइ येकी वाटे ।  
 मग वाटा लागे तारि गगना भेटे ।  
 येन्हाविं चूके ॥ ५१ ॥  
 पाहे पां ऐसें हान आहे । किं तो आकार चि हणें जाये ।  
 येर गगन तें गगनीं चि आहे । घटत्वा ही आदीं ॥ ५२ ॥  
 ऐसेया बोधाचेनि सुरवाडें । मार्गमार्गिचें सांकडें ।  
 तेयां सोहंसिद्धां न पडे । योगियांसि ॥ ५३ ॥  
 येया कारणें पांडुसुता । तुवां होआवें गा योगयुक्तां ।  
 येतुलेनि सर्वकालीं साम्यता । आपणपां येईल ॥ ५४ ॥  
 मग भले तेथ भले तेथवा । देहबंधु असो अथवा जावा ।  
 पारि अबंधा नित्यभावा । विघडु नाहीं ॥ ५५ ॥  
 तो कल्पादि जन्मां नांगवे । आणि कल्पांतीं मरणा जाणवे ।  
 माझि स्वर्गसंसाराचेनि लाघवें । झांक्वेना ॥ ५६ ॥



येणें बोवें जो योगिया होये । तेयासि यया बोधाचें नीटपण आहे ।  
कां जें भागातें पेलुनि पाणें । निजरूपा ये ॥ ५७ ॥  
पैंचा इंद्रादिकां देवां । जियां सर्वस्वें गाजति राणिवा ।  
तें सांडणें मानुनि पांडवा । डावली जो ॥ ५८ ॥

वेदेषु यज्ञेषु तपस्सु चैव दानेषु यत्पुण्यफलं प्रदिष्टम् ।  
अस्येति तत्सर्वमिदं विदित्वा योगी परं स्थानमुपैति चाद्यम् ॥२८॥

जन्हीं वेदाध्ययनाचें जालें । अथवा यज्ञाचें सेत चिं पीकलें ।  
कां तपोदानाचें जोडलें । सर्वस्व हानें जें ॥ ५९ ॥  
तेयां आघवेयां चि पुण्यांचा मेला ।  
भार आतौनिं जेया ये फलां ।  
जें परब्रह्म निर्मला ।  
साठिं सरे ॥ २६० ॥  
जें बीटे ना सरे । भोगितेयाचेनि पवाडें पूरे ।  
पुढुतीं महासुखाचें सोडरें । भाउंड चि पां ॥ २६१ ॥  
जें नित्यानंदाचेनि मानें । उपमेचा काटाळां न दिसे सानें ।  
पाहे पां वेदयज्ञादिसाधनें जेया सुखा ॥ ६२ ॥  
ऐसें दृष्ट चि सुखपणें । जेयासि अदृष्टाचे बैसणें ।  
जें शतमखीं हीं आंवगणें । नव्हे चि येकां ॥ ६३ ॥  
तेयातें ओझीश्वर अलौकिकें । दीठिचेनि हाततुक्कें ।  
अनुमानिति कवतिकें । तवें हलुवट आवडे ॥ ६४ ॥  
मग तेया चि सुखाची किरीटी । करूनियां गा पाउटी ।  
परब्रह्माचिये पाटीं आरूढति ॥ ६५ ॥  
ऐसें चराचरैक्यभाग्य । जें ब्रह्मेशां आराधनायोग्य ।  
जें योगियांचें भोग्य । भोगधन जो ॥ ६६ ॥  
जो सकलकलांची कला । जो परमानंदाचा पूतला ।  
जो जीवांचा जीवाला । विश्वाचेया ॥ ६७ ॥

जो सर्वज्ञता ओलावा । जो यादवकुळिचा कुलैका ।  
 तो कृष्ण जी पांडवा । प्रतिबोळिळा ॥ ६८ ॥  
 ऐसा कुरुक्षेत्राचा वृत्तांत । संजयो रायासि असे सांगतु ।  
 ते परियसां पुढां मातु । क्षणे ज्ञानदेव० गिहसिचा ॥ २६९ ॥

अंतस्तदिति श्रीमद्भगवद्गीतासूपनिषत्सु ब्रह्मविद्यायां  
 योगशास्त्रे श्रीकृष्णार्जुनसंवादे परब्रह्मयोगो नाम  
 अष्टमोऽध्यायः ॥

॥ श्रीसर्वात्मकहरिगुरुशिवार्पणमस्तु ॥



# ज्ञानेश्वरी

## अध्याय नववा

श्रीगणेशायनमः ॥

तारि अवधान एकलें देइजे । मग सर्वसुखांसि पत्र घेइजे ।  
हैं प्रतिज्ञांतर माझे । उचड आइकां ॥ १ ॥  
परि प्रौढि न बोलें हो जी । तुझां सर्वज्ञाचां समाजी ।  
देयां अवधान हाणे हे माझी । विनवणीं सलगीं ॥ २ ॥  
कां जे ललेयाचे लले सरति । मनोरथाचे मनैरे पुरति ।  
जरि माझेरे श्रीमंते होंति । तुझा ऐसीं ॥ ३ ॥  
तुमचेया दीठिवेयाचिये खोले । सांसिनले प्रसन्नतेचे मळे ।  
ते साउली देखौनि लोले । आंतु जी मी ॥ ४ ॥  
तुझीं सुखामृताचे डोहो । हाणौनि आपुलिया सर्वे बोल्हावो लाहो ।  
आणि एथ ही सलगि करुं जरि बीहो । तारि निवो कें पां ॥ ५ ॥  
आणि बालक बोबडां बोलीं । कां वांकुडां विचुकीं पाउलीं ।  
चोज करुनि माउली । रिझवी । जेवि ॥ ६ ॥  
तेवि तुझां संतांचा पदियो । कैसेनि तन्हीं आखावरि हो ।  
इया बहुवा अलुकी जी आहो । सलगि करित ॥ ७ ॥  
वांचूनि माक्षिये वीळतिये योग्यते । सर्वज्ञ भवादश असे ।  
काइ धडेयावरि सारस्वते । पदों सिक्किजे ॥ ८ ॥

अवधारां आवडे तेसणा धुंधुर । परि महातेजीं न मिरवे काइ करं ।

अमृताचां ताटीं वोगरं । ऐसिं रसौये कैचीं ॥ ९ ॥

हां हो हिमकरा वीजणे । किं नादापुढां आइकवणें ।

लेण्यांसि हें लेणें । केहीं आहे ॥ १० ॥

सांघां परिमलें काइ तुरुवावें । सागरें कवणीं ठांइ नाहावें ।

हें गगन चिं अडे आघवें । ऐसा पवाडु कैचा ॥ ११ ॥

तैसें तुमचें अवधान धाए । आणि ह्मणो हें देखों होये ।

ऐसें वक्तृत्व कवणातें आहे । विचारिजो ॥ १२ ॥

तन्हीं विश्व प्रकटितेया गभस्ती । हाथिवेनि किजे काइ अरति ।

कीं चूलेदकें अपांपती । अर्घ्यु न दीजे ॥ १३ ॥

प्रभू तुझी महेशाचिया मूर्ती । आणि मीं दुबला अर्चितसें भक्ति ।

ह्मणौनि बोलु जन्हीं गंगावती । तन्हीं स्वीकराल ॥ १४ ॥

बाल बापाचां ताटीं रिगे ।

रिषौनि बापातें चि जेवउं लागे ।

किं तो संतोषाचेनि वेगें ।

मुख ओडवी ॥ १५ ॥

तैसा मीं जन्हीं तुझाप्रति । चावटै करितसें बालमती ।

तन्हीं तुझीं संतोषिजे ऐसी चि जाति । खेहाचि एया ॥ १६ ॥

आणि तेणें आपुलेपणाचेनि मोहें ।

तुझीं संत घेतले आहा बौहें ।

ह्मणौनि केलिये संलगिचा नोहे ।

भार तुझां ॥ १७ ॥

आहो तान्हेयांची लागे झटे ।

तरि तेणें अधिकें चि पान्हा फूटे ।

रोसें प्रेम दूणावटे ।

पदियतेयाचेनि ॥ १८ ॥

झणौनि मज लेंकुरुवाचेनि बोलें । तुमचें कृपालुपण निर्दलें ।  
 चेइलें हें जी जाणावलें । एया लागि बोलिलां ॥ १९ ॥  
 यन्हविं चांदिणें पिकविजत आहे काइ चेंपणीं ।  
 किं वारेया घापत आहाति वाणीं ।  
 हां हो गगना गवसणी ।  
 गुंफिजतसे ॥ २० ॥  
 आइकां पाणीं बोधिजवावें न लगे ।  
 नवनीतीं माथुला न लगे ।  
 लाजिलों वाखाणुं न निगे ।  
 देखौनि जेयातें ॥ २१ ॥  
 हें असो शब्दब्रह्म जिये बाजे । शब्दु मावळलेयां निवांत मिदिजे ।  
 तो गीतार्थु मन्हटिया बोलिजे । हा पाडु काइ ॥ २२ ॥  
 पारि ऐसा ही मज धिवंसा । तो पुडुतीं एया चि एकी आशा ।  
 जें धीटीवं करूनि भवादृशां । पढियंतेयां होआवें ॥ २३ ॥  
 तारि आतां चंद्रापासौनि निववितें । जें अमृता ही हूनि जिववितें ।  
 तेणें अवधानें कीजो वाढतें । मनोरथां माझेया ॥ २४ ॥  
 कां जें दीठिवा तुमचा वर्षे । तें सकलार्थसिद्धी मति पीके ।  
 एन्हविं कोंभैला उन्मेखु सुके । जारि उदास तुझीं ॥ २५ ॥  
 साहाजें तन्हीं अवधारा । वक्तृत्वा अवधानाचा होये चारा ।  
 तें दोदें पेलति अक्षरां । प्रमेयाचिं ॥ २६ ॥  
 अर्थु बोलाची वाट न पाहे । तेथ अभप्रा३० चि अभिप्रायातें विये ।  
 भावांचा फुल्लौरा होतु जाये । मती वारि ॥ २७ ॥  
 झणौनि संवादाचा सुवा३० ढले । तारि हृदयाकाश सारस्वतें ३०ले ।  
 श्रोता दुचिता तारि वितुले । मांडला रसु ॥ २८ ॥  
 आहो चंद्रकांतु द्रवता किरु होये । पारि ते हातवटी चंद्रि किं आहे ।  
 झणौनि वक्ता चि वक्ता न्हवे । श्रोतेनि विण ॥ २९ ॥

परि आतां आमुतें गोडां करावें ।  
 ऐसें तांदुलिं काइसेयां विनवावें ।  
 साईखेडेनि कां प्रार्थीवें ।  
 सूत्रधारातें ॥ ३० ॥  
 तो काइ बाउलेयांचां काजा नाचवी ।  
 किं आपुलिये जाणिवेची कला वाढवी ।  
 ह्मणौनि आह्मां येया ठेवाठेवी ।  
 काइ काज ॥ ३१ ॥  
 तव गुरु ह्मणति काइ जालें । हें समस्त ही आह्मां पातलें ।  
 परि आतां सांघें जें बोलिलें । नारायणें ॥ ३२ ॥

श्रीभगवानुवाच ॥

इदं तु ते गुह्यतमं प्रवक्ष्याम्यनसूयवे ।  
 ज्ञानं विज्ञानसाहितं यज्ज्ञात्वा मोक्ष्यसेऽश्रुभात् ॥ १ ॥  
 एथ संतोखेंसीं निवृत्तिदासें । जी ह्मणौनि उल्हासें  
 अवधारां कृष्णु ऐसें । बोलते जाले ॥ ३३ ॥  
 अर्जुना हें चि बीज । पुढुतीं सांघिजैल तूज ।  
 जें अतष्करणिचें गुज । जिवाचिये ॥ ३४ ॥  
 एणें मानें जिवाचें हियें फोडावें ।  
 मग गुज कां पां मज सांघावें ।  
 ऐसें काहीं स्वभावें ।  
 कल्पिसि जारि ॥ ३५ ॥  
 तरि परियसैं प्राज्ञा । तूं आस्थेची संज्ञा ।  
 बोलिलिये गोठी अवज्ञा । नेणसि करुं ॥ ३६ ॥  
 ह्मणौनि गूढपण आपुलें मोडो । वारि बोलणें हीं बोलवें घडो ।  
 परि आमचिये जीविचें पडो । तूज्ञां जीविं ॥ ३७ ॥

आगा धानीं कीरू दूध गूढ ।  
 पारि थानासी चि न्हवे किं गोड ।  
 ह्मणौनि सरो कां सेवितेयाची चाड ।  
 जरि अनन्यु मिले ॥ ३८ ॥  
 मूडांठूनि विं काढिलें । मग निरोलिलिये भुइं पाखिरिलें ।  
 तरि तें सांडीविखुरी गेलें । ह्मणों ये काइ ॥ ३९ ॥  
 एया लागि सुमनु आणि शुद्धमति ।  
 जो अनिंदकु आणि अनन्यगति ।  
 पै गोप्य परि तेया प्रति ।  
 चावलिजे ॥ ४० ॥  
 तरि प्रस्तुत आतां गुणीं इहीं । तुज वांचूनि आनु नाहीं ।  
 ह्मणौनि गुज तन्हीं तुझां ठाई । लपों नैए ॥ ४१ ॥  
 आतां केती नावां नावां गूज ।  
 ह्मणतां कानडें हान आवडेल तुज ।  
 तरि सांगौनि ज्ञान सहज ।  
 विज्ञानेंसीं ॥ ४२ ॥  
 परि तें चि ऐसेनि निवाडें । जैसें भांसळलें खरें कुडें ।  
 मग काढिजति फाडे । वरि पारिखौनियां ॥ ४३ ॥  
 कां चांचोडाचेनि सांडसें । खांडिजे पयपाणी राजहंसें ।  
 तुज ज्ञानविज्ञान तैसें । वांटूनि देउं ॥ ४४ ॥  
 मग वारेयाचां धारसां । पडिला कोंडा नुरे चि जैसा ।  
 आणि अवकणाचा आपैसा । राशि जोडे ॥ ४५ ॥  
 तैसी जे विवंचना जाणितलेया चि साठि ।  
 संसारू चि संसाराचिया गांठी ।  
 लाउनि बैसवी पाठि ।  
 मोक्षश्रियेचां ॥ ४६ ॥

जेयां जाणणेया विद्यांचां गावीं । गुरुत्वाची आचार्यपदवी ।  
 जें सकल गुह्यां गोसांविं । पवित्रां रा३ ॥ ४७ ॥  
 आणि धर्माचें निजधाम । तेविं चि उत्तमाचें उत्तम ।  
 जेया येतां नाही काम । जन्मांतराचें ॥ ४८ ॥  
 मोटकें गुरुमुखि उदैजत दीसे ।  
 आणि हृदयीं स्वयंभ चि असे जैसे ।  
 प्रत्यक्ष फावों लागे तैसे ।  
 आपैसेया ॥ ४९ ॥  
 तेविं चि पै गा सुखाचां पाउटीं । चढतां येइजे एया भेटी ।  
 मग भेटलेयां कीर मीठी । भोगणेयां हीं पडे ॥ ५० ॥  
 परि भोगाचिये अइली कडे भरे ।  
 चित्त उभें ठेले चि सुखा भरे ।  
 ऐसें सुलभ आणि सोपारें ।  
 बरि परब्रह्म ॥ ५१ ॥

राजविद्या राजगुह्यं पवित्रमिदमुत्तमम् ।

प्रत्यक्षावगमं धर्म्यं सुसुखं कर्तुमव्ययम् ॥ २ ॥

तेविं चि पै गा आणिक ही एक येयाचें ।  
 जें हातां आलें तारि न वचे ।  
 आणि अनुभवितां कहीं न वेचे ।  
 बरि वीटे ही नां ॥ ५२ ॥  
 एथ जरि तार्किका । ऐसी हान घेंसी शंका ।  
 नां येवढी वस्तु हे लोका । उरली केवि पां ॥ ५३ ॥  
 तारि पवित्र होये आणि रम्य ।  
 तेविं चि सुखोपायें चि अवगम्य ।  
 आणि स्वयं सुख परि धर्म्य ।  
 बरि आपणपां जोडे ॥ ५४ ॥



ऐसा आघवा चि सुखाडु आहे । तरि जना केवि पां उरो लाह ।  
हा शंकेचा ठाऊ किर होये । परि ते न करावी आइकें ॥ ५५ ॥

अश्रद्धाघनाः पुरुषा धर्मस्यास्य परंतप ।

अप्राप्य मां निवर्तते मृत्युसंसारवर्त्मनि ॥ ३ ॥

पाहे पां दूध पवित्र आणि गोड ।

पासिं चि त्वचेचिया पदरासि आड ।

परि ते अग्हेरुनि ते मूड ।

अशुद्ध काइ नेवति ॥ ५६ ॥

कां कमलकंदा आणि दर्दुरी । नांदणुक तरि येका चि घरीं ।

परि पराग सेविजे भ्रमरीं । एरीं चिखळ चि उरे ॥ ५७ ॥

ना तरि निदेवांचां परिवरीं । लोहीरुतलिया आहातिसहस्रवेरी ।

परि ते तेथें असौनि उपवास चि करी अथवा दरिद्रें जिये ॥ ५८ ॥

तैसा हृदयीं आंतु मीं धर्मु । असतां सर्व सुखांचा आरामु ।

किं भ्रांतांसि कामु । विषयां वरि ॥ ५९ ॥

बहू मृगजल देखौनि डोलां । थूंकिला अमृताचा गीलितां गलाळा ।

तोडिला परिसु बांधला गलां । शुक्तिलाभें ॥ ६० ॥

तैसीं अहंममतेचिया लंहिदवडी । मातें न पवति चि बापुडीं ।

ह्मणौनि जन्ममरणाची दूधडी । डहुलतें ठेलीं ॥ ६१ ॥

मया ततमिदं सर्वं जगदव्यक्तमूर्तिना ।

मत्स्थानि सर्वभूतानि न चाऽहं तेष्ववस्थितः ॥ ४ ॥

यन्हविं मी तरि कैसा । मुख प्रति भानु कां जैसा ।

केहिं न दिसें नसें ऐसा । वाणिचा नोहे ॥ ६२ ॥

माझेया विस्तारपणें नावें । हें जग चि नगहे आघवें ।

जैसें दूध मुरालें स्वभावें । तरि तें चि दधि ॥ ६३ ॥

कां बीज चि जालें तरु । अथवा भांगार तें अलंकार ।

तैसा मज एकाचा विस्तार । तें हें जग ॥ ६४ ॥

हैं असो अव्यक्तपण धिनलें ।  
 मग तें चि विश्वाकारें उ०धिजलें ।  
 तैसैं अमूर्त मूर्त मियां विस्तारलें ।  
 त्रैलोक्य जाणें ॥ ६५ ॥  
 महदादि देहांतें । इयें अशेषें हीं भूतें ।  
 पै माझां ठांड बिंबतें । जैसे जळि फेन ॥ ६६ ॥  
 परि तेया फेना आंतु पांतां । जेवि जळ न दिसे पांडुसुता ।  
 ना तारि स्वमिची अनेकता । चेइलेयां नोहिजे ॥ ६७ ॥  
 तैसीं जियें भूतें माझां ठांड । बिंब तें तेया माझि मीं नाहिं ।  
 इया चि उपपत्ती तुज पाई । सांघितलिया मागां ॥ ६८ ॥  
 न च मत्स्थानि भूतानि पश्य मे योगमैश्वरम् ।  
 भूतभृन्न च भूतस्थो ममात्मा भूतभावनः ॥ ५ ॥  
 ह्मणौनि बोलिलिया बोलाचा अतिशो ।  
 न कीजे येया लागि हें असो ।  
 तन्हीं मज आंतु पैसो ।  
 दीठि तूझी ॥ ६९ ॥  
 आमचा प्रकृती पैलीकडालु भाउ ।  
 जरि कल्पना विण लागसी पाउ ।  
 तरि मज माझि भूतें हें ही वाउ ।  
 जें सर्व मी ह्मणौनि ॥ ७० ॥  
 यन्हांविं तन्हीं संकल्पाचिये सांजवेले ।  
 नावेक तिमिरैजति बुद्धिचे डोले ।  
 ह्मणौनि अखंडित चि परि झांवले ।  
 भूत भिन्न ऐसें देखे ॥ ७१ ॥

ते चि संकल्पाची सांज जैं वीपे ।  
 तैं अखंडित चि आहे स्वरूपें ।  
 जैसी शंका जात खेओ लोपे ।  
 सर्पपण मालेचें ॥ ७२ ॥  
 यन्हविं तन्हीं भुइं आंतौनि स्वयंभ ।  
 काइ घडेगाडुआंचे निगताति कोंभ ।  
 पुडुतीं ते कुल्लालमतिचे गर्भ ।  
 उमटले किं ॥ ७३ ॥  
 ना तरि सागराचां पाणीं ।  
 काइ तरंगाचिया आहाति खाणी ।  
 ते अवांतर करणी ।  
 वारेयाची नव्हे ॥ ७४ ॥  
 पाहे पां कापुसाचां पोटीं । कापडाची होंति काये पेटी ।  
 तो वेढि तेयाचिया दीठी । कापड जाला किं ॥ ७५ ॥  
 जरि सोनें लेणें होउनि घडे । तन्हीं तेयाचें सोनेपण न मोडे ।  
 एरु अलंकारु तो वरिचिली कडे । लेतेयाचेनि भावें ॥ ७६ ॥  
 सांचें पडिसादेयाचीं प्रत्युत्तरें ।  
 कां आरिसां हान जें आविष्करे ।  
 तें आपुलें कीं साचोकारें ।  
 तेथिंचें होंतें ॥ ७७ ॥  
 तैसिये निर्मले माझां स्वरूपीं । जो भूतभावना आरोपी ।  
 तेयासि तेयाचां चि संकल्पीं । भूताभासु आहे ॥ ७८ ॥  
 तै चि कल्पति प्रवृत्ति पुरे । आणि भूताभासु आदिं च सरें ।  
 मग स्वरूप उरें एकसरें । निखल माझें ॥ ७९ ॥  
 हें असो आंगीं भरलियां भवंडी । जैसियां भवती दीसति आर्दि ।  
 तैसिया आपुलिया कल्पना अखंडीं । गमति भूतें ॥ ८० ॥

ते चि कल्पना सांडूनि पाई । त्रिर मी भूतीं भूतें माझां ठाई ।  
 हें स्वप्नि हिं परि नाहिं । कल्पावेया जोगें ॥ ८१ ॥  
 आतां मी एकु भूतांतें धरिता । अथवा भूतां माझि असता ।  
 इया संकल्पसन्निपाता । आंतुली बोलिया ॥ ८२ ॥  
 ह्मणौनि परियसैं गा प्रियोत्तमा । मीं विश्वेसीं विश्वात्मा ।  
 जो एया लटकेया भूतग्रामां । भाव्यु सदा ॥ ८३ ॥  
 रश्मिचेनि आधारे जैसैं । नाहिं तें चि मृगजल असे ।  
 माझां ठाई भूतजात तैसैं । आणि मातें भावी ॥ ८४ ॥  
 मी इये परिचा भूतभावनु । परि सर्व भूतेंसीं अभिन्नु ।  
 जैसैं प्रभा आणि भानु । एक चि तें ॥ ८५ ॥  
 हा ऐश्वर्यु आमचा योगु । तुवां देखिला किं चांगु ।  
 आतां सांघैं एथ काहीं लागु । भूतभेदाचा असे ॥ ८६ ॥  
 एया लागि मजपासौनि भूतें । आनैं न्हवति हें निरुतें ।  
 आणि भूतां वेगलेयां मातें । कहीं चि न मनीं हो ॥ ८७ ॥

यथाकाशस्थितो नित्यं वायुः सर्वत्रगो महान् ।

तथा सर्वाणि भूतानि मत्स्थानीत्युपधारय ॥ ६ ॥

पैं गगन जेव्हडें जैसैं । पवनु हि तेवडा चि असे ।  
 हा साहाजें हालवलेयां वेगला दीसे । यन्हविं गगन तें तो ॥ ८८ ॥  
 तैसैं भूतजात माझां ठाई । कल्पिजे तारि आभासे काहीं ।  
 निर्विकल्पीं मग नाहिं । तेथ मीं आघवें ॥ ८९ ॥  
 ह्मणौनि नाहिं आणि असे । हें कल्पनेचेनि सोरसैं ।  
 जें कल्पनालोपीं भ्रंशें । आणि कल्पने सवें होये ॥ ९० ॥  
 तें चि कल्पितें मुदल जाये । तें कें असे नाहिं हें आहे ।  
 ह्मणौनि पुडुतीं तूं पाहे । हा ऐश्वर्ययोगु ॥ ९१ ॥  
 ऐसिया प्रतीतिबोधसागरीं । तूं आपणपेयातें कळोलु एकु करीं ।  
 मग एन्हविं पाहंसि तव चराचरीं । तूं चि अससि ॥ ९२ ॥

एया जाणणेयांचा चेउ ॥ तूज आला नां क्षणति देओ  
 तारि आतां द्वैतस्वप्न वाओ । जालें किं ना ॥ ९३ ॥  
 तन्हीं पुडुतीं जरि विपायें । बुद्धी कल्पनेची झोंप ही नैये ।  
 तारि अभेदबोधु जाए । जें स्वप्नीं पाडिजे ॥ ९४ ॥  
 क्षणौनि इये नीदेची वाट मोडे ।  
 निखल उद्धोधाचें चि आपणपें घडे ।  
 ऐसें सुवर्म जें आहे फुडे ।  
 तें दाउनि पाई ॥ ९५ ॥

सर्वभूतानि कौंतेय प्रकृतिं यांति मामिकाम् ।  
 कल्पक्षये पुनस्तानि कल्पादौ विस्तृजाम्यहम् ॥ ७ ॥

तारि धनुर्द्धरा धौरेया । नीकें अवधान देयीं धनंजया ।  
 पैं सर्वभूतांतें माया । करी हरी ॥ ९६ ॥  
 जियें नावं कां प्रकृति ।  
 जे द्विविधा सांघितली तुजप्रति ।  
 येकि अष्टभेदव्यक्ति ।  
 आणि जीवरूपा ॥ ९७ ॥  
 हा प्रकृतिविषो आघवा ।  
 तुवां मार्गां परिसिला असे पांडवा ।  
 क्षणौनि असो काये सांघावा ।  
 तन्हीं प्रकृति ते हे ॥ ९८ ॥  
 तारि इये माक्षिये प्रकृती । महाकल्पांचां अंती ।  
 सर्वभूतव्यक्ती । ऐक्यासि येति ॥ ९९ ॥  
 ग्रीष्मांचां अतिरसीं । सर्वाजें तृणें जैसीं ॥  
 माघौतीं भूमीसी । मुर्खानें होंति ॥ १०० ॥

कां वार्षिये ढेंढें फीटे ।  
 जेव्हां शारदियेचा अनुघाडु फुटे ।  
 तें घनजात आटे ।  
 गगनिचां गगनीं ॥ १ ॥  
 ना तरि आकाशाचिये खोंपे । वायु निवांतू चि लोपे ।  
 आणि तरंगता हारपे । जलि जेवि ॥ २ ॥  
 अथवा जागिनलेये वेले । स्वप्न मनिचें मनीं चि मावले ।  
 तैसें प्राकृत प्रकृती मिले । कल्पक्षयीं ॥ ३ ॥  
 मग कल्पादि पुडुतीं । मीं चि सृजीं ऐसी वदती ।  
 तरि तिये विधिं निरुती । उपपत्ति आइकें ॥ ४ ॥

प्रकृतिं स्वामवष्टभ्य विसृजामि पुनः पुनः ।

भूतग्रामभिमं कृत्स्नमवशं प्रकृतेर्वशात् ॥ ८ ॥

तरि हे चि प्रकृति किरीटी । मीं स्वकीय साहजें अधिष्ठीं ।  
 तेथ तंतुसमवार्यें पटीं । जेवि विणावणि दीसे ॥ ५ ॥  
 मग तिथे विणावणिचेनि आधारे ।  
 लाहाना चौकडियां पटत्व भरे ।  
 तैसीं पंचात्मकें आकारें ।  
 प्रकृति चि होए ॥ ६ ॥  
 जैसें विरजेयाचेनि संगें । दूध आटलिजों लागे ।  
 तैसी प्रकृति आंगा रिगे । सृष्टिपणाचिया ॥ ७ ॥  
 बीज जळाची जवळीक लाहे ।  
 आणि तें चि शाखोपशाखा होये ।  
 तैसें मज करणें आहे ।  
 भूतांचें हेंट ॥ ८ ॥

आगा हे नगर रायें केलें ।  
 एया ह्मणण्या किर साचपण आले ।  
 पारि निरुतें पातां काइ सिणले ।  
 रायाचे हात ॥ ९ ॥  
 आणि मीं प्रकृति अधिष्ठीं तें कैसें । जैसा स्वप्नीं जो असे ।  
 मग तो चि प्रवेशे । जाग्रदवस्थे ॥ ११० ॥  
 तरि स्वप्नौनि जाग्रति येतां । काये पाये दूखति पांडुसुता ।  
 कीं जाग्रते माझि असतां । प्रवासु होए ॥ ११ ॥  
 एया आघवेयाचा अभिप्रा३० काइ ।  
 जें हें भूतसृष्टिचें कांहीं ।  
 मज एक ही करणें नाहीं ।  
 ऐसा अर्थ ॥ १२ ॥  
 जैसी रायें अधिष्ठिली प्रजा । व्यापारें आपुलालेया काजा ।  
 तैसा प्रकृतिसंगु माझा । एर करणें तें इयेचें ॥ १३ ॥  
 पाहे पां पूर्णचंद्राचिया भेटी । समुद्रिं भरतें अपार दाटी ।  
 तैथ चंद्रासि काइ किरीटी । उपखा पडिला ॥ १४ ॥  
 जडपण जवलिका । लोह चाले तरि चालो कां ।  
 कोणु सीणु भ्रामका । सन्निधानाचा ॥ १५ ॥  
 किंबहुना इया परीं । मीं निजप्रकृतितें अंगिकरीं ।  
 आणि भूतसृष्टि एकसरी । प्रसरों चि लागे ॥ १६ ॥  
 जें हा भूतग्रामु आघवा । असे प्रकृती अधीनु पांडवा ।  
 जैसी बीजाचेया वेला पालवा । समर्थ भूमि ॥ १७ ॥  
 नां तरि बाल्यादिकां वयसां । गोसांविं देहसंयोगु जैसा ।  
 अथवा घनावली अकाशा । वार्षियें जेवि ॥ १८ ॥  
 का स्वप्नासि कारण निद्रा । तैसी प्रकृति हे नरेंद्रा ।  
 एया अशेषा ही भूतसमुद्रा । गोसांविणि गा ॥ १९ ॥

स्थावरां जंगमां । स्थूलां अथवा सूक्ष्मां ।

हे बहू असो भूतग्रामां । प्रकृती चि मूल ॥ १२० ॥

न च मां तानि कर्माणि निबध्नन्ति धनंजय ।

उदासीनवदासीनमसक्तं तेषु कर्मसु ॥ ९ ॥

क्षणौनि भूतें हान सृजावीं । कां सृजिलीं प्रतिपालावीं ।

इयें करणीं नैयंति आघवीं । आमचेया आंगा ॥ २१ ॥

जलीं चंद्रिकेचिया पसरति बेली ।

ते वाडि चंद्रें नाहिं जेवि केली ।

तेवि मातें पाउनि ठेली ।

दूरि कर्म ॥ २२ ॥

आणि सूटलेयां सिंधुजलाचा लोटु ।

न शके धरुं सैंधवाचा घोंटु ।

तेवि सकल कर्मा मी चि सेवटु ।

काइ बांधीति मातें ॥ २३ ॥

भूमरजाची पिंजरी । वाजतेया वायुतें होंकरी जाँर ।

कां सूर्यबिंबा माझारि । आंधारें रिगे ॥ २४ ॥

हें असो पर्वतांचिये हृदइचें । पर्जन्यधारीं ने विखोंचे ।

तेवि कर्मजात प्रकृतिचें । न लगे मज ॥ २५ ॥

अन्हविं इये प्रकृतिविकारीं । येकु मीं चि असे अवधारीं ।

उदासीनाचिया परीं । करी ना करवीं ॥ २६ ॥

दीपु ठेविला परि वरीं । कवणातें नियमी ना निवारी ।

आणि कवण कवणी परी । राहाटे तें असे नेगे ॥ २७ ॥

तो जैसा कां साक्षिभूत । गृहव्यापारप्रवृत्तिरहितु ।

तैसा भूतकर्मि अनासक्तु । मीं भूतीं असें ॥ २८ ॥

मयाऽध्यक्षेण प्रकृतिः सृज्यते सचराचरम् ।

हेतुनाऽनेन कौंतेय जगद्विपरिवर्तते ॥ १० ॥



एथ एकू चि अभिप्र॥३० पुडुती । काइ सांघों यया उपपत्ती ।  
 तारि एकी हेला सुभद्रापती । एतुलें जाण ॥ २९ ॥  
 जैसा लोकचेष्टां समस्तां । हा निमित्तमात्र कां सविता ।  
 तैसा जगप्रभवीं मी पांडुसुता । हेतु होइ ॥ ३० ॥  
 कां जें मियां अभिष्टिलेयां प्रकृती ।  
 होंताति चराचराचिया संभूती ।  
 ह्यणौनि मीं हे उपपत्ती ।  
 घडे इया ॥ ३१ ॥  
 आतां येणें चि उजियडें निरुतें । निहालिं पां एया योगातें ।  
 जें माझां ठांडें भूतें । परि मीं भूतीं नसें ॥ ३२ ॥  
 अथवा भूतें माझां ठांडें । आणि मीं भूतां माझि नाहीं ।  
 इया खुणा आंतु काहीं । चूकें ना किं ॥ ३३ ॥  
 हें सर्व आमचें गूढ । दाविलें मियां तुज उघड ।  
 तारि इंद्रियां देउनि कवाड । हृदयीं भोगीं ॥ ३४ ॥  
 हा डंसु जवं नये हाता । तवं माझें साचोकारण पार्था ।  
 न संपडे गा सर्वथा । जेवि भुषिं कणु ॥ ३५ ॥  
 यन्हविं अनुमानाचेनि पैसें । आवडे किरु कललें ऐसें ।  
 परि मृगजलाचेनि उल्हासें । काइ भूमि तीमे ॥ ३६ ॥  
 जें जाल जलीं पांगिलें । तेथ प्रतिबिंब दीसे कीरु आंतुडलें ।  
 मग थडिये काढूनि झाडिलें । तेव्हलिं बिंब कें सांघें ॥ ३७ ॥  
 तैसें बोलवरि वाचाबलें ।  
 वायां चि झांकवीति प्रतीतीचे डोले ।  
 मग साचोकारे यया बोधा वेले ।  
 आधि ना होइजे ॥ ३८ ॥

अवजानन्ति मां मूढा मानुषीं तनुमाश्रितम् ।

परं भावमजानन्तो मम भूतमहेश्वरम् ॥ ११ ॥

किं बहुना भवा भिया । आणि साचें चाड जरि मियां ।  
 तरि तुझी गा उपपत्ती इयां । जतन करां ॥ ३९ ॥  
 यन्हविं वेधली दीटि कवले । ते चांदिणेंयांतें हणगे पीवळें ।  
 तेवि माझां स्वरूपीं निर्मळें । देखति दोषु ॥ ४० ॥  
 ना तरि जरें विटालळें मुख । मग दूधातें हणति विख ।  
 तेवि अमानुषा मानुष । मानीति मातें ॥ ४१ ॥  
 हणौनि पुडुतीं धनंजया । झनें विसरसी यया अभिप्राया ।  
 जें एरी स्थूलदृष्टी वायां । जाईल गा ॥ ४२ ॥  
 पै स्थूलदृष्टी देखिजे मातें । तें नेदखणें जाणति निरुतें ।  
 जैसें स्वप्निचेनि अमृतें । अमरां न्हविजे ॥ ४३ ॥  
 यन्हविं स्थूलदृष्टी मूढ । मातें जाणति कीर दृढ ।  
 पारि तें जाणणें चि जाणणेयां आड । रिगौनि ठाके ॥ ४४ ॥  
 जैसें नक्षत्राचेया आभासा । साठिं घातु जाला तेया हंसा ।  
 माझि रत्नबुद्धिचिया आशा । हणौनियां ॥ ४५ ॥  
 सांचें गा मृगजल टाकूनि गेल्याचें कवण फल ।  
 काइ सुरतरु हणौनि बाबुल । सेविलें करी ॥ ४६ ॥  
 हा निलेयाचा दुसरा । यया बुद्धी हातु घालिजे विखारा ।  
 कां रत्नें हणौनि गारा । वेंचिजति पै ॥ ४७ ॥  
 अथवा निधान हें प्रकटलें । हणौनि खदिरांगार खोले भरिले ।  
 कां साउली न पांतां घातलें । कुहां सिहें ॥ ४८ ॥  
 तेवि मीं हणौनि प्रपंची ।  
 जिहीं बुडी दिधली कृतनिश्चयाची ।  
 तिहीं चंद्रासाठि जलिची ।  
 प्रतिमा धरिली ॥ ४९ ॥  
 तैसा कृतनिश्चयो वायां गेला । जैसा कोण्ह येकु कांजी पियाला ।  
 मग परिणामु पाहों लागला । अमृताचा ॥ ५० ॥

तैसैं स्थूलाकारीं नाशवन्ते । भरवसा बांधौनि चित्तें ।  
 पाहांति मज अविनाशातें । तरि कैसेनि दीसैं ॥ ५१ ॥  
 आगा पश्चिमसमुद्रिचिया तटा । निगिजत आहे पूर्वेची वाटा ।  
 किं कोंडा कांडितां सूभटा । कणु आंतुडे ॥ ५२ ॥  
 तैसैं विकरलें हें स्थूल । जाणितलेयां मीं जाणावें केवल ।  
 काये फेणु पीतां जल । सेविलें होये ॥ ५३ ॥  
 ह्मणौनि मोहवळें मनोधर्में । हें चि मानूनि संभ्रमें ।  
 येथिचीं जियें जन्मकर्में । तियें मज चि ह्मणाति ॥ ५४ ॥  
 एतुलेनि अनामा नाम । मज अक्रियासि कर्म ।  
 विदेहा देहधर्म । आरोपिति ॥ ५५ ॥  
 मज आकारशून्या आकार । निरुपाधिका उपचार ।  
 विधिविर्वर्जिता व्यवहार । आचारादिकु ॥ ५६ ॥  
 मज वर्णहीना वर्णु । गुणातीतासि गुणु ।  
 मज अचरणा चरणु । अपाणी पाणि ॥ ५७ ॥  
 मज अमेया मान । सर्वगतासि स्थान ।  
 जैसैं सेजें चि माझि वन । निदैंला देखे ॥ ५८ ॥  
 तैसैं अश्रवणा श्रोत्र । मज अचक्षुका नेत्र ।  
 अगोत्रा गोत्र । अरूपा रूप ॥ ५९ ॥  
 मज अव्यक्ता व्यक्ति । अनात्तासि आर्त्ति ।  
 स्वयंतृप्ता तृप्ति । भाविति गा ॥ १६० ॥  
 मज अनावरणा आवरण । अभूषणा भूषण ।  
 मज सकलकारणासि कारण । मानीति ते ॥ ६१ ॥  
 मज सहजातें कारीति । स्वयंभातें प्रतिष्ठिति ।  
 निरंतरातें आवांहांति । विसर्जिति पै ॥ ६२ ॥  
 मीं सर्वदा स्वतःसिद्धु । मीं बालु तरुणु वृद्धु ।  
 मज एकरूपा समंभु । जाणति ऐसैं ॥ ६३ ॥

मज अद्वैतासि दूजें । मज अक्रियासि काजें ।  
 मीं अभोक्ता किं भुजें । ऐसें हणति ॥ ६४ ॥  
 मज अकुलाचें कुल वानिति । मज नित्याचेनि निधनें सीणति ।  
 मज सर्वत्रातें कल्पिति अरिमित्र गा ॥ ६५ ॥  
 मीं स्वानंदाभिरामु । तेया मज आणि सुखाचा कामु ।  
 मीं आधवा चि असें समु । किं हणति एकदेशी ॥ ६६ ॥  
 मीं आत्मा एकु चराचरी । किं हणति एकाचा आडलु करी ।  
 आणि कापौनि एकां मारीं । हें चि रूढवीति ॥ ६७ ॥  
 किंबहुना ऐसे समस्त । जे हे मनुष्यधर्म प्राकृत ।  
 तेया चि नावं ऐसें विपरीत । ज्ञान तेयांचें ॥ ६८ ॥  
 जवं आकारु येकु देखति । तवं हा देवो ऐसें हणति ।  
 मग तो चि विघडलेयां ठाकति । नाहिं हणौनियां ॥ ६९ ॥  
 मातें एणें एणें प्रकारें । जाणति मनुष्य ऐसेनि आकारें ।  
 हणौनि ज्ञान तें चि आंधारें । ज्ञानासि करिति ॥ ७० ॥

मोघाशा मोघकर्माणो मोघज्ञाना विचेतसः ।

राक्षसीमासुरीं चैव प्रकृतिं मोहिनीं श्रिताः ॥ १२ ॥

एया लागि जन्मले ते मोघ । जैसे वार्धी विण मेघ ।  
 ना तरि मृगजलिचे तरंग । दुरौनि पाहावे ॥ ७१ ॥  
 अथवा कोल्हैरिचे असिवार । ना तरि घोडंबरीचे अलंकार ॥  
 किं गंधर्वनगरिचे आवार । आभासति ॥ ७२ ॥  
 सावेरी वाढिनलेया सरला । वरि फल नाहिं आंतु पोकला ।  
 कां स्तन जाले गलां । सेलिये जैसे ॥ ७३ ॥  
 तैसें मूर्खीचें तेयां जियालें ।  
 आणि धिगि कर्म हीं तेयांचें निफनलें ।  
 जैसें सोवेरी फल आलें ।  
 धेपे ना दीजे ॥ ७४ ॥

मग जें काहिं ते पढिनले । तें माकडें नारियल तोडिलें ।  
 कां आंधलेया हातीं पडिलें । मोतीं जैसें ॥ ७५ ॥  
 किंबहुना तेयां शास्त्रें । जैसें कुमारीहातीं बांधलीं शस्त्रें ।  
 कां अशौचीं मंत्रें । बाजें कथिलीं ॥ ७६ ॥  
 तैसें ज्ञानजात तेयां । आणि काहिं आचरले गा धनंजया ।  
 तें आघवें चि गेलें वायां । जे चित्तहीन ॥ ७७ ॥  
 पै तमोगुणिची राक्षसी । जे सद्बुद्धितें प्रसी ।  
 मनाचा ठाउ चि पूसी । निशाचरि जे ॥ ७८ ॥  
 तिये प्रकृती वरिपडे जाले । ह्मणौनि चित्ताचेनि कपोलें गेले ।  
 वरि तामसियेचां पडिले । मुखा माजि ॥ ७९ ॥  
 जेथ आशेचिये लाले । आंतु हिंसा जीभ लोले ।  
 तेविं चि संतोखाचे चाकले । अखंड चघली ॥ १८० ॥  
 जेथ अनार्त्तांचे कानवेन्हीं ।  
 आवाळुएं चाटिति निगे बाहिरि ।  
 जे प्रमादपर्वतिची दरी ।  
 सदा चि मातली ॥ ८१ ॥  
 जेथ द्वेषाचिया दाढा । कसासां ज्ञानाचा करिती रगडा ।  
 जे अगस्तिगौवण मूढां । स्थूलबुद्धि ॥ ८२ ॥  
 ऐसे आसुरिये प्रकृतिचां तोंडीं । ते जाले गा भूतौंडी ।  
 जे बुडौनि गेले कुंडीं । व्यामोहाचां ॥ ८३ ॥  
 एवं तमाचिये पडिले गर्ते ।  
 न पवती चि विचाराचेनि हातें ।  
 हें असो ते गेले जेथें ।  
 ते शुद्धि ही नाहिं ॥ ८४ ॥  
 ह्मणौनि असतु इयें वायाणीं । काइसीं तेयां मूर्खांचीं बोलणीं ।  
 वायां बाढवितां काहाणी । सिणैल हान ॥ ८५ ॥

ऐसें बोलिलें देवें । तेथ जी झणितलें पांडवें ।  
आइकें वाचा जेथ विसरे । ते साधुकथा ॥ ८६ ॥

महात्मानस्तु मां पार्थ दैवीं प्रकृतिमाश्रिताः ।

भजंत्यनन्ययत्नसो ज्ञात्वा भूतादिमव्ययम् ॥ १३ ॥

तारि जेयांचिये चोखटे मानसी । मीं होउनि असे क्षेत्रसंन्यासी ।

जेयां निदळेयातें उपासी । वैराग्य गा ॥ ८७ ॥

जेयांचिया आस्थेचिया सद्भावा । आंतु धर्मु करी राणिवा ।

जेयांचिये मती ओलावा । विवेकाचा ॥ ८८ ॥

जे ज्ञानगंगे न्हाले । जे पूर्णता जेउनि घाले ।

जे शांतीसि जाले । पालव नवे ॥ ८९ ॥

जे परिणामा निघाले कोम । जे धैर्यमंडपाचे खांभ ।

जे आनंदसमुद्री कुंभ । लुभळनि भरिले ॥ १९० ॥

जेयां भक्तिची येतुली प्रीति । जे कैवल्यातें पन्हां सर हणति ।

जियांचिये लीले माक्षि नीति । जियाली दासे ॥ ९१ ॥

जे आघवां चि करणीं । लडले संयतिचीं लेणीं ।

जेयांचें चित्त गवनणी । व्यापका मज ॥ ९२ ॥

ऐसे जे महानुभाव । जे दैविये प्रकृतिचे देव ।

जे जाणोनियां सर्व । स्वरूप माझे ॥ ९३ ॥

मग वाढतेनि प्रेमें । मातें भजताति जे महात्मे ।

परि दूजेपण मनोधर्मे । सीतले नाहिं ॥ ९४ ॥

ऐसे मीं चि होउनि पांडवा । करीत माझी सेवा ।

परि नवलाओ तो सांघावा । असे आइकें ॥ ९५ ॥

सततं कीर्तयंतो मां यतंतश्च दृढव्रताः ।

नमस्यंतश्च मां भक्त्या नित्ययुक्ता उपासते ॥ १४ ॥

तारि कीर्तनाचेनि नडनाचें । नाशिले व्यवसाय प्रायश्चिताचे ।

जें नायं चि नाहिं पापाचें । ऐसें केलें ॥ ९६ ॥

यमदमा अवकला आणिली । तीर्थे ठायावरौनि उठविलीं ।  
 यमलोकिची ठाकविली । राहाटि आववी ॥ ९७ ॥  
 यमु ह्मणे काइ यमावे । दमु ह्मणे कोणाते शोषावे ।  
 तीर्थे ह्मणति काइ खावे । दोखु अशुधा नाहिं ॥ ९८ ॥  
 ऐसेनि माझेनि नामधोपे । नाहिं करित विश्वाचीं दुःखे ।  
 आघवे जग चि महामुखे । दुसुदुमीत भरले ॥ ९९ ॥  
 ते पाहाटेविण पांहाटवित । अमृतेविण जिववित ।  
 योगेविण दावित । कैवल्य डोलां ॥ १०० ॥  
 पारि राया रंका पाडु धरं । नेणति सानेया थोरा कडसणी करं ।  
 एकरसें आनंदाचे आवारं । होत जगा ॥ १ ॥  
 कहिं येकाधेन वैकुंठा जावे । तेतिहिं वैकुंठ चि केलें हे आघवे ।  
 ऐसें नामघोषगौरवे । धवले विश्व ॥ २ ॥  
 तेजे सूर्यु तैसे उजल । पारि तो अस्तवे हें कीडाल ।  
 चंद्र संपूर्ण एकाधी वेल । ते सदा पुरते ॥ ३ ॥  
 मेघु उदारु पारि ओसर । ह्मणौनि उपमेसि नुपकरे ।  
 ते निःशंकपणे सपांखरे । पंचानन ॥ ४ ॥  
 तेयांचिये वाचेपुढां भोजे । नाम नाचे माझे ।  
 जे जन्मशतीं उलगिजे । एकोल यावेया ॥ ५ ॥  
 पै वैकुंठीं मी गा नसें । वेल एकु ही भानुबिंबि हिं न दिसें ।  
 वर योगियांची हीं मानसें । सांडूनि जाये ॥ ६ ॥  
 पारि तेयांपासि पांडवा । मी हारतला गिवसावां ।  
 जेथ नामघोषु वरवा । करिति ते माझा ॥ ७ ॥  
 कैसे माझां गुणीं भरले । देशतालाते विसरले ।  
 कीर्तनसुख जाले । आपणपां चि ॥ ८ ॥  
 कृष्णविष्णुगोविंद । एयां नामाचे निखिल प्रबध ।  
 माझि आत्मचर्चा विशद । उदंड गांति ॥ ९ ॥

हें बड्ड असो इया परीं । कीर्तितमातें अवधारीं ।  
 एक विचरति चराचरीं । पांडुकुमरा ॥ २१० ॥  
 मग आणिक ते अर्जुना । सावियां चि बहुवा जतना ।  
 पंचप्राणमना । पाढाउ घेति ॥ ११ ॥  
 बाहिरि यमनियमाची कांठि लाविली ।  
 आंतु वज्रासनाची पौलि पानासिली ।  
 वरि प्राणायामाची मांडिलीं ।  
 वांहांती यंत्रें ॥ १२ ॥  
 तेथ उल्हाटशक्तिचेनि उजियेडें । मनपवनाचेनि सुरवाडें ।  
 सतरावियेचेनि पानियेडें । बलियावीले ॥ १३ ॥  
 तेव्हां प्रत्याहारें ख्याति केली । विकारांची सपिलें बोहिली ।  
 इंद्रियें बांधौनि आणिलीं । हृदया आंतु ॥ १४ ॥  
 तव धारणावारू दाटिले । महामूतांतें येकिं आटिलें ।  
 मग चतुरंग निवटिलें । संकल्पाचें ॥ १५ ॥  
 तेयावारि जैत रे जैत । ह्मणौनि ध्यानाचें निसाण वाजत ।  
 दीसे तन्मयतेचें झलकत । एकछत्र ॥ १६ ॥  
 पाठिं समाधिप्रियेचेया अशेषा । आत्मानुभव—राज्यसुखा ।  
 पट्टाभिषेकु देखां । समरसें जाला ॥ १७ ॥  
 ऐसें हें गहन । अर्जुना माझें भजन ।  
 आतां आइक सांघों आन । जें करिति येक ॥ १८ ॥  
 तरि दोन्हीं पालववेन्हीं । जैसा एकु तंतु अंबरीं ।  
 तैसा मी वांचूनि चराचरीं । जाणति नां ॥ १९ ॥  
 आदिब्रह्मा करुनि । सेवटीं मशकु धरुनि ।  
 माझि समस्त हें जाणौनि । स्वरूप माझें ॥ २२० ॥  
 मग वाड धाकुटें न ह्मणति । साजीव निर्जीव नेणति ।  
 देखिलिये वस्तू लुंठति । मी चि ह्मणौनि ॥ २१ ॥



आपुलें उत्तमत्व नाठवे । पुढेल योग्यायोग्य ही नेणवे ।  
 एकसरें व्यक्तिमात्रेचेनि नावें । नमू चि आवडे ॥ २२ ॥  
 जैसैं ऊंची उदक पडिलें । तारें तळवटुवारि ये उगेलें ।  
 तैसैं नमिजे भूत देखिलें । ऐसा स्वभाओ तेयांचा ॥ २३ ॥  
 कां फललेया तरुची शाखा । साहाजें भूमीसि उतरली देखां ।  
 तैसैं जीवमात्रा अशेषा । खालतिले ॥ २४ ॥  
 अखंड अगर्वता होउनि असति । तेयांते विनयेस हेचि संपत्ति ।  
 ते जयजयमंत्रे अर्पिति । माझां ठांड ॥ २५ ॥  
 नमितां मानाभिमान गलले । हणौनि अचचिते मीं चि जाले ।  
 ऐसे निरंतर मिसलले । उपासिति ॥ २६ ॥

ज्ञानयज्ञेन चाप्यन्ये यजंतो मामुपासते ।

एकत्वेन पृथक्त्वेन बहुधा विश्वतोमुखम् ॥ १५ ॥

अर्जुना हे गरुड भक्ति । सांधितली तुज प्रति ।  
 आतां ज्ञानयज्ञें यजिति । ते भक्त आईकें ॥ २७ ॥  
 परि भजन करिती हातवटी । तूं जाणतु आहासि किरीटी ।  
 जें मागां इया गोठी । केलिया आह्मीं ॥ २८ ॥  
 तव आधि जी अर्जुनु हणें । तें दैविकिया प्रसादाचें किं करणें ।  
 तज्हीं अमृताचिये आरोगणे । काइ पुरे हणवे ॥ २९ ॥  
 एया बोला आंतु अनंतें । लागणेयां देखिलें तेयातें ।  
 किं सुखावलेनि चित्तें । डोलतसे ॥ ३० ॥  
 हणें भलें केलें पार्था । यज्हांवि हा अनवसरु सर्वथा ।  
 परि बोलवीतसे आस्था । तूझी आमते ॥ ३१ ॥  
 तव अर्जुनु हणें हें काइ । चकोरें विण चांदणें चि नाहिं ।  
 जग निवविजे हा तेयाचां ठांड । स्वभाओ चि कीं जी ॥ ३२ ॥  
 एरें चकोरें तियें आपुलिये चाडे । चांचू करिति चंद्राचिये कडे ।  
 तेवि आह्मीं विनउं तें थोडें । देओ कृपासिंधु ॥ ३३ ॥

जें मेघु आपुलिया प्रौढी । जगाची आर्त्ति किं दवडी ।  
 बांचूनि चातकाची तान्ह केवढी । तो वर्षाओ पाहुनि ॥ ३४ ॥  
 परि चूला हीं येकाचिये चाडे । जेवि गंगेतें चि टाकावें पडे ।  
 तेवि आर्त्त बहू कां थोडें । तन्हीं सांघावें देवा ॥ ३५ ॥  
 तेथ देवें ह्मणितलें राहे । जो संतोषु आक्षा जाला आहे ।  
 तेयावरि स्तुति साहे । ऐसें उरलें नाहिं ॥ ३६ ॥  
 पै परियसु तुं आहासिं निक्षियापरी ।  
 ते चिं वक्तृत्वा वन्हाडिक करीं ।  
 ऐसें पोखुनु तेयातें हरी ।  
 आदरिलें बोलों ॥ ३७ ॥  
 तारि ज्ञानयज्ञु तो एवंग्रुपु । तेथ आदिसंकल्प हा यूपु ।  
 महाभूतें तो मंडपु । भेटु तो पशु ॥ ३८ ॥  
 मग पांचांचे जे विशेष गुण । अथवा इंद्रिये आणि प्राण ।  
 हें चि यज्ञोपचारभरण । अज्ञानघृत ॥ ३९ ॥  
 तेथ मनबुद्धि एयां कुडां । आंतु ज्ञान हा अग्नि फुडा ।  
 साम्य ते सुहाडा । वेदी जाणें ॥ ४० ॥  
 सविवेकमतिपाटव । तें चि विद्यागौरव ।  
 संयति चि सृक्सृव । जीउ यज्वा ॥ ४१ ॥  
 तो प्रतीतीचेनि पात्रें । विवेकें महामंत्रें ।  
 ज्ञानाग्निहोत्रें । भेटु नाशी ॥ ४२ ॥  
 तेथ अज्ञान सरौनि जाये । आणि यजिता यजन हे ठाये ।  
 आत्मसमरसें न्हाये । अवभृत् जेव्हां ॥ ४३ ॥  
 तेव्हां भूतें विषय करणें । हें वेगलालें काहीं न ह्मणे ।  
 आघवें एक चि ऐसें जाणे । आत्मबुद्धी ॥ ४४ ॥  
 जैसा चेइला तो अर्जुना । ह्मणे स्वप्निची हे सेना ।  
 मी चि जाला होंतां ना । निद्रावशें ॥ ४५ ॥

आतां सेना ते सेना नोहे । हें मीं चि एकु आघवें ।  
 ऐसें एकत्वे मानवे । विश्व तेया ॥ ४६ ॥  
 मग तो जीउ हे भाष सरे । आब्रह्म परमात्मबोधें भरे ।  
 ऐसे भजति ज्ञानाध्वरें । एकत्वे एणें ॥ ४७ ॥  
 अथवा अनादि हें अनेक । जें असारिखें येकायेक ।  
 आणि नामरूपादिक । तें हीं विषम ॥ ४८ ॥  
 ह्मणौनि विश्व भिन्न । परि न भेदे तेयाचें ज्ञान ।  
 जैसे अवयव तरि आनान । परि एकि चि देहिंचे ॥ ४९ ॥  
 कां शाखा सानिया थोरा । परि आहाति येका चि तरुवरा ।  
 बहू रश्मि परि दिनकरा । एकाचे जेवि ॥ ५० ॥  
 तेवि नाना विधा व्यक्ती । आनानें नावें आनानी वृत्ती ।  
 ऐसें जाणति भेदलां भूतीं । अभेदा मातें ॥ ५१ ॥  
 एणें वेगलालेपणें पांडवा । करिति ज्ञानयज्ञु बरवा ।  
 जें न भेदति या जाणिवा । जाणति ह्मणौनि ॥ ५२ ॥  
 ना तरि जेधवां जिये ठांड । देखति जें काहीं ।  
 तें मीं वांचूनि नाहीं । ऐसा चि बोधु ॥ ५३ ॥  
 पाहे पां बुडडा जेउता जाथे । तउतें जळ एक तेया आहे ।  
 मग वारे अथवा राहे । तन्हीं जळा चि माझि ॥ ५४ ॥  
 कां पवनें परमाणु उचलले । ते पृथ्वीचे हें नाहीं गेलें ।  
 आणि माघौते जन्हीं पडिले । तन्हीं पृथ्वी चि वरि ॥ ५५ ॥  
 तैसें भले तेथ भलेतेणें भावें । भले तें हीं हो अथवा नोहावें ।  
 परि तें मीं चि आघवें । होउनि ठेलें ॥ ५६ ॥  
 आगा हे जेवढी माझी व्याप्ति । तेव्हढी चि तेयांची प्रतीती ।  
 ऐसे बहुधाकारीं वर्तति । बहू चि होउनि ॥ ५७ ॥  
 हें भानुबिंब आघडे तेया । सदमुख जैसें धनंजया ।  
 तैसे ते विश्वा येया । समोर सदा ॥ ५८ ॥

आगा तैयांचेया ज्ञाना । पाठि नाहिं पै अर्जुना ।  
 वायु जैसा गगना । सर्वांगीं असे ॥ ५९ ॥  
 तैसा मो जेतुळा आघवा । तें चि तूक तैयांचेया सद्भावा ।  
 तारि न करितां पांडवा । भजन जालें ॥ ६० ॥  
 यन्हविं तन्हीं सकल मीं चि आहें । तारि कोणें कै उपासिलां नोहें ।  
 एथ एकें जाणणेनि विण किं ठायें । अप्राप्तां ॥ ६१ ॥  
 परि तें असो एणें उचितें । ज्ञानयज्ञें यजित सांते ।  
 जे उपासित मातें । ते सांधितले ॥ ६२ ॥

अहं ऋतुरहं यज्ञः स्वधाहमहमौषधम् ।

मंत्रोऽहमहमेवाज्यमहमग्निरहं हुतम् ॥ १६ ॥

अखंड सकल हें सकलीं मुखीं । साहाजें अर्पतसे मज एकीं ।  
 किं नेणणेया साठीं मूखीं । न पविजे चि मातें ॥ ६३ ॥  
 तो चि जाणिवेचा उदो जरि होये । तरि मुदलु वेदु तो मीं चि आहें ।  
 आणि तो विधानातें जिया विये । तो ऋतु हीं मीं ॥ ६४ ॥  
 मग तेया कर्मापासौनि बरवा । जो सांगोपांगु आघवा ।  
 यज्ञ प्रकटे पांडवा । तो हीं मीं गा ॥ ६५ ॥  
 स्वाहा मीं स्वधा । सोमादि ओषधी विविधा ।  
 आज्य मीं समिधा । मंत्र मीं हवि ॥ ६६ ॥  
 होता मीं हवन कीजे । जेथ तो अग्निरूप माझें ।  
 आणि हुत वस्तु कां जे जे । ते हीं मीं चि ॥ ६७ ॥

पितामहस्य जगतो माता धाता पितामहः ।

वेद्यं पवित्रमोङ्कार ऋक् साम यजुरेव च ॥ १७ ॥

पै जेयाचेनि अंगसंगें । इये प्रकृतीतव अष्टांगें ।  
 जन्म पाविजतसे जगें । तो पिता मीं गा ॥ ६८ ॥  
 अर्धनारीनटेश्वरी । जो पुरुष तो चि नारी ।  
 तेवि मीं चराचरीं । माता हीं होयें ॥ ६९ ॥

आणि जालें जग जेथ राहे । जेणें जीत वाढत आहे ।  
 तें मिं बांचूनि नोहें । आना निरुतें ॥ ७० ॥  
 इथें प्रकृतिपुरुष दोन्हीं । उपनलीं जेयाचां मनीं ।  
 तो पितामहो त्रिभुवनीं । विश्वाचा मीं ॥ ७१ ॥  
 आणि आघवेया जाणणेयांचिया वाटा । जेया गावां यंति सूभटा ।  
 जें वेदांचा चौहटा । वेद्य ह्मणिजे ॥ ७२ ॥  
 जेथ नाना मतां बुझावणी जाली ।  
 येकमेका शास्त्रांची अनोलखि फीटली ।  
 चूकलीं ज्ञानें जेथ मिलें आलीं ।  
 जें पवित्र ह्मणिजे ॥ ७३ ॥  
 पै ब्रह्मब्रीजाचा जाला अंकुर । घोषध्वनि नादाकार ।  
 तेयाचे गा भवन जें ॐकार । तें हीं मीं चि गा ॥ ७४ ॥  
 जेया ॐकाराचिये कुंसी । आखरें होंति अकारां ऐसीं ।  
 जियें उपजत वेदेंसीं । उठिलीं तीन्हीं ॥ ७५ ॥  
 ह्मणौनि ऋग्यजुसामु । हे तीन्हीं ह्मणे मी रामु ।  
 एवं मीं चि कुलाक्रमु । शब्दब्रह्माचा ॥ ७६ ॥

गतिर्भर्ता प्रभुः साक्षी निवासः शरणं सुहृत् ।

प्रभवः प्रलयः स्थानं निधानं बीजमव्ययम् ॥ १८ ॥

हें चराचर आघवें । जिये प्रकृती आंतु सांटवे ।  
 ते सिणली जेथ विसंवे । ते परम गति मीं ॥ ७७ ॥  
 आणि जेयाचेनि प्रकृति जिये । जेणे अधिष्ठिली विश्व बिये ।  
 जी एऊनि प्रकृती इये । गुणातें भोगी ॥ ७८ ॥  
 तो विश्वश्रियेचा भर्ता । मीं चि गा पांडुसुता ।  
 मीं गौसाविं समस्ता । त्रैलोक्याचा ॥ ७९ ॥  
 आकाशें सर्वत्र वसावें । वायू नांभरि उमेयां नसावें ।  
 पावकें दाहावें । वर्षावें जलें ॥ ८० ॥

पर्वती बैसक न संडावी । समुद्रीं रेघ नोलंडावी ।  
 पृथ्विया भूतें वाहावी । हे आज्ञा माझी ॥ ८१ ॥  
 मियां बोलविला वेदु बोले । मियां चालविला सूर्यु चाले ।  
 मियां हालविला प्राणु हाले । जो जगा चालिता ॥ ८२ ॥  
 मियां चि नियमिला सांता । कालु ग्रासु करितसे भूतां ।  
 इयें ह्मणियागते पांडुमुता । सकलें जेयाचीं ॥ ८३ ॥  
 ऐसा जो समर्थु । तो मीं जगाचा नाथु ।  
 आणि गगन ऐसा साक्षिभूतु । तो ही मीं चि ॥ ८४ ॥  
 इहीं नामरूपां आववां । जो भरला असे पांडवा ।  
 आणि नामरूपां ही उल्लावा । आपण चि जो ॥ ८५ ॥  
 जैसे जलाचे कळोळ । आणि कळोळीं आथि जल ।  
 ऐसेनि वसवीतु असे सकल । तो निवासु मीं ॥ ८६ ॥  
 मीं एकु अनेकपणें । वेगलालेनि प्रकृतिगुणें ।  
 जींतु जगाचेनि प्राणें । वर्ततु असें ॥ ८७ ॥  
 जैसा समुद्रु थिल्लर न ह्मणतां । भले तेथ बिंबे सविता ।  
 तैसा ब्रह्मादि सर्वा हीं भूतां । सुद्धु तो मीं ॥ ८८ ॥  
 मीं चि गा पांडवा । एया त्रिभुवनासि उल्लावा ।  
 सृष्टिक्षयप्रभवा । मूल तें मीं ॥ ८९ ॥  
 बीज शाखातें प्रसवे । मग तें रूखपण बीजीं चि सामावे ।  
 तैसें संकल्पें होथे आघवें । पाठि संकल्पीं मिले ॥ ९० ॥  
 ऐसा जगाचें बीज संकल्पु । अव्यक्तु वासनारूपु ।  
 तेयासि कल्पांतीं जेथ निक्षेपु । होथे तें मीं ॥ ९१ ॥  
 इयें नामरूपें लोटती । वर्णव्यक्ती आटती ।  
 जातींचे भेद फीटती । जें आकाश नाही ॥ ९२ ॥  
 तें सकलवासनासंस्कार । माघोते रचावेया आकार ॥  
 जेथ राहूनि असति अमर । तें निधान मीं ॥ ९३ ॥

तपाम्यहमहं वर्षं निगृणहाम्युत्सृजामि च ।  
अमृतं चैव मृत्युश्च सदसच्चाहमर्जुन ॥ १९ ॥

मीं सूर्याचेनि वेखें । तपें तें हें शोषे ।  
पाठि इंद्रु होउनि वर्षें । तें पुडुतीं भरे ॥ १४ ॥  
आगा मृत्युचां भागीं जें जें । तें हिं पै रूप माझें ।  
आणि न मरतें तव साहाजें । अविनाश मीं ॥ १५ ॥  
आतां बहू बोलैनि सांघावें । तें एक हेला घे पां आघवें ।  
तारि संतासंत ही जाणावें । मीं चि हें गा ॥ १६ ॥  
ह्यणौनि अर्जुना मी नसें । ऐसा कोणहीं ठाऊं असे ।  
पारि प्राणियांचें देव कैसें । जें नेदखति मातें ॥ १७ ॥  
हें आंतु बाहिरि मियां कोंदलें ।  
जग निखिल माझें चि ओतलें ।  
किं कैसें कर्म तेयां आलें ।  
जें मीं चि नाहिं ॥ १८ ॥  
तरंग पाणियें विण सूकति । रश्मि वाती उणें नेदखति ।  
तैसे मीं चि ते मीं न्हवति । विस्मयो देखें ॥ १९ ॥  
पारि अमृतीं कुहा पाहिजे । कां आपणेयांतें चि गिवसूं जाइजे ।  
ऐसें आथि हें काइ कीजे । अप्राप्तां ॥ २०० ॥  
ग्रासा येका अन्नासाठि । अंधु धांवतां पायें किरीटी ।  
आडलला चिंतामणि लेटी । आंधलेपणें ॥ १ ॥  
तैसें ज्ञान जें सांडुनि जाए । तें ऐसी हे दशा आहे ।  
ह्यणौनि कांजे तें केलें नोहे । ज्ञानें विण ॥ २ ॥  
आंधलेया गरुडाचे पांख आहाति । ते कोणहा हिं उपेगा जांति ।  
तैसे सत्कर्माचे उपखे ठांति । अज्ञानां तेवी ॥ ३ ॥

ब्रह्मिद्या मां सोमपाः पूतपापा यज्ञैरिष्टा स्वर्गतिं पार्थयन्ते ।

ते पुण्यमासाद्य सुरेन्द्रलोकमश्नन्ति दिव्यान्दिवि देवभोगान् ॥ २० ॥

देख पां किरीटी । आश्रमधर्माचिया राहाटी ।  
 विधिमार्गा कसवटी । जे आपण चि होंत ॥ ४ ॥  
 यजन करितां कवातिकें । तिहिं वेदांचा माथा तूके ।  
 क्रिया फलेंसीं उभी ठाके । पुढां जेयां ॥ ५ ॥  
 ऐसे दीक्षित जे सोमप । जे आपण चि यज्ञाचें रूप ।  
 तिहिं तेया पुण्याचेनि नावें पाप । जोडिलें देखें ॥ ६ ॥  
 जे श्रुतितथीतें जाणौनि । शतवेन्हीं यज्ञां करूनि ।  
 यजिलेया ही मातें चुकउनि । स्वर्गु वशंति ॥ ७ ॥  
 जैसैं कल्पतरू तलवटीं । वैसौनि झोलिये पाडी गांठी ।  
 मग निर्देउ निगे किरीटी । दैन्य करुं ॥ ८ ॥  
 तैसैं शतक्रतू यजिलें मातें । किं इच्छिताति स्वर्गादिसुखातें ।  
 आतां हें पुण्य किं निरुतें । पाप नोहे ॥ ९ ॥  
 ह्यणौनि मज वीण पाविजे स्वर्गु । तो अज्ञानांचा गा पुण्यमार्गु ।  
 ज्ञानिये तेयातें उपसर्गु । हाणि ह्यणति ॥ १० ॥  
 एन्हविं तन्हीं नरकिचें दुःख । पाहूनि स्वर्गा नावें किं सुख ।  
 वांचूनि नित्यानंद निर्दोष । तें स्वरूप माझें ॥ ११ ॥  
 मज येतां पैं सूभटा । हा द्विविधु गा अव्हांटा ।  
 स्वर्ग नरक इया वाटा । चोरांचिया ॥ १२ ॥  
 स्वर्गा पुण्यात्मकें येइजे । पापें चि पापात्मकें नरका जाइजे ।  
 मग मातें चि जेणें पाविजे । तें शुद्ध पुण्य ॥ १३ ॥  
 आणि मज चि माझि असतां ।  
 जेणें मीं दूरि होये पांडुसुता ।  
 तें पुण्य ऐसें ह्यणतां ।  
 जर्मि न झडे ॥ १४ ॥  
 पारें हें असो आतां प्रस्तुत । आइकें यया पारि ते दीक्षित ।  
 यज्ञूनि मातें याचित । स्वर्गभोग ॥ १५ ॥



मग मीं न पविजे ऐसें । जें पापरूप पुण्य असे ।  
 तेणें लाधलेनि सौरसें । स्वर्गा येती ॥ १६ ॥  
 जेथ अमरत्व हें चि सीहांसन । ऐरावता सारिखें वाहान ।  
 राजधानीभवन । अमरावती ॥ १७ ॥  
 जेथ महासिद्धिचीं भांडारें । अमृताचीं कोठारें ।  
 जिये गावीं क्षीरारें । कामधेनुचीं ॥ १८ ॥  
 जेथ उल्लिगे देवां पाइकां । सैध चिंतामणिचेया भूमिका ।  
 विनोदवनवाटिका । सुरतरुंचिया ॥ १९ ॥  
 गंधर्व—गान—गाणी । जेथ रंभे ऐसिया नाचणी ।  
 उर्वशी मुख्य विलासिनी । आंतौरिया ॥ २० ॥  
 मंदनु ओलगे सेजारें । जेथ चंद्रु सिंघे सावरें ।  
 पवना ऐसे ह्याणियारे । धावणे जेथ ॥ २१ ॥  
 पै बृहस्पति मुख्य आपण । स्वस्तिश्रियेचे ब्राह्मण ।  
 भाटियेचे सुरगण । विकर जेथें ॥ २२ ॥  
 लोकपाल रागेचे । राउत जिये पदिचे ।  
 उच्चैश्रवा खांचे । मागिलीकडे ॥ २३ ॥  
 हें बहू असो जे ऐसे । भोग ब्रह्मसुखा सरिसे ।  
 ते भोगीत जवं असे । पुण्यलेशु ॥ २४ ॥

ते तं भुक्त्वा स्वर्गलोकं विशालं क्षीणे पुण्ये मर्त्यलोकं विशन्ति ।  
 एवं त्रयीधर्ममनुप्रपन्ना गतागतं कामकामा लभन्ते ॥ २१ ॥

मग तेया पुण्याची पाहूती सरे ।  
 सवें चि इंद्रपणाची ऊठि उतरे ।  
 आणि येजो लागति माघारे ।  
 मृत्यु लोका ॥ २५ ॥

जैसा भाडिचा कवडा वेचे ।  
 मग दार ही चेंपू नैये तेयाचें ।  
 ऐसें लाजिरवाणें दीक्षिताचें ।  
 फाड सांबों ॥ २६ ॥  
 एव तिथेया मातें चूकले । जिहिं पुण्यें स्वर्ग कामिले ।  
 तेयां अमरपण तें वाउ जालें । आतां मृत्युलोक ॥ २७ ॥  
 आगा स्वर्गी निधान फावे । परि ते चेइलेयां राहांत पावें ।  
 तैसें स्वर्गसुख जाणावें । वेदज्ञाचें ॥ २८ ॥  
 अर्जुना वेद जन्हीं जाला । तन्हीं मीं नेणतां वायां गेला ।  
 कणु सांडौनि उपणिला । कोंडा जैसा ॥ २९ ॥  
 हणौनि मज एकें विण । हें त्रयीधर्म अकारण ।  
 मातें जाणौनि काहीं चि नेण । तूं सुखिया होंसी ॥ ३० ॥

अनन्याश्चितयंतो मां ये जनाः पर्युपासते ।

तेषां नित्याभियुक्तानां योगक्षेमं वहाम्यहम् ॥२२॥

पैं सर्वभाविसिं उखितें । जे उ०पले माझिये चित्तें ।  
 जैसा गर्भगोलु उद्यमातें । कोणहा हीं नेणे ॥ ३१ ॥  
 तैसें मीं वांचूनि काहीं । आणिक गोमटें चि नाहीं ।  
 मज चि नावें पाइ । जीणें ठेविलें ॥ ३२ ॥  
 ऐसे अनन्यगतिकें चित्तें । चिंतीत सांते मातें ।  
 जे उपासीति तेयांतें । मी चि सेविं ॥ ३३ ॥  
 ते एकवट्टनि जिये क्षणीं । अनुसरले गा माझिया वाहाणीं ।  
 तेव्हां चि तेयां चितवणी । फाटली आपुली ॥ ३४ ॥  
 मग तिहिं जें जें करावें । तें मज चि पडिलें आवें ।  
 जैसें अजातपक्षाचेनि जीवें । पक्षिणी जिये ॥ ३५ ॥  
 कां आपुली तान्हभूक नेणे । तेयां नीकें तें तीयेसी चि करणें ।  
 तैसें अनुसरले मज प्राणें । तेयांचें मिं काइसेनि न लजें ॥ ३६ ॥

तेयां माक्षेयां सायुज्याची चाड । तरि तें चि पुरविं कोड ।  
 कां सेवा ह्मणति आड । प्रेम सुएं ॥ ३७ ॥  
 ऐसा मनीं धरिति जो भाओ । तो पुढपुढां लागें तेयां देऊ ।  
 आणि दिवलेयाचा निर्वाहो । तो ही मीं चि करीं ॥ ३८ ॥  
 हा योगक्षेमु आघवा । तेयांचा मज चि गा पांडवा ।  
 जेयांचेया सर्वभावां । आश्रयो मीं ॥ ३९ ॥

येऽप्यन्यदेवताभक्ता यजंते श्रद्धयान्विताः ।

तेऽपि मामेव कौंतेय यजंत्यविधिपूर्वकम् ॥ २३ ॥

आतां आणीक संप्रदायें । परि मातें नेणति समवाए ।  
 जे अग्नये इंद्राय अर्यमणे सोमाय । ह्मणौनि भजिति ॥ ३४० ॥  
 तें हिं किर मातें चि होये । कां जें हें आघवें मीं चि आहे ।  
 परि ते भजती उजिरी नोहे । विखम पडे ॥ ४१ ॥  
 पाहे पां शाखापल्लव वृक्षाचे । हे न्हवति येका चि बीजाचे ।  
 परि पाणी घेणें मुलांचें । तें मुलीं चि घापे ॥ ४२ ॥  
 कां दाही इंद्रियें आथि । इयें जन्हीं एकी चि देहिचि होंति ।  
 आणि इहीं सेविले विखय जांति । एका चि ठाया ॥ ४३ ॥  
 तन्हीं करुनि रसोये बरवी । कानिं केवि भरावी ।  
 फुलें आणुनु बांधावीं । डोलां केवि ॥ ४४ ॥  
 तेथ रसु तो मुखें चि सेवावा । परिमलु तो घ्राणें चि घेयावा ।  
 तैसा मीं तो यजावां । मीं चि ह्मणौनि ॥ ४५ ॥  
 येर मातें नेणौनि भजन । तें वायां चि गा आनीआन ।  
 ह्मणौनि कर्माचे डोले ज्ञान । तें निर्दोष होआवें ॥ ४६ ॥

अहं हि सर्वयज्ञानां भोक्ता च प्रभुरेव च ।

न तु मामभिजानंति तत्त्वेनातश्च्यवंति ते ॥ २४ ॥

एन्हविं पाहे पां पांडुसुता । एयां यज्ञोपचारां समस्तां ।  
 मीं वांचूनि भोक्ता । कवणु आहे ॥ ४७ ॥

मी सकल यज्ञाची आदि । आणि यजना या मीं चि अवधि ।  
 किं मातें चूकौनि दुर्बुद्धी । देवां भजले ॥ ४८ ॥  
 गंगेचे उदक गंगे जैसें । अर्पिजे देवपितरोद्देशें ।  
 माझे मज देति तैसें । परी आनानी भावीं ॥ ४९ ॥  
 ह्यणौनि ते पार्था । मातें न पवती चि सर्वथा ।  
 मग मनीं जे वाहिली आस्था । तेथ आले ॥ ३५० ॥

यांति देवव्रता देवान् पितृन्यांति पितृव्रताः ।

भूतानि यांति भूतेज्या यांति मद्याजिनोऽपि माम् ॥२५॥

मनें वाचा करणीं । जेयांचीं भजनें देवांचिया वाहाणी ।  
 ते शरीर जांत क्षणीं । देव चि जाले ॥ ५१ ॥  
 अथवा पितरांचीं हान व्रतें । वाहांति जेयांचीं चित्तें ।  
 जीवित सरतां तेयांतें । पितृत्व चि वरि ॥ ५२ ॥  
 कां क्षुद्र देवतादि भूतें । तियें चि जेयांचीं परमदेवतें ।  
 जिहिं अभिचारुकि तेयांतें । उपासिलें ॥ ५३ ॥  
 तेया देहाची जवनीक फीटली । आणि भूतत्वाची प्राप्ति जाली ।  
 एवं संकल्पवशें फललीं । कर्म तेयां ॥ ५४ ॥  
 मग मीं चि डोलां देखिलां । जिहिं कानिं मीं चि आइकिलां ।  
 मनीं मीं भाविलां । वानिलां वाचा ॥ ५५ ॥  
 सर्वांगें सर्वें ठांड । नमस्कारिलां मीं चि जिहीं ।  
 दानपुण्यादि जें काहीं । तें माक्षिया मोहरा ॥ ५६ ॥  
 जिहिं मातें अध्ययन केलें । जे आंतुं बाहिरि मियां जि धाले ।  
 जेयांतें जीवित जोडले । मज चि लागि ॥ ५७ ॥  
 जे अहंकार वाहांत आंगीं । आसिं हरिचे हें भूषावेया लागि ।  
 जे लोभिण्ये एक चि जर्गी । माझेनि लोभें ॥ ५८ ॥  
 जे माझेनि कामें सकाम । जे माझेनि प्रेमें सप्रेम ।  
 जे माक्षिये भूली सभ्रम । नेणति लोकु ॥ ५९ ॥

जेयांचीं मातें चि जाणति शास्त्रें । मी जोडें जेयांचेनि मंत्रें ।  
 ऐसोनि चेष्टामात्रें । भजले मज ॥ ६० ॥  
 ते मरणा ऐलीकडे । मज मीलेंनि गेले फुडे ।  
 मग मरणीं आनीकडे । जांतील केवि ॥ ६१ ॥  
 ह्यणौनि मद्याजी जाले । ते सायुज्या माझेया आले ।  
 जिहीं उपचारामिसें दीधलें । आपणपें मज ॥ ६२ ॥  
 पै अर्जुना माझां ठांड । आपणपेंनि विण सौरमु नाही ।  
 मी उपचारीं कव्हणी हीं । ना कलें गा ॥ ६३ ॥  
 एथ जाणीव करी तें चि नेणे । आथिलेपण मिरवी तें चि उणें ।  
 आझीं जालें, ऐसें ह्यणे । तें कहीं चि नोहे ॥ ६४ ॥  
 अथवा यज्ञदानादि किरीटी । कां तपें हान जें हुटहुटी ।  
 तें तृणा एका साठीं । न सरे एथ ॥ ६५ ॥  
 पाहे पां जाणिवेचेनि बलें । कोणहीं वेदापासूनि असे आगलें ।  
 किं शेषाहूनि तोंडागलें । बोलिकें आथि ६६ ॥  
 तो ही आंधुरणा खालि दडे । येरु नेति ह्यणौनि बाहुडे ।  
 एथ सनकादिक वेडे । पिंसे जाले ॥ ६७ ॥  
 करितां तापसांसि कडसणीं । कवणु जवला ठेविजेल शूलपाणी ।  
 तो ही अभिमानु सांड्नी पायेवणी । माथां बाहे ॥ ६८ ॥  
 नां तरि आथिलेपणें सरिसी । कोणहीं आहे लक्ष्मियां ऐसी ।  
 श्रिये सौरिखिया दासी । घरीं जियेतें ॥ ६९ ॥  
 तिया खेलतां करिति घरकुलीं ।  
 तेया नावें अमरपुरें जारि ठेविलीं ।  
 तरि नव्हों नैयंति बाउलीं ।  
 इंद्र तियांचें ॥ ७० ॥  
 जे नावडौनि जेव्हां मोडिति । तेव्हां महेंद्राचे ही रंक होंति ।  
 तियां झाडा एउतें जेयां पाहांति । ते कल्पवृक्ष ॥ ७१ ॥

ऐसीं जियेचिया जवालिका । सदर्थें घरिचेयां पाइकां ।  
 ते लक्ष्मी मुख्य नायका । नमने चि एथ ॥ ७२ ॥  
 मग सर्वस्वें करी सेवा । मानु सांझनि पांडवा ।  
 ते पाये धुआवेयाचेया दैवां । पात्र जाली ॥ ७३ ॥  
 ह्मणौनि धोरपण पन्हां सांडिजे ।  
 एथ वित्पत्ति अवघी चि विसरिजे ।  
 जें जगा धाकुटेयां होइजे ।  
 तें जवलीक माझी ॥ ७४ ॥  
 अगा सहस्रकराचिये दीठी । पुढां चंद्रु ही लोपे किरीटी ।  
 तेथ खद्योतु कां हुटहुटी । आपुलेनि तेजें ॥ ७५ ॥  
 तैसें लक्ष्मीयेचें धोरपण सरे । जेथ शंभूचें हीं तप नुपकर ।  
 तेथ येर प्राकृत हेंदारे । जाऊं काइ लाहे ॥ ७६ ॥  
 एया लागि शरीर-सांडोवा कीजे ।  
 सकल गुणांचे लोण उतरिजे ।  
 संपत्तिमदु सांडिजे ।  
 कुरौंडी करुनि ॥ ७७ ॥

पत्रं पुष्पं फलं तोयं यो मे भक्त्या प्रयच्छति ।  
 तद्गृहं भक्त्युपहतमश्नामि प्रयतात्मनः ॥ २६ ॥  
 मग निःसीमु भाऊ उल्हासें । मज अर्पावेयाचेनि मीसें ।  
 फल एक आवडे तैसें । भले तेयाचें ॥ ७८ ॥  
 मग भक्तु माझेयाकडे अलुमालु दाखवी ।  
 आणि मीं दोन्हीं हात उडवीं ।  
 मग देंदु न संडितां सेवीं ।  
 आदरेसीं ॥ ७९ ॥  
 तें गा भक्तीचेनि नावें । फूल मज येक देयावें ।  
 तें लेखें तरि मियां तुरुबावें । परि मुखीं चि घालीं ॥ ८० ॥

हें असो काइसीं फुलें । पान चि एक आवडतें जालें ।  
 तें साजुक ही न्हवे सूकलें । भले तैसें ॥ ८१ ॥  
 परि सर्व भावें भरलें देखें । आणि भूकला ऐसा अमृतें तोखें ।  
 तें पत्र चि परि तेणें सुखें । आरोगुं लागें ॥ ८२ ॥  
 अथवा ऐसें हीं एक घडे । जें पाला ही परि न जोडे ।  
 तारि उदकाचें सांकडें । नव्हैल कीं ॥ ८३ ॥  
 तें भले तेथ निमोलें । न जोडितां असे जोडलें ।  
 तें चि सर्वस्व करुनि अर्पिलें । जेणें मज ॥ ८४ ॥  
 तेणें वैकुंठापासौनि विशालें । मज लागि केलीं राउलें ।  
 कौस्तुभाहूनि निर्मलें । लेणीं दीधलीं ॥ ८५ ॥  
 दूधाचीं सेजारे । क्षीराब्धी ऐसीं मनोहरें ।  
 मज लागि अपारें । स्रजिलीं तेणें । ८६ ॥  
 कर्पूर चंदनु अगरु । ऐसेया सुगंधांचा मनोहरु ।  
 मज हातीं लाविला दिनकरु । दीपमाले ॥ ८७ ॥  
 गरुडा सारिखीं वाहनें । सुरतरुचीं उद्यानें ।  
 कामधेनूचीं गोधनें । अर्पिलीं तेणें ॥ ८८ ॥  
 मज अमृताहूनि सुरसें । बोनीं वोगरिलीं बहुवसें ।  
 ऐसा भक्ताचेनि उदकलेशें । परितोषें गा ॥ ८९ ॥  
 हें सांचावें काइ किरीटी । तुझीं देखिलें आपुलिया दीठी ।  
 मीं सुदामेयांचिया सोडीं गांठी । पडुवेयां लागि ॥ ९० ॥  
 पै गा भक्ति एकि मीं जाणें । तेथ सानें थोर न क्षणें ।  
 आह्मीं भावांचे पाहुणे । भलेतेया ॥ ९१ ॥  
 एर पत्र पुष्प फल । तें भजावेया मीस केवल ।  
 आमचा लागु निखल । भक्तितत्व ॥ ९२ ॥

यत्करोषि यदभ्यासि यज्जुहोषि यदासि यत् ।

यत्तपस्यसि कौंतेय तत्कुरुष्व मदर्पणम् ॥ २७ ॥

हणौनि अर्जुना अवधारी । तू बुद्धि एके सोपारी ।  
 तरि साहाजें आपुलां मंदिरीं । अवसरोचित ॥ ९३ ॥  
 जे जे काहीं व्यापार करिसी । कां भोग हान जे भोगिसि ।  
 अथवा यज्ञीं यजिसी । नाना विधीं ॥ ९४ ॥  
 ना तरि पात्रविशेषें दानें । कां सेवकांसि जीवणें ।  
 तपादि साधनें । त्रतें करिसी ॥ ९५ ॥  
 तें क्रियाजात आघवें । जें जैसें निफजैल स्वभावें ।  
 तें भावना करुनि करावें । माझेया मोहरा ॥ ९६ ॥  
 परि सर्वथा आपुलां जिधीं । केलेयाची से काहीं नुरावी ।  
 ऐसीं धूनि कर्म देयावीं । माझां हातीं ॥ ९७ ॥

शुभाशुभफलैरेवं मोक्ष्यसे कर्मबन्धनैः ।

संन्यासयोगमुक्तात्मा विमुक्तो मामुपैष्यसि ॥ २८ ॥

मग अग्निकुंडीं बीजें घातलीं । तियें अंकुरदशे जेवि मूकलीं ।  
 तेवि न फलती चि मज अर्पिलीं । शुभाशुभें ॥ ९८ ॥  
 आगा कर्मि जें उरावें । तें तिहीं सुखदुःखीं फलावें ।  
 आणि तेयातें भोगावेया यावें । देहा एका ॥ ९९ ॥  
 तें उगणिलें मज कर्म । तेव्हां चि पूसलें जन्म ।  
 जन्मासवें श्रम । वरिचिल ही गेले ॥ १०० ॥  
 हणौनि अर्जुना एया परीं । पाहिचा वेलु नव्हैल भारी ।  
 हे संन्यासयुक्ति सोपारी । दीधली तुज ॥ १ ॥  
 एया देहाचिये बांधवडी न पडिजे ।  
 सुखदुःखाचां सागरीं न बुडिजे ।  
 सुखें सुखरूपां घडिजे ।  
 माझेया चि आंगा ॥ २ ॥

समोऽहं सर्वभूतेषु न मे द्वेष्योऽस्ति न प्रियः ।

ये भजन्ति तु मां भक्त्या मयि ते तेषु चाप्यहम् ॥ २९ ॥



तो मी पूससी कैसा । तरि जो सर्वभूती कां सरिसा ।  
 जेथ आप पर ऐसा । विभागु नाही ॥ ३ ॥  
 जें एया मातें जाणौनि । अहंकाराचा कुरुठा मोडूनि ।  
 जीवें कर्म करुनि । भजत मातें ॥ ४ ॥  
 ते वर्त्तत ही असति देहीं । परि देहीं ना ते माझां ठाई ।  
 आणि मीं तेयांचां हृदयीं । समगु असें ॥ ५ ॥  
 सविस्तर वटव जैसें । बीज कणिके माझि असे ।  
 आणि बीजकणु वसे । वटीं जेवि ॥ ६ ॥  
 तेवि आह्मा तेयां परस्परें । बाहीरि नावांची चि अंतरे ।  
 वांचूनि आंतुवटे वस्तुविचारें । मीं ते चि ते ॥ ७ ॥  
 आतां जाइयांचें जैसें लेणें । आंगावारी आहाच वाणें ।  
 तैसें देहधरणें । उदास तेयांचें ॥ ८ ॥  
 परिमलु निगालेयां पवनापाठीं । मार्गां अस फूल देंटीं ।  
 तैसें आयुष्याचिये मुठी । केवल देह ॥ ९ ॥  
 एरु अवष्टंभु जो आघवा । तो आरूढौनि मद्गवा ।  
 मज चि आंतु पांडवा । पैठा जाला ॥ १० ॥

अपि चेत्सुदुराचारो भजते मामनन्यभाक् ।

साधुरेव स मंतव्यः सम्यग्व्यवसितो हि सः ॥ ३० ॥

ऐसेनि भजतेनि प्रेमभावे । जेया शरीर ही पाठि न पवे ।  
 तेणें भलेतिये होआवें । जातिचेयां ॥ ११ ॥  
 आणि आचरण पांतां सूभटा । तो दुष्कृतांचा चि कीरु सेलवांटा ।  
 परि जीवित वेचिलें चौहटां । भक्तीचां किं ॥ १२ ॥  
 आगा अंतिचीया मती । साचपण पुढिली गती ।  
 ह्मणौनि जीवित जेणें भक्ती । दीन्हलें शेषीं ॥ १३ ॥  
 तो आदीं जन्हीं अनाचारी । तन्हीं सर्वोत्तमू चि अवधारी ।  
 जैसा बुडाला महापुरीं । नमरतु निगाला ॥ १४ ॥

तेयाचें जीवित ऐली थडिये आलें ।  
 हणौनि बुडालेंपण वायां जेवि गेलें ।  
 तेवि नुरे चि पाप केलें ।  
 सेवटिचिये भक्ती ॥ १५ ॥  
 एया लागि दुष्कृती जन्हीं जाला । तन्हीं अनुतापतीर्थी न्हाला ।  
 न्हाउनियां मज आंतु आला । सर्वभाबें ॥ १६ ॥  
 तारि आतां पवित्र तेयाचें कुल । अभिजात्य तें चि निर्मल ।  
 जन्मलेयाचें फल । तेयाचेया चि जालें ॥ १७ ॥  
 तो चि सकल पढिनला । तपें तो चि तपिनला ।  
 अष्टांगु अभ्यासिला । योगु तेणें ॥ १८ ॥  
 हें बहुत असो पार्था । तो उतरला कर्में सर्वथा ।  
 जेयाची अखंड आस्था । मज चि लागि ॥ १९ ॥  
 अवघेया चि मनोबुद्धिचिया राहाटी ।  
 भरौनि एकनिष्ठतेची पेटी ।  
 मज माक्षि किरीटी ।  
 निक्षेपिली जेणें ॥ ४२० ॥

क्षिप्रं भवति धर्मात्मा शश्वच्छांतिं निगच्छति ।

कौंतेय प्रतिजानीहि न मे भक्तः प्रणश्यति ॥ ३१ ॥

तो आतां अवसरें मजसारिखा होईल ।  
 ऐसा हान भाऊ तूज जाईल ।  
 हां गा अमृतांतु राहिल ।  
 मरण केवि ॥ २१ ॥  
 पैं सूर्यु जो वेलु नुदैजे ।  
 तेया वेला चि नावं रात्रि किं हणिजे ।  
 तेवि माक्षेये भक्तीविण कीजे ।  
 तें महापाप न्हवे ॥ २२ ॥

हणौनि तेयाचेया चित्ता । माझी जवलीक जाली पांडुसुता ।  
 तेन्हां चि तो तत्वता । माझे रूप ॥ २३ ॥  
 जैसा दीपें दीपु लाविजे । तेथ चि आदिलु कोणु हें नेणजे ।  
 तैसा सर्वस्वें मज भजे । तो मीं चि होउनि ठाके ॥ २४ ॥  
 मग माझी मित्य शांति । तेया ते दशा ते चि कांति ।  
 किंबहुना माझे जीति । माझेनि जीवें ॥ २५ ॥  
 एथ पार्था पुडुतीं पुडुतीं । तें चि तें सांघों केती ।  
 तन्हीं मियां चाड तारि भक्ती । नविसंभिजे ॥ २६ ॥  
 आगा कुलाचेया चोखटपणा नलगा ।  
 आभिजात्यें झनें श्लाघा ।  
 व्युत्पत्तीचा ही वाउगा ।  
 सोसु कां वाहा ॥ २७ ॥  
 कां रूपें वयसा माजा । आथिलेपणें काह्या गाजा ।  
 एकु भाउ नाहिं माझा । तरि पालाल तें ॥ २८ ॥  
 कणें विण सोपटें । कणिसें लागलीं आथि एक दाटें ।  
 काइ कराल गोमटें । वोस नगर ॥ २९ ॥  
 नां तरि सरोवर आटलें । रानीं दुःखिया दुःखियें भेटलें ।  
 कां वांशां फूलीं फूललें । झाड जैसें ॥ ३० ॥  
 तैसें सकल तें विभव । अथवा कुलज्ञानगौरव ।  
 जैसें शरीर आहे सावयव । परि सीस चि नाहिं ॥ ३१ ॥  
 तैसें माझेया भक्तीविषा । जलो तें जियालेपण ।  
 आगा पृथ्वीवारि पाखण्ण । नसति काइ ॥ ३२ ॥  
 पैं हींभरांची दाट साडली । सजनीं जैसी वालिली ।  
 तैसिं पुण्यें डाबलुनि गेलीं । अभक्तातें ॥ ३३ ॥  
 नींबु नींबोळीं मोडोनि आळा । तरि काउलेयांसि सुकाळु जाला ।  
 तैसा भक्तीहीनु बादिजाला । दोषां चि लागि ॥ ३४ ॥